


NAGASULAY SA PAGBUHAT OG BULUHATON SA DIOS NGA WALA SA KABUBUT-ON SA DIOS

 Mga igsoong ministro, ug kaninyo mga higala nga anaa dinha, masulti ko nga usa kini ka pribilihiyo nga maania niining buntaga. Sa ingon niana nga pagpaila, aba, dili ko kabalo kung unsaon ko pagtagbo ang ingon nianang gikasulti niya.

² Apan samtang nagalingkod mi dinha nga nag-istoryahanay, ni Igsoong Nolan, sa hunahuna ko wala pa gyud ko sukad-sukad nakahimamat og usa ka tawo nga eksaktong (Hinoon kitang tanan gibuhat man sa nagkalainlaing mga hulmahan, apan pinaagi sa mao ra nga Dios.) sama ni Igsoong Jack Moore, um-hum, bueno, siya'y nahimo gayud nga . . . miingon si Igsoong Nolan, “Sukad niadtong ania ako dinhi kauban niya . . .” (umagad man siya ni Igsoong Jack Moore), ug nakatongan gayud niya nga higugmaon siya ug tahuron ang iyang kaalam ug mga ingon-nianang butang. Ug kana, makasulti gyud ko og “amen” niana. Tungod sa daghang maayo nga butang . . . mga higayon nga magkauban kami, siya ug ako, ug si Igsoong Brown, si Igsoong Boutliere nga ania pud dinhi. Mga maayo nga kalalaken-an sa Dios nga gihigugma ko gayud sa tibuok kong kasingkasing.

³ Ug usab akong—nakita ko nga dili na kami nagakabatan-on pa, bueno, nahunahunaan ko lang karon ang panahon nga makita namo nga nausab na gyud mi sukad niadtong mga baynte ka tuig na ang milabay nga magkauban namong ginalatas ang mga disyerto, ug uban pa ingon nga mga batan-ong kalalaken-an pa kaniadto. Apan nasayod man 'ta nga adunay usa ka Yuta kon diin dili na kita magakatigulang pa. Magtagbo ra kita didto pag-usab sa umaabot nga adlaw.

⁴ Kagabii sa dihang mogikan na ako sa tabernakulo, dunay usa ka luoy'ng babaye nga nagahigda sa teheras didto sa may luyo, ug ingon siya, “Igsoong Branham, pila na ka tuig ang milabay . . .” Sa tan-aw ko mora'g dugay na siyang naparalisado. Ingon siya, “Imo akong giingnan kaniadto . . .” Nakalimtan ko na kung unsa gyud mismo ang gisulti sa maong babaye, basta mora'g ingon niini, dili ko unta masayup ang pagsulti niini. Miingon, “Giingon mo nga kining akong pag-antus aduna gyu'y katuyoan,” o mora'g ingon-ana, nga makabaton kono siya og anak. Ug wala niya kono kadto masabti

kung sa unsang paagi kadto mahitabo tungod pud sa iyang kahimtang.

⁵ Atua diay didto ang usa ka batan-on, guwapong batan-on nga lalaki, miingon kini, “Ako kadtong nabatonan niya nga anak.” Miingon, “Ako kadtong gisulti niya nga anak.”

⁶ Ug daghan na kaayong mga butang ang nangahitabo diha sa atong panaw, nga wala na gani kita’y oras para istoryahan. Pero magkaaduna gyud kita og higayon pag didto na ta sa pikas kinabuhi.

⁷ Ug kini nga sanga sa Business Men, dili baya ko miyembro sa bisan unsa man nga organisasyon, siguro nakahibalo na man mong tanan, apan ako. . . Mao lang kini ang bugtong grupo nga duna ako’y pagpakighilambigit, dala ang usa ka fellowship kard, nga. . . Bukas sa nagkadaiyang mga denominasyon, og sila’y eksklusibo nga mga negosyante lamang. Nahimo gayud sila nga usa ka dakung tabang para kanako ug sa matang sa ministerio nga gikahatag kanako sa Ginoo nga atong Amahan. Kini’y. . . dili man gyud ingon nga dili ko gusto ang organisasyon; kondili tungod lang gyud sa ministerio nga gikahatag kanako, ug kung dili ako magmatinud-anon niana nga pagtawag, nan mamahimo sab kong usa ka dili-matinuuron nga tawo sa Dios.

⁸ Ug, akong mahinumduman, sa wala pa ko migikan sa Tucson, tingali’g daghan gani kaninyo ang atua didto, usa niadto ka adlaw, nga namulong ako para sa maong sanga didto sa Los Angeles. Ug adunay. . . namadlong gyud ako kaniadto nga medyo—medyo mabagison batok sa organisasyon. Ako—wala man nako gituyo nga mamaingon niadto. Pero kung gituyo ko kadto aron lang nga mabagison, nan mamahimong usa ra diay ako ka hipokrito. Dili mo puedeng buhaton ang ingon-ana, dili gyud, tungod kana’y mamahimo lamang nga pagyubit sa usa ka tawo. Ug naghigot ako niadto mahitungod sa usa ka punoan nga akong nakita didto sa nataran ni Igsoong Sharrit. Aduna man gud kadto og mga lima ka nagkalainlaing matang sa bunga. Ug miingon ko, “Wala pa ko sukad-sukad nakakita og ingon niana nga punoan sa tibuok kong kinabuhi.” Usa kadto ka. . . aduna kadto og kahil, adunay mga lemon, aduna pud og tangerine, mga tangelo, mga orange, nga nagatubo tanan sa mao ra nga punoan. “Bueno,” ingon ko, “Ako—wala gayud ako makasabot niana. Unsa ba kana nga matang sa punoan?”

“Usa kini ka punoan sa orange.”

Ug ingon ko, “Bueno, kahil ba kana?”

Miingon, “Oo.”

Ako—ingon ko, “Giunsa man kana?”

Miingon, “Gipangsumbak ra kana.”

Ug ingon ko, “Oh, mao diay.”

9 Ingon siya, “Kining tanan pamilya ra man sa citrus, ug bisan unsa nga tanum nga pamilya sa citrus mamahimong... mamahimo ra nga isumbak.”

10 Ingon ko, “Nasabtan ko na.” Dayon misugod ako nga misinggit og diyutay, kabalo na mo, tungod kay dali man gud ko matandog ug emosyonal.

11 Busa, miingon siya, “Unsa ma’y problema?”

12 Ug ingon ko, “Bueno, aduna lang ko’y gihunahuna.” Ug ingon pa ko, “Karon aduna ko’y gustong ipangutana kanimo.” Ingon ko, “Bueno, sa sunod ba tuig pagmoabot na ang tingpamulak, nan wala na’y mga orange, mga tangelo, mga kahil, og mga lemon; mamahimong puro na lang mga orange tungod kay mga gisumbak ra man kini diha sa punoan sa orange, dili ba?”

13 Ingon siya, “Dili, dili. Dili, ang matag sanga mamunga gihapon sa mismong bunga niini.”

14 Ingon ko, “Mao ba.”

15 Busa maayo gyud gihapon kanang paminawon hangtud karon, tungod ako’y...kabalo na man mo nga ako’y... siyempre nakabaton baya ko og digri gikan sa Hartford ug sa tanan niining uban pang mga unibersidad, kabalo mo. Busa—busa akong...naga-oberba ra ko sa *kinaiyahan*, kana ang pinakamaayong unibersidad nga akong nahikaplagan sukad-sukad, ang unibersidad sa Magbubuhat. Busa kung mag-oberba lang ako niana, dinha ko ginakuha ang akong mga wali sumala sa akong makita kung unsa maglihok ang kinaiyahan.

16 Ug ingon ko, “Bueno, nagahatag kana kanako og maayo gayud nga pagbati.”

17 Ingon siya, “Unsa ma’y nahitabo?”

18 Ingon ko, “Aduna lang ko’y nahunahunaan.”

19 Busa, niadtong adlawa, nagwali ako mahitungod niana. Ug ingon ko, “Karon, nakita n’yo, kaniadtong unang nagsugod ang iglesia, kadto mao’y...ang ingon ni Jesus...” Nagwali ako niadto bahin sa Juan 15. “Ako mao ang Punoan sa parras, kamo mao ang mga sanga. Ug ang matag sanga nga dili mamunga pagaputlon, og pagasunogon.”

20 Ug gisukmatan ako sa usa ka tawo mahitungod niana, ang ingon, “Nakita mo, abi ko ba pag napuno ka na sa Espiritu Santo ug luwas na, ang ingon mo nga, ‘dili na sila mapahilayo pa gikan niini.’”

21 “Husto kana.”

22 Miingon ang tawo, “Unsa man diay *kana*?”

23 Ingon ko, “Bueno lahi man nga hilisgotanan ang imong ginahisgotan. Ang ginahisgotan Niya dinha mahitungod man sa pagpamunga, dili ang maong Punoan; nagahisgot Siya

mahitungod sa pagpamunga, ug dili ang Kinabuhi. Ang ingon Niya, ‘Bueno, putla na lang gikan sa maong punoan aron nga motubo kini, mamunga mismo kini.’”

24 Siya miingon . . .

25 Ug ingon ko, “Karon, kita mo, kini nga punoan, sa dihang mitubo kini kaniadto, kini’y bug-os pa nga tinuod, Biblianhong mga Cristohanon. Dayon naisumbak ang usa ka sanga nga gitawag og Lutheran, Methodist, Baptist, Presbyterian: mga lemon ug uban pa.” Ug ingon ko, “Nakita mo na, nabuhi kini sa ngalan sa Cristianismo, apan kini . . . Nabuhi kini pinaagi niana nga Punoan, apan nagapamunga kini sa kaugalingon niining denominasyon nga matang. Kita mo? Apan,” miingon ko, “kung kanang punoan sa orange manalingsing og usa na usab ka sanga nga iyaha mismo, nan magapamunga na usab kana og mga orange sama sa gipamunga niini sa sinugdanan.”

26 Nahitabo usab, nga atua didto, ang lider sa usa ka dakung . . . ang usa sa atong pinakadakung mga organisasyong pentecostal. Wala ko kahibalo kung unsaon ko ba sa pagsulti niini aron nga masabtan sa tanan nga dili ko gayud ideya nga—nga batok kono ako—ako nianang mga igsoong lalaki, og igsoong babaye; sayup kana. Wala gayud ako mahisabti, ug wala pud ko kahibalo kung ngano. Kita n’yo? Gahunahuna ang mga tawo nga wala kono ko nagatoo nga angay pang manimba ang mga tawo. Kana’y usa ka milyon ka milya nga halayo gayud gikan sa Kamatuoran. “Kinahanglan natong tipunon ang atong mga kaugalingon, ug labi pa gayud pagmakita nato nga nagakahiduol na ang adlaw.” Kita n’yo? Kinahanglan natong magkatigum sa paghiusa. Tingali’g dili kita . . .

27 Kung nagapuyo ako sa usa ka siyudad ug wala sila’y bisan unsa didto gawas sa usa ka . . .bueno, usa ka iglesia (ayaw kong magsulti og unsa man nga ngalan), basta bisan unsa nga iglesia, kung usa ra ka butang ang ilang ginatooan, nga si Jesus Dios, og sayup na ang tanang uban pa, motambong gihapon ko niana nga iglesia. Kung dili man ko makakuha og usa ka tibuok nga tinapay, ako—mokuha lang ako og usa ka hiwa. Kita n’yo? Motambong gihapon ko og maminaw, simbahon ko ang Ginoo, ug ipakita Kaniya nga ginabuhat ko ang akong bahin. Buut kong mahibaloan Niya nga buhi ako. Ako’y—ako’y . . .buut kong mahibaloan sa tanan kung unsa ba ang akong ginadapigan. Makigtigum ako uban sa mga Cristohanon, ug didto magasimba ug—ug alagaron ko ang Ginoo.

28 Apan malisud kaayo, ako’y . . .nakapabalaka kini kanako og ayo kaniadto, ug dayon akong nahibaloan nga bisan ang atong Ginoo wala man usab mahisabti mahitungod sa daghan kaayong mga butang. Pag aduna Siya’y unsa man nga isulti kaniadto, ug sila’y . . .wala kadto mahisabti. Mao nga siguro mamahimong

ingon niana gayud. Apan sila nga mga may kaalam makasabot. Kita n'yo? Mao kana ang giingon sa Biblia. Masabtan nila Kini.

²⁹ Busa niining buntaga samtang ginasulti ko kini. . . Ug miingon ko, “Bueno, sila—nangabuhi sila sa ngalan sa Cristianismo, apan nagapamunga sila og dili mao nga matang sa bunga. Aduna kini og denominasyonhong bunga. Nagbuhathuhathuhat sila og usa ka butang, ug mao kana ang ilang gikinabuhi, samtang nangabuhi tungod sa mismong Kinabuhi.”

³⁰ Mao kini ang gipanguhaan kong isulti kagabii, nga kana nga espiritu mahimong mabautismohan pasulod ngadto sa Espiritu ug dili sa gihapon mamahimong usa ka Cristohanon. Kita n'yo? Nabuhi ka gikan sa mao ra mismong Kinabuhi, apan ang mga bunga nga imong ginapamunga mao ang nagasulti kung unsa ka gayud. Kita n'yo? Tinuod kana. Kita n'yo? Mahimo nila ang tanang mga ilhanan, ug maiampo ang mga may sakit, ug ayohon ang mga may sakit, ug mag-abli og mga mata, ug maghingilin og mga yawa, ug—ug buhaton ang tanan niining mga butanga, og mangabuhi mismo sa mao gihapon nga Kinabuhi nga anaa dinha, apan usa ra gihapon ka lemon. Kita n'yo? Husto kana. “Maila kamo, pinaagi sa mga bunga,” ang ingon ni Jesus. Ug busa kung ingon niana atong mahibaloan . . .

³¹ Ug sa dihang minaug na ko sa entablado, mitindog kadtong bantugan nga lider, ingon siya, “Dili ingon niana ang buut niyang ipasabot.” Ingon pa siya, “Nasayod kitang tanan nga gipangsumbak ra kita.” Bueno, tinuod bitaw nga gisumbak kita, gisumbak ngadto sa sanga, husto kana; apan dili diha sa Punoan, gisumbak. Busa miingon dayon siya . . . misugod na nga medyo—medyo insultohon ako.

³² Ug duna usab og usa ka batan-ong lalaki didto, sa hunahuna ko mora'g paryente siya sa usa ka artista. Danny Henry ang iyang ngalan, ug usa siya ka batan-ong Baptist. Bueno, miduol siya ngadto sa entablado aron agbayan ako, ug ingon siya, “Igsoong Branham, dili unta kini medyo panamastamas, apan,” miingon, “Nagatoo ko nga mao na kana halos ang ika-23 nga kapitulo sa Pinadayag.”

³³ Ug miingon ko, “Salamat.”

³⁴ Ug misugod na siya sa pagsulti og laing butang ug misugod sa pagsulti og laing mga pinulongan, ang maong batan-on nga Baptist. Ug sa pagsulti sa batan-ong lalaki, dunay usa—usa ka babaye nga taga dinhi sa Louisiana, usa siya ka Pranses, medyo tambokon nga babaye, og iyang gisulat ang hubad alang niadto.

³⁵ Bueno, dayon aduna pud og usa pa ka batan-ong lalaki nga nagalingkod didto nga Pranses usab, gisulat pud niya kung unsa'y gisulti sa maong batan-on. Gitandi nila ang maong mga sinulat, ug magkapatrehogayud kadto.

36 Ug dayon may usa ka dakung, lalaki nga pution ang buhok nga nagatindog didto sa may luyo, sa Clifton's Cafeteria, og miduol. Ingon siya, "Puede patan-aw nianang mga sinulat. Gusto ko unta makita kung unsa kana."

37 Ug silang tulo magkapareho gayud og hubad. Siya mao ang maghuhubad para sa U.N., maghuhubad sa Pranses. Ug ingon niini ang gisulti niadto:

Tungod kay gipili mo kining tul-id ug mahiktin nga dalan, ang mas lisod nga dalan, gibuhat mo kini sa kaugalingon mong pagpili. . .

Apan daw sa unsa ka mahimayaong pagdesisyon ang gihimo mo, tungod kay mao kini ang AKONG DALAN.

Kita n'yo? Ug miingon. . .ug nagpadayon ug gisulti ang ingon niini:

Kini, mismo mao ang magpahitabo, ug magahimo, ug magahatud, magpahitabo, sa daku kaayong kadaugan diha Balaanong Gugma.

38 Nakita n'yo, sa kanunay, bisan sa Pranses, nauna ang berbo sa adberbyo dinha sa—sa—sa maong hubad. Busa diha niana dili ko makaingon. . .si Moises, mihimo man og pagpili, gikinahanglan niya nga mopili kaniadto. Kitang tanan usab gikinahanglan natong mopili og buhaton ang pinakamaayo nga atong mahimo. Ug ang Dios. . .ginarespeto ko ang mensahe nga gikawali sa bisan kinsa nga tawo mahitungod sa Dios. Ako. . . bisan unsa man kana, ginarespeto ko kana sa tibuok kong kasingkasing.

39 Karon, nakita ko nga miabot ang usa ka batan-ong igsoong lalaki kaganina, si Igsoong Stringer, nga sa hunahuna ko taga Louisiana. . .o Mississippi, gidalhan niya kami og pipila ka retrato dinhi nga nakita ninyo nga ginatan-aw namo. Mahitungod kini sa Manulonda sa Ginoo, kaniadtong nagpakita Kini. Pila man kaninyo ang nakadungog na sa maong estorya? Sa tan-aw ko mora'g nakadungog na niini ang matag usa kaninyo dinhi. Nadungog n'yo na kini sa teyp, ug uban pa.

40 Bueno, gikasulti kadto kanako usa niadto ka buntag sa alas diyas, samtang nagatindog ako sa akong kuwarto didto sa Indiana. Gikasulti kanako nga moadto kono ko sa Tucson, sa sayo sa buntag, og tangtangon ko ang namilit nga mga amorseko (ang tawag namo niini didto, goat header) gikan sa akong karsones. Ug may pito ka Manulonda nga miabot ug dunay pagbuto, dunay pagbuto sa yuta ug tanang uban pa, ngadto sa. . .nangaligid gud ang mga bato gikan sa kabukiran, ug atua didto ang pito ka Manulonda.

41 Ug miingon ko, "Bueno. . ." Gisultihan ko ang akong asawa, ug ania gani siya dinhi sa kung asa man karong buntaga, "Iandam na ang tanan tungod kay wala gyu'y paagi nga mabuhi

ang usa ka tawo tungod niana,” ang ingon ko, “nga makagawas pa gikan niana. Moadto ako sa Tucson, tapos na ang akong buluhaton dinhi ibabaw sa yuta. Mopauli na ako aron makauban si Ginoong Jesus.”

42 “Bueno,” ingon niya, “sigurado ka ba?”

43 Ingon ko, “Oo. Oo, walay si kinsa man ang puedeng—puedeng mabuhi pa tungod niadto. Wala gayu’y paagi nga mabuhi pa ako tungod niadto.”

44 Bag-ohay ko lang giwali niadto *Ang Pito ka Kapanahonan sa Iglesia*. Mao kadtong tungora usab nga gitawgan ko ang atong maisogon, nga si Igsoong Jack Moore aron pangutan-on siya mahitungod niining, kang Jesus, diha sa Pinadayag 1, nga atua didto nga may puti nga buhok ug tanan na.

45 Ingon ko, “Usa man Siya ka batan-on pa nga Lalaki.” Ug didto miabot ang kapadayagan mahitungod sa peluka Niya, ug dili gyud Siya mismo; nakapeluka Siya (ug wala ko pa kadto mahisabti), ingon nga Labing-hataas nga pagka-Dios. Ug ang mga karaang maghuhukom kaniadto sa Israel, kinahanglan sab magsul-ob og puti nga buhok. Ug ang puti nagakahulogon man og kaputli. Ug ang mga Ingles nga maghuhukom hangtud niining adlaw, sa mga kinatas-ang hukmanan sa Englatera, nagasul-ob man gihapon og puti nga peluka pag mogawas na sila didto, tungod kay wala na’y uban pang balaod nga labaw pa kanila dinhi sa yuta. Kita n’yo? Ug sila ang labing-hataas nga maghuhukom.

46 Ug akong mahinumduman nga miadto ako sa Arizona ug tanan na, naningkamot ko kutob sa akong mahimo nga . . . Halos mamatay na tungod sa kahadlok. Mitambong ko niadto sa panagtigum sa Phoenix. Ug mahinumduman n’yo ba, giwali ko ang sermon nga, *Mga Sir; Unsa Na Kaha Kini Nga Panahon?* Mahinumduman n’yo pa ba kadto? Miingon ko nga nakita ko kadto, ingon ko, “Sa dili pa kini mahitabo, timan-i n’yo, MAO KINI ANG GINAINGON SA GINOO, ‘Adunay butang nga andam nang mahitabo.’” Tingali’g aduna na kamo karon og teyp niini diha sa inyong libraryo sa mga teyp. Ug gisulti ko dinha, “Hinumdumi n’yo karon nga ang mga panan-awon wala pa sukad nagakapakyas. ‘Aduna gyu’y andam nang mahitabo.’ Timan-i n’yo!”

47 Ug pila ka adlaw human niadto, ginanerbiyos ako, ug nakahunahuna ko, “Unsa kaha kini? Mamatay na ba kaha ako? Kung . . . nanghinaut ko nga dali ra unta kini aron human na ko niini dayon. Dili ko gusto nga magdugay pa.”

48 Ug usa niana ka buntag ang Ginoo miingon, “Tumungas ka ngadto sa ibabaw sa Sabino Canyon.”

49 Ug atua ako didto nga ginapataas ang akong mga kamot, samtang nagaampo. Nabati ko nga adunay miabot sa akong

kamot. Usa kadto ka espada. Karon, mahanduraw man ninyo kung unsa kaha ang inyong bation, nga atua didto nga nag-inusara ug anaay sulab sa inyong kamot nga mga *ingon-ana* ka taas. Gipaubos ko kadto ug gitan-aw. Usa mismo kadto ka kutsilyo, usa sa niining. . . makuyawan man gud ko og mga kutsilyo, bisan pa man. Ug aduna kini'y usa—aduna kini'y usa—usa ka metal, nga mora'g sama sa usa niining mga sulab, sama sa pot metal o ingon niana, nga pagkahait kaayo ug mahiktin. Aduna usab og sakuban sa palibot niini *dinhi*, nga ginagamit kaniadto sa mga nagapakigsangka, aron malikayan nga mahiwa ang mga kamot sa usa'g usa, ug—ug adunay mutya ang hawiranan niini dinhi. Eksakto ra gyud nga sibo sa akong kamot. Bueno, gihapuhap ko ang akong nawong ug gitan-aw kadto pag-usab.

Didto mismo sa mao ra nga lugar, niadtong miaging adlaw, nakakita ko og usa ka gamay'ng, puti nga salampati nga mikunsad. Sultihan ko kamo mahitungod niana unya.

⁵⁰ Ug samtang ginagunitan ko kadto sa akong kamot, nakahunahuna ko, “Pagkatalagsaon niini. Karon, Ginoo, ako. . . nawad-an na ba ko sa akong hustong pangisip? Wala ma'y si bisan kinsa dinhi. Minilya ang akong kalay-on gikan sa kang kinsa man ug ania'y usa ka espada. Gipataas ko lang ang akong kamot, ug asa ba kini gikan?” Ug nakahunahuna ko, “Pagkatalagsaon gayud niini nga butang. Karon ania, kining usa ka espada.” Kita n'yo, gihapak ko kadto, ug usa gyud kadto ka espada. Ug ingon pa ko, “Wala gyu'y si kinsa man nga ania dinhi. Ania ako sa ibabaw niining mga bato, sa ibabaw mismo sa bukid.” Ug dili mo na gani makita ang Tucson gikan didto, halayo na kaayo kadto.

⁵¹ Nakahunahuna ko, “Bueno, pagkatalagsaon niini nga butang. Karon, siguradong ania ra mismo sa kon asa man sa palibot dinhi, ang Usa nga puedeng molalang ug maghimo niining espada, ug ibutang kini sa akong kamot.” Ingon ko, “Mamahimong ang Dios mismo kini nga naglalang og usa ka laking-karnero para kang Abraham kaniadto, og naglalang usab niadtong mga squirrel,” nga nadungog na ninyo. Ug ingon ko, “Ania ang materyales, tulo ka nagkalainlaing matang sa materyales niini, ug ginagunitan ko mismo kini sa ingon ka tinuod gayud sama sa unsa pa mang butang nga mahimo nakong gunitan sa akong kamot.”

⁵² Ug nadungog ko ang usa ka Tingog, nga miingon, “Mao kana ang Espada sa Hari!”

⁵³ Ug nahunahuna ko, “Karon, asa ba kaha Kana gikan? Gikan siguro nianang mga bato sa kon asa man.” Ug gigunitan ko kadto sa akong kamot nga nakaingon *niana*, ug miingon ko, “Espada sa usa ka hari.” Ug pagtan-aw ko sa palibot, ug nawala na ang espada. Ug ingon ko, “Espada sa usa ka hari.” Kana'y para sa. . .

ginahatagan nila kaniadto og titulo ang usa ka tawo ingon nga kabalyero pinaagi—pinaagi sa usa ka espada, mora'g husto kana, sa mga kasundalohan o unsa man, ginatanyagan nila sila og titulo ingon nga kabalyero pinaagi niana, kabalo mo. Ug ingon ko, “Bueno, para tingali kana sa ingon niana. Siguro ang buut ipasabot niini nga basin pagapandongan ko sa akong mga kamot ang mga ministro, o mora'g ingon, niana, aron mamahimo sila nga mga ministro.” Ug dayon ako . . .

⁵⁴ Misulti pag-usab ang Tingog, miingon, “*Ang Espada sa mismong Hari!*” Dili nga *usa ka* hari; kondili *ang* espada mismo sa Hari! Kita n'yo?

⁵⁵ Nakahunahuna na pud ko, “Karon, basin nawala na ako sa akong kaugalingon, nawad-an na sa husto kong pangisip, o kaha aduna lang gyu'y nagakahitabo, aduna gyud siguro'y nagatindog dinhi tupad nako.”

⁵⁶ Ug mga igsoon, tinuod gyud kining mga butanga. Wala ko—wala ko kabalo kung unsaon ko sa pagsulti kaninyo, pero kanunay na man ninyo kining nasaksihan nga nagakahitabo sa ingon niana mismo nga paagi. Ug kini'y . . .wala ko makasabot niini. Tungod . . .Pagkatalagsaon gyud kadto nga pagbati.

⁵⁷ Ug nagtindog ako didto. Nahunahuna ko, “Karon, kon si Kinsa man ang nagapakigsulti kanako sa tibukong kinabuhi, sukad niadtong usa pa ako ka gamay'ng, batang lalaki, ania na usab Siya dinhi, ug dili ko man lang Siya makita.” Ingon ko, “*Ang Espada sa Hari?*” Busa mamahimong . . .ang Dios ra *ang* Hari. “Ug unsa man kini nga espada?”

⁵⁸ “Ang Pulong, og gipahimutang Kini diha sa imong kamot.” Miingon, “Ayaw'g kahadlok og kamatayon, ang imoha kining ministerio.”

⁵⁹ Oh, grabe! Minaug ako dayon gikan niadto nga bukid, nga nagahilak, nagingingit sa makusog kong tingog, og nagalukso ibabaw sa kabatoan. Milugsong ako, gisultihan ko ang akong asawa, ingon ko, “Dili pa diay ko mamatay, kita mo, kini'y—kini'y—ang ako kining ministerio.” (Gisultihan ko siya niadto nga moanhi dinhi uban si Billy Paul, ug dalhon ang mga bata. Ingon ko, “Karon, wala ako'y bisan unsa, apan siguradohon man sa iglesia nga dili kamo magutman ug mga ingon-anang butang, ug akong—tagboon ko kamo didto sa tabok sa utlanan.”) Ug—ug siya . . .ingon ko, “Dili, dili pa ko mamatay, butang kini mahitungod sa akong ministerio.”

⁶⁰ Pila ka adlaw human niadto mogawas na ako gikan sa usa ka panagtigum kaniadto; nakadawat ko og tulo ka panid nga telegrama, nga gikan pa didto sa Houston, Texas. Ug kadtong tawo nga nagsaway og ayo kanako niadtong gabii nga naretratohan ang Manulonda sa Ginoo, ang hulagway Niini nga naretratohan didto sa Houston, gitawgan ako sa maong tawo, ingon niya . . .gipadalhan ko og usa ka telegrama, nga

ang ingon sa akong asawa, “Nasayod ko, Igsoong Branham, nga okupado na ka. Ang akong anak (nga anak nga lalaki sa igsoong babaye ni Ted Kipperman) nakalaray na ngadto sa kamatayon og pagapatyon pinaagi sa electric chair.” Miingon. . . (Unsa kaha kung si Billy Paul kadto?) Ingon niya, “Siya ug ang usa ka batan-ong babaye siguradong pagapatyon na.” Ug nabasa man ninyong tanan kini diha sa mantalaan, siyempre. Ug miingon, “Ang among bugtong paglaum na lang nga moanhi ka ug magpahigayon og usa ka panagtigum ug hiusahon ang mga tawo.”

⁶¹ Ug makadaghang higayon na usab kong gipadalhan og sulat ni Raymond Hoekstra, apan kabalo mo, nakaplano na man gud ko nga human niadto nga panagtigum mobiyahe ako para sa usa ka pagpangayam kauban sila ni Mr. Mc Anally. Ug nahunahuna ko, “Bueno, kung pasagdan ko lang nga mamatay kadtong mga batan-on ug wala man lang ko’y himoon nga pagpaningkamot nan basin dili na ko makapangayam pag-usab.”

⁶² Busa miingon ko, “Sige, moadto ako.” Miadto ko sa Houston, nagpahigayon og panagtigum, ug siyempre ang. . .wala ra nila gipatay ang maong mga batan-on, ila lamang. . .ilang gisentensiyahan sila og pagkabilanggo sa hataas nga panahon. Ug ingon niadto man gyud ang gusto nilang buhaton sa maong mga batan-on, nga sentensiyahan lang sila og pagkabilanggo sa hataas nga panahon. Ug mga baynte-uno ka tuig na kadto, siguro, didto—didto kini sa Texas.

⁶³ Busa human niadto, ug sa pagbalik ko, mitungas ko sa maong bukid ug kauban ko si Igsoong Fred Sothmann kaniadto. Ania gani siya karon sa kung asa man. Igsoong Fred, asa man ka? Ania ra diay dinhi. Si Igsoong Fred Sothmann, si Igsoong Gene Norman; usa niadto ka adlaw, sa ikaduhang adlaw na nga atua kami didto, mikanaug ang Manulonda sa Ginoo didto mismo sa kampo kon diin kami napahimutang, ug nag-istoryahanay sila kaniadto mahitungod sa ilang mga anak ug sa mga butang nga ilang ginabuhat.

⁶⁴ Milakaw ako ug mibalik didto sa maong bungtod. Ug nakakuha na ko niadto og javelina, ug gisulayan ko na lang nga abogon ang usa pa paingon ngadto kang Igsoong Fred. Ug nakaplagan ko man kon diin nagakaon ang mga baboy’ng-ihalas didto sa kilid sa bungtod, ug ingon ko, “Bueno, karon, sultihan ta ka kung unsay akong buhaton, Igsoong Fred.” Ingon ko, “Bueno, adto ka sa ibabaw niana nga direksyon inig ka buntag.” Mitungas kami didto niadtong pabanagbanag na, mitungas didto ibabaw sa bukid. “Ug adto ka didto inig banagbanag na, moadto pud ko didto sa pikas bahin. Bueno, walay bisan usa nga akong pusilon, apan kung managan man sila paingon niini nga direksyon, nan magpabuto ako sa atubangan nila ug para mamalik sila. Magpili lang ka og daku-daku.”

65 “Sige,” ingon niya.

66 Busa miadto didto si Igsoong Fred. Ug si Igsoong Gene Norman (sa tan-aw ko mora’g wala pa miabot si Igsoong Gene, miabot na ba?), siya’y—atua siya niadto sa pikas pud nga bahin. Daghan man kaninyo ang nakaila kang Gene Norman, ingon nga usa ka suod nga higala sa kadaghanan, og buutan nga igsoon. Ug minaug siya didto sa ubos-ubos pa. Kon diin, didto unta kadtong mga baboy’ng-ihalas, pero wala gyud sila didto niadtong buntaga. Ug nakita nako si Igsoong Fred, miwarawara ko kaniya, mga usa man ka milya ang iyang gilay-on gikan kanako. Bueno, naghunahuna ko, “Asa kaha ang mga baboy’ng-ihalas nangadto?” Miadto ako paingon sa usa ka dakung bung-aw, ug miadto sa ubos, nahunahuna ko, “Tan-awon ko kung asa ba gyud sila.” Hinay-hinay ko nga mitungas pabalik. Igo pa lamang makalabay ang pagbanagbanag sa adlaw, og hinay-hinay na nga nagasubang ang adlaw kaniadto.

67 Milibot ko niadtong daku kaayo nga bung-aw, oh, my, gatasan ug gatasan ka piye, nga dagkung mga bato ang anaa niadtong dakung bung-aw, dagkung mga paril nga bato didto. Ug medyo hinay-hinay nang . . .nagasubang ang adlaw kaniadto, mga alas siete na ang takna, siguro, o mora’g ingon niana. Ug milingkod ako ug mitan-aw ko sa palibot, og nahitabo nga nakatan-aw ko sa akong karsones ug may nakapilit nga bull-header, nga amorseko. Ug ingon ko, “Abi n’yo, pagkatalagsaon gyud niini. Kabalo mo, ang Manulonda sa Ginoo miingon baya kanako nga maanaa kono ako mga kuwarenta ka milya sa amihanang-sidlakan sa Tucson, og tangtangan ko ang mga namilit nga bull-header gikan sa akong karsones.” Mahinumduman n’yo pa ba kadto? Nahinumduman n’yo ba? Oo, sir. Kita n’yo? Ingon ko, “Pagkatalagsaon niini.” Ginagunitan ko kadto.

68 Ug sa paghangad ko, nakakita ko og mga baynte ka baboy mga lima ka gatus ka yarda ang gilay-on gikan kanako, nga mitungha nga nagakaon niadtong gagmay’ng mga phyllary ug nanghigda pa sila. Ingon ko, “Karon, kung makaduol lang unta ko kang Igsoong Fred ug mapaadto siya didto paingon sa maong direksyon, makakuha gyud siya og baboy didto mismo. Pero kabalo ko nga mga usa o duha ka milya man ang iyang gilay-on gikan kanako karon. Busa,” ingon ko, “kung malatas ko lang kining gamay’ng tagaytay dinhi nga dili sila makakita kanako, paingon dinha tupad sa kahoy’ng juniper,” ingon ko, “kung makaduol ko dinhang dapita, aduna ma’y agianan sa lagsaw dinha dapit, dayon makaadto ra ko paingon didto ug mopalayo na. Ug magbitay ra ko og gamay’ng papel dinhi aron akong mahibaloan kung unsa nga dalan ang agian ko pagawas, sa bung-aw, og aron akong mapaadto si Igsoong Fred didto sa tukma gayud nga oras.”

⁶⁹ Akong gilabay kadtong gagmay'ng bull-header, og nahikalimtan na ang mahitungod Niadto. Ug hinay-hinay kong milatas sa bungtod ug milingi, wala gyud ko nila makit-i, ug midagan ko ug nakadangat didto sa agianan sa lagsaw. Nagsul-ob ko kaniadto og dakung itum nga kalo. Dali-dali ko nga midagan gikan didto sa bung-aw, ug nahitabo kini.

⁷⁰ Nga natay-og ang tibuok yuta, sa tibuok lugar. Nangaligid ang mga bato nga ingon *niana* ka dagku, ang mga abog nangapalid nga ingon *niana*. Ug mitan-aw ako, ug atua nagatindog sa akong atubangan ang pito ka Manulonda; nga eksakto gayud sa kung unsa ang pagkasulti bahin niadto. Nabati ko nga mora ko og naglutaw sa yuta. Una, abi ko og adunay mipusil kanako, kabalo mo, tungod nagsul-ob man ko niadtong itum nga kalo; nga mora na pud og baboy'ng-ihalas kon tan-awon, bisan pa man, kabalo na mo itum baya silang mga baboy'ng-ihalas. Abi gyud nako og dunay mipusil kanako, tungod sa ingon-niadtong. . . haduol kaayo. Ug ako—akong nakita niadtong tungora kung unsa gyud kadto. Bueno, sa dihadiha nga. . . nadawat ko ang maong sugo, nga sumala diha sa Kasulatan, “Ang Pito ka Selyo nga mao ang pito ka misteryo.” Kita n'yo?

⁷¹ Adunay miingon kanako, ingon, “Karon. . .” Oh, ingon siya, “Bueno, karon, ang Ginoo tingali sa umaabot nga adlaw (ingon nga makakita ka og mga panan-awon, Igsoong Branham) pag ipadayag na kanimo kung unsa kining mga butanga, nan mas mapahiduol pa kaming tanan sa Dios ug magkaaduna og labaw pa nga gahum kaysa sa among mabatonan sa pagsulti og laing mga pinulongan ug mga ingon-anang butang.”

⁷² Ingon ko, “Dili mamahimong ingon niana.”

⁷³ Tungod kay, kita n'yo, nagatoo ko nga ang Pulong mao ang Kamatuoran. Ug miingon ang Biblia, “Ang si kinsa man nga magadugang og usa ka pulong o magataktak og usa ka Pulong gikan Niini.” Kinahanglan kini nga sumala gyud niining Pulong. Kita n'yo? Kini mao ang mga misteryo nga wala makit-i sa mga tawo, kay dinha man mismo naggikan ang akong Mensahe mahitungod sa *Binhi sa Serpente* ug ang tinuod nga Pagtoo mahitungod sa kasiguradohan sa usa ka magtotoo.

⁷⁴ Wala ko gikaminosan ang akong mga kaigsoonang Presbyterian, ug pipila kaninyo nga mga kaigsoonang Baptist mahitungod sa inyong paagi sa pagpakabaton og kasiguradohan. Wala ko usab ginasulti kini aron nga mamahimong lahi, apan wala man ninyo kini mahisabti sa insakto gayud. Kita n'yo? Husto kana. Kita n'yo? Ug, basin sayup usab ang pagsabot ko niini. Apan sa diha nga may usa ka Manulonda nga motungha gikan sa Langit ug mosulti na kanimo, ug anaa kana mismo sa Kasulatan, nan tinuod Kana. Kita n'yo? Husto kana. Kita

n'yo, tungod kanunay man Siyang nagasulti nga tukma gayud sa Kasulatan.

⁷⁵ Giobserbahan ko kadto didto hangtud nga mipaitaas na kadtong lingin, hinay-hinay nga mipaitaas, ug nahimo silang mora'g usa ka misteryosong kahayag, og mora'g panganod. Ingon ka eksakto gayud sa kung unsa . . . Pila man kaninyo ang nakakita sa hulagway Niini nga naretratohan didto sa Houston? Halos tanan man diay. Kita n'yo? Bueno, ingon niadto gayud kini. Nahimo kining pareho gihapon niadto, padayon Kining mipaitaas ug mipaitaas pa.

⁷⁶ Midagan ako ug midagan, sa pagpangita kanila Igsoong Fred. Pagkataudtaud, mga tunga sa oras human niadto, nakita ko na siya didto sa may ubos, ginawarawara niya ang iyang mga kamot; ug nagpadulong si Igsoong Gene, nga nagawarawara sab sa iyang kamot. Nasayod sila nga aduna gyu'y nahitabo. Ug pagkahuman niadto nakadangat ra ko sa ilaha. Si Igsoong Fred kana nga nagalingkod *dinha*.

⁷⁷ Samtang mipaitaas kadto, wala ko kahibalo nga ang mga obserbatoryo ug mga ingon-niana, hangtud didto sa Mexico, nagretrato sab diay niadto. Gimantala kini sa *Life* magazine sa diha nga mipaitaas Kini. Ug daghan kaninyo . . . Ania ang *Life* magazine nga nagmantala sa retrato Niini. Usa kono kadto ka misteryoso nga butang, ug ingon nila nga wala kono sila kahibalo kung asa kadto naggikan; tungod habog kaayo kadto. Lagpas na kadto sa tibuok kawanangan ug tanang uban pa nga mahimong . . . Habog na kaayo kadto para sa usa ka panganod, tungod kay traynta ka milya man ang kahabogon niadto ug baynte-siete ka milya ang kalapdon human nga mipaitaas kadto sa ingon-niadto ka habog. Wala na gani og kaumog o unsa man didto sa itaas, nakita n'yo.

⁷⁸ Ug abi pud nila nga tungod kadto sa usa kono ka eroplano; busa gisusi nila ang tanang mga lugar, pero wala man usab og mga eroplano niadtong adlaw. Kita n'yo, gikinahanglan nilang buhaton kadto, tungod sa pag-uyog sa mga bintana ug uban pa. “Wala ma'y mga eroplano sa itaas.” Dinhi niini mismo nga magasin, ginasaysay gihapon kaninyo ang mao rang butang. Ug—ug nagpadayon kadto ug nagpadayon. Ug sa karon diha mismo sa . . .

⁷⁹ Namantala sab sa *Science* magazine, diin, wala kono sila makasabot. Wala sila mahibalo kung unsa gyud Kadto.

⁸⁰ Didto sa unibersidad, sa Tucson, usa ka higala nako ang miadto didto niadtong miaging adlaw ug nakig-istorya kanila mahitungod niini. Ang ingon, “Dili gyud namo masabtan kung unsa . . .”

⁸¹ Ingon ko, “Ayaw na pagsulti og bisan unsa, wala ma'y mahatag nga kaayohan. ‘Ayaw isalibay ang inyong mga mutya

sa atubangan sa mga baboy.” Kita n’yo? Tungod kini’y para lang sa Iglesia, sa mga Pinili, sa mga tinawag-pagawas. Kita n’yo?

⁸² Ug nangduol na dayon ang matag usa, nagaingon, “Igsoong Branham, nakita ko ang imong retrato dinhi. Nakita ko *kini*. Ako. . .” Kabalo na mo kung unsa kana. Apan kanang—kanang hataas nga wanang sama niining ania sa igsoong lalaki dinhi kon diin kini. . . Pasensya na. Ania kung unsa nga hinay-hinay Kining mipaitaas, mikayab. Sa tinuod lang anaa *kini* sa may too nga bahin. Ug mahinumduman man ninyo nga miingon ko, “Ang talagsaon gayud nga Manulonda nga nakigsulti kanako kaniadto, anaa sa may tuo nga bahin,” bisan niadtong wala pa kini mahitabo. Mahinumduman n’yo ba? Ang Iyang mga pako nakabukhad nga ingon *niana*. Ingon niana mismo ang mga pako sa maong Manulonda samtang mipaitaas kadto. Kita n’yo, samtang kini. . . Mao nga misugod silang nagakuha og mga retrato tungod sa pagka-misteryoso niadto. Apan ang ulahing retrato, sa dihang naporma Kadto Mismo diha sa kawanangan ug uban pa, ingon niana kini sumala mismo sa gimantala dinhi sa *Look*. Makita ninyo kung giunsa pagkayab niadto sa diha nga hinay-hinay nilang nakita kadto, nakita n’yo. Ug mao kini ang—ang pinaka ug ulahi nga retrato, sa dihang naporma na kadto.

⁸³ Wala sila mahibalo kung asa kadto naggikan o kung asa kaha kadto mipaingon, wala pa sila mahibalo hangtud karon. Bug-os gayud nga dili-makatubag ang siyensiya mahitungod niadto, og wala mahibalo kung unsa gyu’y nahitabo. Apan nasayod kita: “Magkaaduna og mga ilhanan ibabaw sa langit.” Nasayod kita niana. Kita n’yo? Ug gisaad man Niya kining mga butanga. Kita n’yo? Ug ang importanteng butang nga gikatugotan kining maretratohan. . .

⁸⁴ Karon, kahibalo ko nga usa lang kita ka pamilya dinhi karong buntaga. Kung nahimo ko man kamo nga mga igsoong lalaki o mga igsoong babaye nga maghunahuna ingon nga nahibalo-ko-sa-tanan-niini, nan pasayloa ko ninyo. Wala ko ginatuyo nga mahimong ingon niana. Ania ako. . . ania ko dinhi niining buntaga nga nagapakigsulti sa atubangan sa mga tawo nga mga eskolar, sa mga tawo nga utokan; ako—ako’y usa ra ka walay kahibalo, dili gani nako malitok ug husto ang akong mga Kasulatan. Ngani adunay usa ka kapitulo nga akong basahon niining buntaga, ako’y. . . hangyoon ko pa ang usa sa mga igsoong lalaki dinhi nga basahon kini para kanako, tungod dili man nako malitok ang mga ngalan nga anaa dinha, sa Unang Mga Cronicas 13, (kung mahimo, Igsoong Jack, mahimo mo na kining pangitaon), para sa akong hilisgotanan. Ako—dili ko man gud malitok ang maong mga ngalan, mao nga tugotan ko lang siya nga basahon kana, tungod kay malitok man niya ang mga niana.

⁸⁵ Ug nasayod ko nga nagapakigsulti ako sa maantigo nga mga tawo. Apan, mga kaigsoonan, nangahitabo kining mga

butanga aron nga dili kamo motan-aw sa akong pagkawalay-kahibalo, kondili aron motoo kamo nga ginasulti ko kaninyo ang Kamatuoran. Ang Dios kini nga nagasulti kaninyo sa Kamatuoran. Mao kana ang Kamatuoran. Kita n'yo?

⁸⁶ Karon, ug sa dihang nagahisgot ako mahitungod sa mga denominasyon, wala baya nako ginatuyo nga mahimong mabagison kaninyo ug . . . Wala, wala ko ginapasabot nga dili na kamo manambong sa inyong iglesia. Panambong gihapon mo sa inyong iglesia, mao kana'y angay ninyong buhaton. Apan ayaw lang mo pagpamiyembro nianang mga organisasyon, tungod kay isulti ko ra kaninyo usa ka adlaw ug pamatud-an kana pinaagi sa Kasulatan, nga kana mao ang marka sa mapintas nga mananap. Ug timan-i lang ninyo, mao kana ang marka.

⁸⁷ Nagawali ko . . . dili ko kini iwali sa simbahan ni Igsoong Jack, nga iya kong sultihan, "Padayon lang ug iwali kana"; kondili iwali ko kini ngadto sa tabernakulo, halos upat pud ka oras ang katas-on niini. Ug ang akong hilisgotanan mao, "Ang mapintas nga mananap sa sinugdanan ug ang mapintas nga mananap sa katapusan, subay sa agi sa serpente." Kita n'yo? Modangat kana og halos upat ka oras. Nahan-ay ko na ang tanang Kasulatan. Ang mapintas nga mananap gikan sa sinugdanan, siya mao ang mapintas nga mananap didto sa tanaman sa Eden kaniadto, siya mao gihapon ang mapintas nga mananap sa katapusan, ug ipakita ko usab nga siya'y usa ka relihiyoso nga tawo ug usa ka denominasyon (nga mao'y nagmugna og denominasyon); ug misubay mismo sa agianan niini, ug pamatud-an pud kini kaninyo pinaagi sa mga Kasulatan nga mao gyud kana. Wala ako mahibalo niini hangtud nga gihatag kini kanako sa Balaang Espiritu didto niadtong miaging adlaw lang.

⁸⁸ Bueno, kini, gitan-aw ko kini usa niadto ka adlaw, samtang nagatindog, ug Adunay miingon kanako . . . gitan-aw kini, ug nahunahuna ko . . . si Igsoong Hickerson, nga usa sa akong mga tinugyanan . . . o mga diyakono didto sa simbahan sa Jeffersonville . . . Kung wala ko nagatoo sa pagtambong og simbahan, nan nganong aduna man ko'y simbahan? Aduna man gani og mga tawo sa tibuok nasud, ang nakakonekta niadtong miaging gabii, sa matag duha ka gatus ka milya aduna ko'y usa ka simbahan.

⁸⁹ Karon, kini—kining retrato, nagtindog ko kaniadto, samtang nagtan-aw niini, ug Adunay . . . nagatindog ko niadto sulod sa akong kuwarto. Adunay miingon, "Lisoa kini pa-tuo." Naminaw sab ko.

⁹⁰ Kahibalo ko nga mora'g adunay sakit sa pangisip ang usa ka tawong nagasulti niana, apan, nakita n'yo, sumala sa akong gikaingon niadtong miaging gabii, nga ang tanan niining dagkung mga butang ingon gayud ka makinaadmanon . . .

Bueno, dili man ko batok niana. Hinumdumi n'yo, kinahanglan man sab natong paeskwelahon ang atong mga anak aron makabaton og edukasyon ug uban pa, apan sultihan ko kamo karon mismo, nga wala kana'y mahatag nga kaayohan kanila sa kalibutan nga umalabot, tungod kay lahi na man kana nga sibilisasyon, og labaw ra kaayo kaysa niining ania karon. Kana nga sibilisasyon wala na gayu'y unsa man... Wala na kana'y unsa man nga tulonghaan, wala na'y unsa man nga kamatayon, wala na'y unsa man nga sala. Kining ania karon aduna pa nianang tanan; mao nga bisan unsa pa kita ka nahimong sibilisado, nagkadaghan ug mas nagkadaghan pa hinoon ang kamatayon sa tanang higayon. Kita n'yo? Pero diha nianang usa nga umalabot wala na'y kamatayon dinha. Apan sa karon kinahanglan pa natong magkaaduna og tulonghaan, kinahanglan pa natong magsul-ob og sinina, kita...

⁹¹ Hisgotan ko man unta niining buntaga ang mahitungod sa *Eden ni Satanas* (daghan kaninyo ang aduna na og teyp bahin nianang), *Eden ni Satanas*. Naghimo man siya og lahi nga tanaman sa Eden, ug unom pud ka libo ka tuig ang gigahin niya sa paghimo niini, sama ra sa gigahin sa Dios sa pagbuhat sa Iyang tanaman sa sinugdanan kaniadto. Nagbuhat ang Dios og Iyang Eden, ug gihugawan kadto ni Satanas. Karon naghimo pud si Satanas og kaugalingon niyang Eden, ug pagalaglagon ra kana sa Dios (tinuod kana) ug pagatukoron ang Iyaha Mismo.

Adunay miingon kanako, "Lisoa kini pa-tuo."

Nakahunahuna ko, "Husto man siguro ang akong pagtan-aw niini."

Miingon, "Lisoa kini pa-tuo." Kita n'yo?

⁹² Nakahunahuna na pud ko, "Siguro ang buut ipasabot sa Tingog nga lisoan ko kini *paingon* sa tuo." Ug sa dihang giliso na nako, makita ninyo kung unsa kini: ang sa kang Hofmann nga drowing nga *Ulo ni Cristo*, sa edad nga traynta'y-tres. Dinhi, pag tan-awon n'yo dinhi, makita n'yo ang Iyang itum nga balbas, ang Iyang nawong, ang Iyang mga mata, ang Iyang ilong, ug tanan nang uban pa. Makita pud ninyo ang bahin sa Iyang buhok dinhi paitaas. Ug naka-peluka Siya og puti nga peluka sa Manulonda aron ipakita nga ang Mensahe mahitungod Kaniya ingon nga Dios mao gyud ang Kamatuoran. Siya mao ang Labing-hataas nga Maghuhukom sa kalibutan, ang Labing-hataas nga Maghuhukom sa Langit ug sa yuta. Siya mao ang Dios, ug wala na'y uban pa kondili ang Dios mismo. Siya ang Dios nga nadayag sa pormang tawo nga gitawag og Anak sa Dios, diin ang Anak mao ang Tawo. Ug nagapakita kana nga ang atong Mensahe ingon gayud ka tukma: nga gipaila pinaagi sa Kasulatan, gipaila diha sa buluhaton, gipaila pinaagi sa Iyang Presensiya, nga mao sa gihapon kagahapon, karon, ug hangtud sa kahangturan. Busa ang Pito ka Mga Selyo mao ang

Kamatuoran, mga igsoon. Mahimong dili kamo mouyon niana, apan paglingkod lang mo ug tun-i n'yo kana nga dunay abli nga kasingkasing usa ka higayon, tugoti lamang ang Balaang Espiritu nga pangunahan kamo gikan sa . . .

⁹³ Dinhi, kaniadtong si Igsoong Jack . . . gitawgan ko man siya sa wala ko pa kini giwali ug nakig-istorya ko kaniya usa niadto ka higayon mahitungod sa “Unsa ba kining puti nga peluka?”

⁹⁴ Ingon siya, “Bueno, Igsoong Branham, ginapahayag ko nga diha na Siya sa Iyang . . . human sa Iyang pagkabanhaw nga anaa na Siya sa Iyang gihimayang lawas.” Nakig-istorya ko niadto kang Igsoong Jack. Ug adunay . . . wala na’y si kinsa man nga akong nailhan sa kalibutan nga akong masaligan bahin sa ilang mga pagpanudlo mahitungod sa teolohiya ug mga ingon-anang butang sama sa akong pagsalig kang Igsoong Jack Moore ug Igsoong Vayle, ug ang mga lalaki nga sama—sama nila, tinuod gyud nga mga teologo nga nakabasa na og tanang matang sa mga basahon ug nagkalainlaing mga panghunahuna mahatungod sa bisan unsang butang. Bueno, apan, nakita n'yo, bisan pa niana, nga sila’y suod kong higala, ako—ako—dili ko gayud basta na lang madawat kadto, aduna gyu’y sa kung unsa man nga dili ko mahimong dawaton.

⁹⁵ Ug dayon sa dihang mitungha, kini, ako nang nakita niadtong tungora kung unsa gyud kini. Ania ang itum Niyang balbas. Makita man ninyo Kini, siguro. Kita n'yo ba? Ang Iyang itum nga balbas ug itum nga buhok, ang Iyang mga mata, ilong, og tanan na, nga ingon gayud ka tukma, ug bisan ang bahin sa Iyang buhok nga nakadunghay dinhi sa kilid. Siya mao ang Dios! Kita n'yo? Ug Siya mao sa gihapon kagahapon, karon, ug hangtud sa kahangturan. Ug kini mao ang *Look* magazine . . . o *Life* magazine. Sa hunahuna ko mao kini ang . . . nakalimot ko kung unsa na kini nga edisyon karon; oh, ikadise-siete sa Mayo, 1963 diay. Mao kadto ang higayon nga namantala kini, kung aduna ma’y si bisan kinsa nga ganahan sa maong magasin. Mao ra kini nga edisyon diin anaa pud si Rockefeller ug iyang—iyang asawa sa luyo nga bahin sa maong retrato. Ug mao pud kini ang bag-ong *Science* magazine nga nagaingon “kini’y usa gihapon ka misteryo hangtud karon.”

⁹⁶ Para sa unsa ba nga ginasulti ko kining mga butanga? Aron nga makahatag kini kaninyo og diyutay’ng ideya mahitungod sa mga butang nga gipanguhaan namong isulti, nga ginapaila kini sa Dios pareho diha sa kalangitan ug sa yuta nga husto kini. Kining mga pagpang-ila, mga panan-awon, aduna na kita’y daghang mga pagsundog-sundog niini, sa kanunay. Apan hinumdumi n'yo, nga sa dili pa magkaaduna og usa ka mini nga dolyar, kinahanglan aduna una og usa ka tinuod nga dolyar; kinahanglan aduna gyud una og usa ka tinuod nga dolyar, ug awaton na dayon kana. Sama lang kaniadto nga adunay usa ka tinuod nga Moises ug usa ka tinuod nga Aaron, dayon

nagkaaduna usab og usa ka Jambres ug Jannes nga nagsundog-sundog kanila. Nakita n'yo na kung unsa nga nagakahitabo kining tanan? Pag makita nila kana ug paninguhaon na dayon nilang sundogon kana, kon adunay tinuod og *usa* ka orihinal. Husto kana. Wala ko kini ginasulti para makapasakit o para magpakaulaw, o isayup pagkahimutang ang usa ka butang, kondili para lang gayud sa Kamatuoran; aron ipahibalo nga ako. . .

⁹⁷ Nagakatigulang na ko, ug nasayod ko nga dili na ingon nga magdugay pa ang akong oras. Kung maglangay pa, si Jesus, tingali ako . . . makapabilin pa sa hamubong panahon; apan nasayod man ko nga sa umaabot nga adlaw magapitik kining kasingkasing ko sa kaulahiang pagpitik niini, ug mosulod na ako sa usa ka dakung, mangitngit nga lawak dinha nga gitawag og kamatayon. Apan pagmahitabo na kana, dili ko gusto nga dunay unsa mang butang nga kinahanglan ko pang balikan, aron hinulsolan. Ginatinguha ko, sa dihang modangat na ko nianang orasa, nga mamahimo kong limpyo ug putli pinaagi sa grasya sa Dios. Gusto kong maputos ang akong kaugalingon sa mga kupo sa Iyang pagkamatarung, pagmosulod na ako dinha, nga aduna niining usa ka butang sa akong hunahuna: maila ko Siya sa gahum sa Iyang pagkabanhaw; ug sa dihang manawag na Siya, mobangon ako gikan sa mga patay ug magkinabuhi na uban Kaniya hangtud sa kahangturan. Ug mao kini ang katuyoan ko dinhi karon ang paningkamotan nga aghaton ang matag tawo. . . dili aron bag-ohon ang inyong mga teolohiya o unsa man, kondili aron nga mapalambo ang inyong pagtoo sa saad sa Dios alang niining adlaw.

Karon mag-ampo kita:

⁹⁸ Minahal nga Dios, usa kami ka mapasalamaton nga mga tawo karong buntaga, bisan pa man, Ginoo, nga nagapuyo kami sa usa ka mangitngit nga kalibutan nga. . . Wala ni usa kanamo nga ania karong buntaga, Amahan, ang wala nagabati og tinguha nga kami—nga kami mas mapahiduol pa Kanimo, kondili ginatinguha gyud namo kanang—kanang paghikap Mo sa among mga kinabuhi nga makapahumok kanamo ug makapahimo kanamo nga malumo aron nga mahimo Mo kaming bag-ohon sa unsa mang orasa, hulmaha kami nga mamahimong mga anak nga lalaki ug mga anak nga babaye sa Dios. Kana—mao kana ang among katuyoan dinhi, Amahan, kana'y—mao kana'y akong bugtong tinguha ang—ang magkinabuhi sa atubangan Mo ug dawaton ang Imong Pulong ug ipamulong Kini ngadto sa mga kalalaken-an ug mga kababayen-an nga. . . dili aron nga mahimong lahi nga tawo kondili aron nga tinguhaong pasidungan Siya nga naghatag kanako og Kinabuhi. Itugot kini, Ginoo.

⁹⁹ Hinaut nga wala na'y usa ka tawong ania karong adlaw. . . O—o kung. . . Nakakonekta na usab kami niining buntaga, sa

tibuok nasud. Hinaut nga walay usa ka tawo nga nakadungog na sa among tingog ang kinahanglang mosulod nianang dakung lawak nga wala makaila Kanimo sa gahum sa Imong pagkabanhaw. Kung aduna ma'y mga makasasala sa bisan asa man sa tibuok nasud, nga . . . o sa sulod niining bilding, niining dakung awditoryum, nga ania dinhi karong buntaga. Kung aduna ma'y mga wala pa nakaila Kanimo, hinaut nga mao na kini ang adlaw nga ang ilang konsensiya mangauyog, og mahigmata, ug aron maamgo nila nga wala gyud diay sila masayod kung unsang orasa kami mahimong tawgon o ipatawag aron papanubagon sa among mga kinabuhi, ngadto sa Kahitasan. Ug kung ang among ngalan anaa pa gihapon sa basahon nga anaa sa lindog, siguradong pagahukman gyud kami; apan kung anaa kini sa Basahon sa Kinabuhi nga iya sa Cordero, ang tinuod nga Kinabuhi, nan luwas kami.

¹⁰⁰ Ug hinaut, Ginoo, sa diha nga nagaagi ang Kinabuhi gikan sa dahon paingon sa pollen, paingon sa tipaka, dayon paingon sa lugas, samtang nagaagi sab kami niining buntaga kung aduna ma'y usa ka Kinabuhi nga nagapaingon sa lugas nga anaa pa dinha nianang lindog, nan ipahigawas kana karong adlaw, Ginoo, og hinaut nga monunot kana sa paglihok sa lugas, kay amo kining ginapangamuyo sa Ngalan ni Jesus. Amen.

¹⁰¹ Pasensya na kon nakagahin ako og dakung oras. Gani nakalimtan ko nga inoras nga nakasibya diay kini sa radyo, og naka-oras ang pagkonekta niini sa telepono.

¹⁰² Karon moadto na kita para sa atong pagbasa. Ug Igsoong Jack, naandam mo na ba ang imong Biblia dinha? Samtang duna ko'y ginapangita nga Kasulatan, hangyoon sa nako si Igsoong Jack nga basahon kini nga Kasulatan tungod kay dili man gud nako malitok kini nga mga ngalan. Sige. Anaa kini sa Unang Mga Cronicas 13. [Nagaingon si Igsoong Jack Moore, "Ang tibuok kapitulo ba?"—Ed.] Uh-huh.

[Ug si David nagpakitambag sa mga capitan sa mga linibo ug tinaggatus, bisan uban sa tagsatagsa ka pangulo.]

[Ug si David miingon sa tibuok katilingban sa Israel, Kung daw maayo kaninyo, ug kung gikan sa GINOO nga atong Dios, pasugoan nato bisan diin ngadto sa kaigsoonan nato, nga nahabilin sa tibuok yuta sa Israel, nga giubanan sa mga sacerdote ug mga Levihanon nga anaa sa ilang mga ciudad nga may mga sibsibanan, aron sila makighiusa kanato:]

[Ug atong dad-on pag-usab ang Arca sa atong Dios kanato: kay wala nato—nato pangitaa kana sa mga adlaw ni Saul.]

[Ug ang tibuok katilingban namulong nga ilang himoon kini: kay ang butang matarung man sa mga mata sa tibuok katawohan.]

[Busa gitigum pagtingub ni David ang tibuok Israel, gikan sa Sihor sa Egipto bisan ngadto sa pagsulod sa Hamath, sa pagdala sa arca sa Dios gikan sa Chiriath-jearim.]

[Ug si David mitungas, ug ang tibuok Israel, ngadto sa Baala, nga mao, ang Chiriath-jearim, nga sakup sa Juda, aron sa pagdala gikan didto sa arca sa Dios nga GINOO, nga nagapahiluna ibabaw sa querubin, nga gitawag pinaagi sa ngalan.]

[Ug ilang gitungtong ang arca sa Dios sa usa ka bag-ong carro ug gipagula kini gikan sa balay ni Abinadab: ug si Uzza ug si Ahio ang nanagguyod—nanagguyod sa carro.]

[Ug si David ug ang tibuok Israel nanagkalipay sa atubangan sa Dios sa tibuok nilang kusog, bisan uban sa mga awit, ug mga alpa, ug mga kinuldasan nga tulonggon, ug mga gagmay'ng tambor, ug mga piyangpiyang, ug mga trumpeta.]

[Ug sa diha nga sila nahiabot sa giukan sa Chidon, giisa ni Uzza ang iyang kamot aron sa pagsagang sa arca; kay ang mga vaca nanghidugmo.]

[Ug ang kasuko sa GINOO misilaub batok kang Uzza, ug iyang gihampak siya, ug tungod kay iyang giisa ang iyang kamot ngadto sa arca: ug didto siya namatay sa atubangan sa ginoo.]

[Ug si David nasuko, tungod kay ang GINOO nayugot kang Uzza: ug iyang gitawag kanang dapita nga Peresuzang hangtud niining adlaw.]

[Ug si David nahadlok sa Dios niadtong adlaw, nga nagaingon, Unsaon nako sa pagdala ang arca sa Dios pauli sa balay?]

[Busa wala balhina ni David ang arca sa Dios ngadto kaniya ngadto sa ciudad ni David, apan gidala kini ngadto sa balay ni Obed-edom ang Getehanon.]

[Ug ang arca sa Dios nahabilin uban sa panimalay ni Obed—Obed-edom sa iyang balay tutulo sa ka bulan. Ug gipanalanginan sa GINOO ang balay ni Obed-edom, ug ang tanan nga diha kaniya.]

¹⁰³ Salamat, Igsoong Moore, sa pagbasa sa Kasulatan para kanako. Bueno, pasensya na kon dili ko kana mabasa mismo, tungod ako—dili gyud nako mahimo kana.

104 Karon gusto kong mopakli kamo uban kanako sa Marcos 7:7, ug atong basahon ang unang pito ka bersekulo sa San Marcos sa ika-7 nga kapitulo.

Ug nanagtigum kaniya ang mga Fariseo, ug ang uban sa mga escriba, nga nangabot gikan sa Jerusalem.

Ug hingkit-an niya ang uban sa iyang mga tinun-an nga nagakaon sa tinapay nga hugaw'g mga kamot, sa ato pa, wala makapanghunaw, nakakaplag sila og sayup.

Apan ang mga Fariseo, ug ang tanang mga Judio, kung dili sila manghunaw usa sa ilang mga kamot. . . dili mokaon agi'g pagbantay—pagbantay sa gikabilinbiling kalagdaan sa mga anciano.

Ug inig abot nila gikan sa tiyanggihan, dili sila mokaon, gawas kon manghugas una sa ilang kaugalingon. Ug daghan pang mga butang nga—nga ilang. . . nga nadawat nila sa. . . nga nadawat aron pagabantayan, . . . ang paghugas sa mga copa, ug sa mga saro, ug sa tumbaga nga mga galamiton, ug sa mga higdaanan.

Unya nanagpangutana kaniya ang mga Fariseo ug mga escriba, Nganong wala managgawi ang imong mga tinun-an sumala sa gikabilinbiling nga kalagdaan sa mga anciano, kondili nangaon man hinoon sila sa tinapay nga hugaw'g kamot?

Siya miingon kanila, Igo gayud ang gitagna ni Isaias mahatungod kaninyo mga salingkapaw, ingon nga nahasulat na, Kining mga tawhana nagapasideungog kanako pinaagi sa ilang mga ngabil, apan halayo kanako ang ilang kasingkasing.

Apan kawang lamang ang ilang pagsimba kanako, sanglit sa ilang pagpanudlo ila mang gipaka-doktrina ang kalagdaan nga hinimo lamang sa mga tawo.

Mag-ampo kita.

105 Minahal nga Dios, pasidunggi ang Imong Pulong karon, ug hinaut nga matuman Niini kung unsa'y katuyoan Niini. Gamita kami ingon nga mga instrumento sa pagpamulong Niini, ug ang among mga igdulogog aron sa pagpatalinghug Kanim, ug ang among mga kasingkasing usab aron sa pagdawat Niini. Nagapangamuyo kami sa Ngalan ni Jesus, og alang sa kahimayaan sa Dios. Amen.

106 Karon, mao kini ang akong hilisgotanan sa pipila ka gutlo. . . ako. . .

107 Nakakonekta kita sa telepono sa tibuok nasud karong buntaga. Ug hingsayran ko nga ang buutan kong higala, nga si Roy Borders, nagapaminaw sab karon, og medyo naguol gayud bahin niadtong kagabii. Nakalimot ko nga napasibya diay kita

sa radyo. . . o sa niini nga koneksyon kagabii. Roy, kon asa ka man, kung anaa ka man sa simbahan dinha sa San Jose, o kaha anaa dinha sa simbahan ni Igsoong McHughes, o kon asa ka man, ayaw'g kahadlok, igsoon ko, okey ra lagi ang tanan. Basta, relaks lang. . . ipahibalo ra Niya kini kanako, Roy; ayaw'g kabalaka, iho, magmaaduna ka og pagtoo sa Dios.

¹⁰⁸ Ang akong hilisgotanan niining buntaga mao ang: *Nagasulay Sa Pagbuhat Og Buluhaton Sa Dios Nga Wala Sa Kabubut-on Sa Dios*. Bueno, usa kini ka talagsaon nga teksto, ug nagasalig ko nga igapadayag kini sa Ginoo kanato karon. Hinumdumi, “Nagasulay sa pagbuhat og buluhaton sa Dios nga wala sa kabubut-on sa Dios.” Bueno, daw sa talagsaon kana kaayo. Apan, bahin niini, tingali'g tabangan ra kita sa Dios.

¹⁰⁹ Ang usa pa ka butang nga buut kong isulti, malipayon kita nga makauban nato dinhi sa atong taliwala ang usa nako ka higala, usa gayud ka suod ko nga higala, usa ka batan-on pa nga lalaki. Daghan kaninyo nga nagapaminaw sa radyo karon ang, o nga, nga nakakonekta sa telepono, ang nakaila kung si kinsa kini. Adlaw'ng-natawhan niya karon, nubenta'y-tres anyos na, si Igsoong Bill Dauch nga nagalingkod dinhi sa akong atubangan, nubenta'y-tres anyos na siya.

¹¹⁰ Pipila na ka tuig ang milabay niadtong miingon ang doktor, “Dili na siya mabuhi.” Bag-o ko lang namatikdan nga ania diay siya karon. Napahimutang na siya sa oxygen tent kaniadto, ug gitawgan ako sa buutan niyang asawa ug miingon, “Igsoong Branham, kung nagalaum ka pa nga makita ang suod mong higala, si Bill, nga buhi pa, mas maayo nga moanhi ka na sa gilayon.”

¹¹¹ Ug ako. . . Mibuto pa gyud ang usa sa akong mga ligid sa may kilid, dugay na man gud nga nahilis ang maong ligid, ug mao nga mibuto ang usa ka ligid sa akong sakyanan sa pagpaningkamot nga maadtoan siya. Bag-o pa lang ko nga migikan sa usa—usa—usa ka estasyon, estasyon sa gasolinahan, ug migawas gikan sa kasilyas kon diin ako mihunong sa Ohio sa pagpaninguha nga maadtoan siya, ug sa paggawas ko nakakita ko ug usa ka panan-awon. Ug atua kono si Igsoong Dauch, nga nagatindog sa simbahan samtang ginatunol ang iyang kamot; pero nausab kadto, ug nakita ta ka nga nagalakaw sa dalan ug gilamano mo ako. Ang ingon sa panan-awon, “Lakaw ug sultihi siya, ‘MAO KINI ANG GINAINGON SA GINOO.’”

¹¹² Siya'y mga nubenta anyos na kaniadto. Nagkaaduna siya og ataki sa kasingkasing nga may mibara sa iyang kasingkasing, ug bug-os nga pagpalyar sa kasingkasing. Makinaadmanon kaayo ang doktor. Ang maong tawo dili. . . dili niya gustong. . . Dili, dili ko mosulti niana. Usa lamang siya ka tawo nga arang makakuha og kinsa mang doktor nga gusto niya. Aduna siya'y usa ka maayo

kaayo nga Judiong doktor nga mitagbo kanako sa may pasilyo ug miingon, “Wala na gyud siya’y paglaum nga mabuhi pa.”

¹¹³ Ug misulod ako ug gisulod ang akong kamot sa oxygen tent, ingon ko, “Bill, madungog mo ba ako?” Gitando niya ang iyang ulo. Ingon ko, “MAO KINI ANG GINAINGON SA GINOO, ‘Dili ka mamatay karon.’”

¹¹⁴ Usa ka semana gikan niadto, sa dihang mitindog na ko sa pulpito aron iwali ang akong Mensahe, atua si Igsoong Dauch nga nagalakaw na sulod sa bilding. Ug sa dihang miadto pud ko sa Furr’s Restaurant, sa pikas . . . ang buut kong ipasabot nga sa Blue Boar, sa pikas bahin sa Louisville, atua siya nga migawas sa sakyanan, naglakaw sa dalan, og gitunol ang iyang kamot; eksakto gayud nga sumala sa Pulong sa Ginoo. Ug kana’y tulo o upat na ka tuig ang milabay; ug ania siya karon og mianhi gayud dinhi, sa Shreveport (nga gilatas ang nasud, nga wala nag-eroplano ha, kondili nag-sakyanan lang), uh-huh, ania siya nga nagalingkod karong buntaga. “Malipayong adlaw’ng-natawan, Igsoong Dauch.” Gikan kana sa tibuok nasud, sa bisan asa. “Panalanginan ka sa Dios!”

¹¹⁵ Ako siyang gibautismohan kaniadto, gikan sa pagka-Trinitarian, gibautismohan ko siya sa dihang siya . . . sa usa sa pinakauna kong mga panagtigum kaniadto, sa dihang gikinahanglan ni Igsoong Banks Wood nga ipahulam kaniya ang iyang sinina (dakuon man gud siya nga tawo, maingon sa inyong nakita), ug miubog siya sa bautismohanang ug ako siyang gibautismohan sa edad nga mga otsenta’y-singko o nubenta anyos na, sa Ngalan ni Ginoong Jesus. Ingon niya wala pa kono siya sukad-sukad nakabati og husto hangtud nga wala pa niya hingkaplaga ang kasiguradohan sa usa ka butang. Dayon nadawat niya ang usa ka adlaw sa pagkahimugso kon diin dili na gyud siya matigulang pa. Tinuod kana, didto nianang mahimayaon nga Yuta. Gani nagalaum pa kono siya nga mabuhi pa aron makita ang Pag-abot sa Ginoo; mahimong mahitabo kana. Apan kung mahikatulog na siya, siya . . . ug buhi pa kita nianang panahona, nan una siya nga motungha. Oo. Busa, Igsoong Dauch, wala na’y rason nga masaylon mo kana. Nakalinya ka na gayud. Pagpabilin lang dinha, igsoon ko, ug panalanginan ka sa Dios. Ug nagapasalamat ko sa Ginoo alang sa usa ka maayong tawo nga sama niya, ug sa paghatag kaniya niining daghang mga katuigan.

¹¹⁶ Diha sa Basahon sa Mga Cronicas, “Nagasulay sa pagbuhat og buluhaton sa Dios nga wala sa Iyang kabubut-on.” Gamhanan ang Dios, buut, nato una nga masabtan kana. Nagakahibulong ang mga tawo karong panahona kon nganong dili na kita mahimong magkaaduna pa og rebaybal. Nagatoo ba kamo nga gamhanan ang Dios? Kita n’yo, ingon niini ang pagpanulti sa Biblia.

117 Ug nagasulay kita . . . Sama niadtong nagapakig-istorya ko sa usa ka grupo sa buutan kong mga igsoon, mga kaigsoonang Baptist, dili pa lang dugay, ug miingon sila, “Igsoong Branham, magkaaduna lang kita og rebaybal kon dawaton nato ang Pulong, nga pulong sa pulong gayud, panid sa panid, og letra por letra.”

118 Ug miingon ko, “Nagatoo sab ako, nga panid sa panid gyud.” Ingon siya . . . ingon ko, “Dugay na man nila kanang ginabuhat sa una pa.”

119 Ingon siya, “Apan kinahanglan sab natong hibaloon ang Griyegong hubad sa Pulong, kung unsay ginaingon sa Griyego.”

120 Ingon ko, “Hinoon wala pa man kaayo ko nakabasa, apan sa pagbasa ko sa kasaysayan sa iglesia, ug sa *Nicaea Council*, ug sa *Pre-Nicaea Council*, ug *Nicaea Fathers*, og uban pa, naglantugay man gihapon sila *kaniadto* mahitungod sa Griyego. Kadto’y duha ka libo ka tuig na ang milabay. Dunay usa nga miingon, ‘*Ingon-niini* man ang buut ipasabot niini,’ ug miingon pud ang usa, ‘*Ingon-niana* man ang buut ipasabot niini. *Ingon-niini* ang buut ipasabot sa maong Griyegong pulong.’”

121 Sama ra usab sa atong pinulongan; ang pulong nga *see*. Kon gamiton mo ang pulong nga *see*, mahimong ang buut mong ipasabot “usa ka porma sa tubig,” “nasabtan ko,” o daghang mga butang. Ang *bored*, mahimo man nga, “nagbangag, naglakaw-lakaw,” o—o “gilaayan na ko,” o “gibayran mo ang akong pagkaon,” o kaha mahimong nagakahulogan kini og unsa man . . . daghang mga butang. Ug kanang mga vowel, ug uban pa, makapausab man gud sa tibuok nga kahulogan. Busa dili n’yo angay’ng interpretahon kini nga ingon niana. Gisulat Kini sa Dios nga ingon niana, tungod kay . . .

122 Ug dinihogan man ang tanang Pulong, ug miingon si Jesus nga, “Nagapasalamat Ako Kanim, Amahan, nga gililong Mo kining mga butanga sa mga mata sa mga makinaadmanon ug mga masinabuton, ug igapadayag hinoon” (amen) “ngadto sa gagmay’ng mga bata ingon sa gusto makakat-on.” Usa Kini ka kapadagayan mahitungod Kaniya, sa gikaingon ko na kagabii, “Igapadayag hinoon Kini ngadto sa gagmay’ng mga bata.”

123 Ingon ko, “Dili gyud kana magsilbi, sir.” Ingon ko, “Dili gayud moabot ang rebaybal gawas kon ang Dios, ang gamhanang Dios, ang magpadala niini; ug dayon mahimong gamiton sab Niya ang usa ka hangal nga dili gani makasulat sa ngalan niini, ug buhaton kana pinaagi niya, nga dili man gani kahibalo mag-Iningles og unsa pa kaha kung Griyego.”

124 Ingon niana sab ang gibuhat ni Jesus sa dihang nagwali si Pedro niadtong Pentecostes, kabalo na man mo, nga dili gani siya makasulat sa iyang ngalan, tungod lagi walay-hibangkaagan ug walay-nakat-onan. Apan nagabuhat man gud ang Dios og mga butang sa paagi nga ingon ka talagsaon para sa intelektuwal

natong panghunahuna. Mao kana'y nakapahimo Kaniya nga Dios. Kung nagpili man Siya og usa ka pundok sa mga teologo ug mga tawong hataas og katungdanan, ug uban pa, nan miingon unta sila, "Kanang utokan nga si Caifas, nakita n'yo, nasabtan gayud niya kini sa husto." Apan mikanaug ang Dios ug nagpili hinoon og mga mangingisda nga dili gani makasulat sa ilang ngalan, ug mao kadto ang Iyang mga gigamit. Ingon niana ang Dios, mokuha Siya og usa ka butang nga dili-mahinungdanon ug maghimo og usa ka butang gikan niana alang sa Kaugalingon Niyang kadungganan. Gigamit Niya kaniadto ang usa ka walay-kahan-ayan ug nagbuhat og usa ka Eden. Uh-huh, ingon-ana ang Dios.

¹²⁵ Karon, kung aduna ma'y tawo nga adunay mekanika para sa usa ka rebaybal, mao ang bililhon natong igsoon, nga si Billy Graham. Hinoon maayo man ang mekanika, apan ang mekanika dili man makapaandar niana, dinamika ang gikinahanglan nga makapaandar niana. Ngani makahimo ka man og usa sakyanan, butangan kana og nindot nga mga lingkoranan, maghimo og maayong mga piston ug—ug pamatud-an pa pinaagi sa siyensiya kung unsay arang mahimo niana; apan kon wala gani og dinamika dinha, nan usa lang gyud kana ka walay-pulos nga butang.

¹²⁶ Bueno, niadtong Welsh nga rebaybal, nga usa sa atong ulahing mga rebaybal sa wala pa ang sa atong Pentecostal, walay si kinsa man ang nasayod kung unsa ang nagpasugod sa maong rebaybal, gawas lang sa usa ka grupo sa mga tawo.

¹²⁷ Karon, kon maaghat natong tanan...ang higala natong, si Billy Graham, bisan maaghat pa niya ang tanang mga Presbyterian, ug mga Lutheran, ug mga Pentecostal, ug ang tanan magkahiusa, nga moadto sa siyudad ug magpahigayon sila didto og usa ka dakung panagtigum sa mga linibo, ug traynta ka libo ang manabong (sulod sa duha ka semana) ug itugyan nila ang ilang mga kasingkasing ngadto kang Cristo; pagbalik mo human sa duha ka semana ug wala ka'y makaplagaan bisan usa kanila. Kita n'yo, mao kana ang mekanika. Apan tugoti ang Dios sa Iyang gamhanan nga grasya nga magpakigsulti lamang sa usa ka hangal, ingon ta nga sama niana, nga ubos ra og dili-mahinungdanon; tugoti nga mokunsad ang Iyang Espiritu ngadto sa siyudad ug ang mga kalalaken-an dili na makaadto sa trabaho, ang mga kababayan-an dili na makahugas sa mga gikan-an, ang mga babaye dili na makaplastar sa ilang higdaanan, tungod nanagsinggit ug nanaghilak na lang nga ginabayaw ang ilang mga kamot. Ingon niana ang rebaybal, nga anaa sa kabubut-on sa Dios.

¹²⁸ Gikaingon kaniadto nga may pipila ka halangdong mga tawo sa iglesia ang miadto sa Wales aron sabton, o hibaloon kung unsa ba gayud ang mekanika nga anaa sa maong rebaybal, kaniadtong panahon sa rebaybal sa Wales. Ug sa dihang minaug na sila gikan

sa barko nga nakasul-ob sa ilang hatag-as nga mga kalo, ug pinalingin nilang kuwelyo, nakita nilang, nagalakaw sa dalan, ang usa ka pulis, nga naglabyog-labyog sa iyang batota nga nakaingon *niana*, og nagataghoy-taghoy, miingon sila, “Buutang lalaki, mahimo mo bang isulti kanako kung asa ang rebaybal sa Wales?”

¹²⁹ Miingon ang lalaki, “Oo, mga igsoon ko, anaa na kamo mismo sa taliwala niini!” Uh-huh, uh-huh, uh-huh. Ingon pa niya, “Nasabtan n’yo ba, *ako* mao ang Welsh nga rebaybal,” miingon, “tungod kay ania man sa kinasuloran ko ang Welsh nga rebaybal.”

¹³⁰ Ingon niana ang may kagahum! Ingon niana ang ginabuhat sa Dios, ug Siya lamang ang bugtong may katungod nga magpadala og usa ka rebaybal. Dili ingon nga tigumon mo ang mekanika, kondili iampo hinoon sa Dios nga ipadala Niya ang dinamika—dinamika.

¹³¹ Ginapadayag lang Niya ang Iyang Pulong sa mga gipili-nang-daan. Karon, kon gamiton ko ang pulong nga *pagpili-nang-daan*. . . Bueno, dili man gud kini maayong gamiton nga pulong sa publiko, ilabina kon aduna kita og nagkasagol nga mga mananambong nga mga Arminian ug mga Calvinista. Ug dili ingon nga . . . Mihangyo na man ko kaninyo nga ayaw n’yo hunahunaa nga nahibalo ko sa tanan, apan pareho ra man silang sayup sumala sa Kasulatan. Grasya ang hinungdan nga namuhat ang Dios para kanako, mga maayong buhat usab ang akong ginabuhat ingon nga balus sa Dios. Kita n’yo? Kung ingon-ana nasabtan mo Kini. Pag mokatkat ka sa usa man sa mga sanga niini, nan siguradong makaplagaan mo ang imong kaugalingon nga maanaa na sa tumoy sa sanga ug dili na makabalik pa. Nagakatakdo kini diha sa Basahon sa Mga Taga-Efeso, sa tan-aw ko.

¹³² Karon, apan ang maong pulong, kon gamiton ko ang, *gipili-nang-daan*, ayaw baya ninyo hunahunaa nga ako’y. . . mao lang man kana ang bugtong pulong nga hingsayran ko kung unsaon sa—sa paghimo. . . Tungod kana sa pagkahibalo-nang-daan sa Dios, kita n’yo, mao nga hingsayran na Niya. Dili Niya—Niya mahimong isulti. . . Siya—namatay Siya aron ang tanan mamaluwas, nagpakamatay Siya, apan tungod sa Iyang pagkahibalo-nang-daan hingsayran na man Niya kung kinsa ang maluwas ug kung kinsa ang dili maluwas. Kita n’yo? Hingsayran na Niya kana, wala ko masayod niana ug wala pud kamo masayod niana, busa ginapanglimbasugan nato ang atong kaluwasan nga may kahadlok ug pagkurog.

¹³³ Bueno, apan gipahimutang man sa Dios ang Iyang Pulong, sa tanang mga kapanahonan. Ang Iyang pagkahibalo-nang-daan ang hinungdan nga gipahimutang Niya sa iglesia, ug sa mga tawo, ang mga butang nga gibuhat na Niya kaniadto sa sinugdan

pa lang. Ug unya ang Maayong Balita nga gikawali para *niana* nga kapanahonan gikapadayag lang sab para nianang partikular nga mga tawo, mao nga dili Kini makita sa tanang uban pa. Kita n'yo? "Salamat Kanimo, Amahan, nga gililong Mo kining mga butanga sa mga mata sa mga makinaadmanon ug sa mga masinabuton, ug gipadayag Kini ngadto sa gagmay'ng mga bata ingon sa gusto makakat-on." Kita n'yo, ingon niana ang pagpili-nang-daan. Dili nga gibuhat Niya kana pinaagi, sa pagsulti, "Pilion Ko *ikaw*, ug *ikaw* usab dili Ko pagapilion." Kondili pinaagi sa Iyang pagkahibalo-nang-daan, hingsayran na gyud Niya kung unsay imong pagabuhaton.

¹³⁴ Pinaagi sa Iyang pagkawalay-kinutoban... Nagatoo ba kamo nga Siya walay-kinutoban? Kay kung Siya'y dili ingon niana, nan dili Siya mahimong Dios. Kung ingon-ana, palandunga ninyo, ang pagkawalay-kinutoban: hingsayran Niya ang matag pulgas nga maanaa sa yuta, kung pila ka higayon mamilok ang mga pulgas, kung unsa ka daghang tambok ang maanaa sa matag pulgas, og ang matag dahon sa sagbot nga mahimutangan niini; ingon niana ang pagkawalay-kinutoban. Ug may-kinutoban kita, nagakapandol kita diha sa kangitngit. Pero gipahisama man kita sa Dios ngadto sa karnero, ug mao nga nagkinahanglan kita og usa ka Tigpanguna. Ug kana nga Tigpanguna dili tawo, kana nga Tigpanguna mao ang Espiritu Santo, ang Espiritu ni Cristo sa taliwala nato. "Sa diriyut lamang panahon ug ang kalibutan dili na makakita Kanako." Ang Iyang pisikal nga persona gibayaw na ngadto sa Trono sa Dios, kon diin atua ang Espiritu *atua* sa maong Trono; mao nga anaa na karon sa maong Trono sa Cristo, si Jesus. "Sa diriyut lamang panahon ug ang kalibutan dili na makakita Kanako, apan kamo makakita Kanako, kay Ako magauban kaninyo hangtud sa katapusan sa kalibutan, bisan sa sulod ninyo." Ang Trono sa Dios, ni Cristo, anaa man natukod diha sa kinasuloran sa inyong kasingkasing; ug nagalingkod Siya sa Trono sa Dios, apan diha sa Milenyum magalingkod na Siya sa Kaugalingon Niyang Trono; diin, gipanumpa Niya nga pagapatindogon Niya kini nga Tawo, ang Iyang Anak, ang Anak ni David, aron molingkod sa Iyang Trono.

¹³⁵ Karon, ginapadayag Niya kining mga butanga pinaagi sa Iyang pagkahibalo-nang-daan alang ra niadtong mga gitagana na Niya para niining mga butanga, kay kon dili dili nila Kini makita. Bisin pa kon anaa sila dinha, nga nagalantaw na mismo Niini, ug dili gyud gihapon sila makakita Niini.

¹³⁶ Pila man ang nakakita na niadtong hulagway sa usa ka baka nga anaa sa kasagbotan, nga kinahanglan n'yo pang tan-awon sa pila ka higayon? Nakita ba gayud ninyo kadto? O, nakita n'yo ba ang hulagway ni Cristo nga anaa sa sapinit, o anaa sa kawanangan, o sa mga panganod? Kita n'yo, ingon niadto mismo ang pagkadrowing sa pintor nga kinahanglan mong tan-awon

kadto sa usa lamang ka paagi. Bueno, dayon, pagmakita mo na kini, wala ka na'y unsa pa man nga makita kondili kana ra. Sa matag higayon nga motan-aw ka, mao kana mismo. Pila ba ang nakakita na niadto nga mga hulagway? Bueno, siguradong nakakita na gyu mo.

¹³⁷ Bueno, ingon niana usab si Cristo, Mismo, ang Maayong Balita, ang Mensahe. Sa higayon nga imong makita ang Mensahe sa atong panahon, wala ka na gayu'y unsa pa man nga makita kondili Kana lamang. Kana lang. Wala na ang tanang uban pa, pang-dugang na lang ang uban pa, kita n'yo, kita n'yo, sa higayon nga makita ninyo ang Mensahe!

¹³⁸ Ingon—niana pud sa panahon ni Noe kaniadto. Sa dihang si Noe ug ang iyang pundok...nakita n'yo kung unsa...Sa dihang nakita nila ang Mensahe kaniadto, wala na'y unsa pa man nga mahinungdanon. Sa dihang nakita usab Kini sa pundok ni Moises, wala na'y unsa pa man nga mahinungdanon. Sa dihang nakita sab Kini sa grupo ni Juan, wala na'y unsa pa man nga mahinungdanon. Sa dihang nakita Kini sa grupo ni Jesus kaniadto, wala na gyu'y unsa pa man nga mahinungdanon. Sa dihang nakita Kini sa grupo sa mga tinun-an, wala na'y unsa pa man nga mahinungdanon. Sa dihang nakita sab Kini sa grupo ni Luther, sa nakita Kini sa grupo ni Wesley, sa nakita Kini sa Pentecostal nga grupo, wala na gyu'y unsa pa man nga mahinungdanon, og mipahilayo sila sa tanang ubang butang. Ngano man? Tungod pinaagi sa Iyang pagkahibalo-nang-daan Iya mang gitagana-nang-daan nga mahitabo kining mga butanga.

¹³⁹ Ginapili sab Niya ang Kaugalingon Niyang tawo pinaagi sa Iyang pagkahibalo-nang-daan. Sama sa Iyang giingon dinhi sa Mga Taga-Roma 8, nga si Esau...aron nga—aron nga magpabilin gayud nga sigurado ang pagpili sa Dios. Nga si Esau ug si Jacob nga parehong natawo sa balaan nga mga ginikanan, magkaluha, aron magpabilin nga sigurado ug tinuod ang Iyang pagpili, miingon Siya, "Gidumtan Ko si Esau, ug gihigugma si Jacob," sa wala pa man matawo bisan ang usa sa duha ka batang lalaki. Kita n'yo? Nasayod man Siya kung unsa ang kinasuloran sa tawo, nasayod na Siya sa sinugdan pa lang kung unsa kini, busa mahimo Niya nga maipa-pamuhat ang tanang butang sa ingon ka eksakto gayud sa oras sa orasan. Ginanerbiyos kitang tanan ug nagakalibog; pero wala n'yo gayud nakita nga nalibog Siya. Sila wala...Kita n'yo? Nagaandar ang tanang butang, ingon ka eksakto gayud, sa pagtuyok sa orasan.

¹⁴⁰ Kining mga butang nga gikatagna nang mahitabo, kining tanang mga kababayen-an nga may mughong buhok, ug kining mga kalakalen-an nga nagasul-ob sa ilang...maingon nga ang ilang buhok sama sa ilang mga asawa. Nakita ko sila, mismo, nga adunay mga pang-kulong sa ilang buhok, ginakulong ang atubangan sa ilang buhok. Grabeng pagkatuis! Mao kana ang

mga resulta sa Eden ni Satanas. Ug ang ginabuhat pud sa babaye: ginapaputlan niya ang iyang buhok nga sama sa iyang bana; ginapataas pud sa bana ang iyang buhok nga sama sa iyang asawa. Ug ginasul-ob sa babaye ang bisti nga iya sa lalaki, ug ginasul-ob pud sa lalaki ang pang-ilalum nga mga sapot nga iya sa babaye. Kita n'yo, ingon na niana. Ang babaye nagakahimo nang lalaki, ug ang lalaki sab nagakahimo nang babaye. Kita n'yo, mao kana ang Eden ni Satanas, nga sukwahi gayud sa kung unsay gibuhat sa Dios sa sinugdan kaniadto. Mao kana ang Kamatuoran.

¹⁴¹ Kung dili pa ako maghisgot niini, nan dili gyud nato mahisgotan kini. Apan kining mga butanga, ug ang paagi Niya sa pagbuhat niini, ug kung si kinsa ang mobuhat niini, sumala kini sa Kaugalingon Niyang gipili nga pamaagi, Siya mismo ang nagapili. Ingon niana ang gusto Niya nga pamaagi sa pagbuhat niini.

¹⁴² Maingon sa akong nadungog kang Igsoong Pearry Green, ang pastor namo sa Tucson, nga nagwali niadtong miaging gabii mahitungod sa kung giunsa pagbuhat sa Dios ang mga butang sa usa ka pamaagi (nakalimot na ko kung unsa kadtong iyang teksto.), apan ingon siya, “Ingon niana ang gusto sa Dios para niini, ingon niana ang pagbuhat niini sa Dios.” Bueno, tinuod kana.

¹⁴³ Karon, si kinsa ba kanato ang makasulti Kaniya nga sayup Siya? Si kinsa ba ang mangahas nga motindog sa atubangan sa Dios, ug moingon, “Sayup Ikaw, Ginoo, kinahanglan Mo kining buhaton sumala sa gusto ko nga pamaagi sa pagbuhat niini, sa pamaagi nga gikaingon ni Dr. *Ingon-ani-ug-ingon-ana* nga angay'ng pagabuhaton”? Si kinsa ba kanang wala na sa husto nilang panghunahuna, nga mosulti og ingon-anang butang? Wala, dili bitaw ka mogawas ug mosulti niana, apan ginahunahuna mo kana!

¹⁴⁴ Sama sa akong Mensahe mahitungod sa *Anticristo*, “Adunay managpanungha nga mini nga mga cristo.” Karon, wala Siya miingon nga mini nga *mga Jesus*. Kita n'yo, wala ma'y si bisan kinsa nga mosugot nga pagatawgon nga “Jesus,” ingon nga pagpahinungod sa ngalan sa Ginoo. Apan ang mini nga *mga cristo* nagakahulogan og “ang dinihogan.”

¹⁴⁵ Oh, sila, ang matag usa nagadahum nga aduna sila'y pagdihog, “Himaya sa Dios, mahimo niya ang *ingon-ini* ug mahimo ang *ingon-ana!*” Apan testingi gani siya diha sa Pulong ug tan-awa kung unsay madangatan niya, kita n'yo, ang Mensahe sa niining panahon.

¹⁴⁶ Aduna man sila og pagdihog sa panahon ni Jesus kaniadto, apan dili gikan Kaniya.

¹⁴⁷ Aduna sila og pagdihog sa panahon . . . Gani si Dathan aduna man usab og pagdihog sa panahon ni Moises. Ingon niya, “Bueno,

ayaw'g hunahunaa nga ikaw lang ang bugtong balaan kanato, aduna pa ma'y daghan ang Dios. Magtukod sab kami og usa ka organisasyon dinhi, usa ka pundok sa mga kalalaken-an."

¹⁴⁸ Miingon ang Dios ngadto kang Moises, "Thimulang ang imong kaugalingon gikan kaniya," ug Iyang gibuka ang yuta ug gipalamoy sila. Gihatag Niya ang Iyang orihinal nga Pulong ngadto kang Moises, nga Iyang propeta; mao lang kana ang bugtong paagi nga Iyang gibuhat, ug ang bugtong paagi nga Iyang pagabuhaton. Wala man Niya ginausab ang Iyang plano, kita n'yo.

¹⁴⁹ Busa sayup ang atong mga ideya, ang Iyang mga ideya ang husto, sa kanunay. Ug ayaw gyud sulayi nga moingon ka Kaniya nga Siya'y "sayup." Bisan si kinsa pa man ang ginahunahuna nato nga pinaka-kuwalipikado, dili gyud kita ang magasulti kung kinsa ang pinaka-kuwalipikado. Karon, dinha kamo nagasulod sa organisasyon.

¹⁵⁰ Pag may usa ka igsoong lalaki nga puno sa Espiritu ang moadto sa usa ka siyudad ug magtukod og usa ka organi- . . . magtukod og—og maanindot nga grupo sa mga tawo. Ug magkitaay sila diha sa usa ka pakigpulong, ug magkasinabot ang tanang balaan nga mga kaigsoonan, kabalo na mo, ug moingon, "Kabalo mo kung unsa? Sa hunahuna ko kining si *Jones* nga ania dinhi," (siya man ang mas gusto nila) "Siguro siya ang mas angayan nga magkaaduna nianang maanindot nga dakung tabernakulo, sa tan-aw ko. Dili ba husto kana?" Dili, gayud. Mao na kana. Ug dayon magkatibulaag na ang kongregasyon. Kita n'yo? Pagpahilain kamo sa mga ingon-niini! Ang Dios ang mao'y nagahimo sa pagpanglain, Siya Mismo ang Mao'y nagahimo niini. Apan silang tanan, ang matag usa buut man nga pilion *kining* usa nga gusto nila, siya ang ibutang *dinhi*, ug *kining* usa usab *dinhi* lang. Ideya kana sa tawo.

¹⁵¹ Anaa sa tawo ang mga yawi, apan sa tinuod lang ang Dios man ang nagakupot sa maong mga yawi. Gikahatagan kaniadto ang mga tinun-an, ang balaang iglesia, og mga yawi; ug matikdi ang unang higayon nga gigamit nila kini, sa dihang nahulog si Judas tungod sa kalapasan. Nagkatigum-tigum sila ug nanagripa; ang balaan nga mga kaigsoonan. Si kinsa man ang makasulti nga dili sila balaan nga mga kaigsoonan? Si kinsa man ang makasulti nga dili sila mga balaan? Apan nanagripa sila, ug si Matias ang napili. Ug sa dihang iyang. . . Unsa ma'y nabuhat niya? Wala. Apan si Pablo man ang maong pinili! Amen. Siya ang gipili sa Dios: usa ka gamay'ng, hiwi og ilong, mahait manulti, og masuk-anon kaayo nga Judio. Dili ang Matias, nga may D.D., kabalo mo, siya—siya'y . . . Kondili si Pablo. Si Pablo ang gipili sa Dios; ang gipili sa iglesia, gipili niini si Matias. Kita n'yo? Mao nga wala ka'y katungod nga sultihan ang Dios nga Siya'y "sayup." Nasayod Siya kung unsay buhaton, nasayod Siya kung unsa gyud ang anaa sa tawo.

152 Si kinsa ba . . . Pillion kaha niadto nga iglesia si Pablo? Oh, dili, dili gayud. Miingon, “Kanang tawhana man mao ang nagpabilanggo kanamong tanan.”

153 Apan ang ingon sa Dios, “Ipakita Ko kaniya kung unsay iyang pagaantuson tungod Kanako.” Nasayod na Siya kung unsa.

154 Bueno, bisan si kinsa pa man ang ginahunahuna nato nga angayan, ang Dios mismo ang nasayod kung kinsa ang pinaka-kuwalipikado tungod kay hingsayran man Niya ang kasingkasing sa tawo, Siya ra ang nasayod.

155 Mao usab sa rebaybal, o sa niining mga butang, nga ginahunahuna nato nga kinahanglan nang mahitabo pero wala nagakahitabo. Nagahunahuna kita, “Mao na kini ang panahon karon mismo, himaya sa Dios!” Namatikdan sab nako diha sa atong mga sanga ug uban pa sa Business Men, “Aduna na’y magaabot sa dili madugay, alleluyah, nga usa ka dakung rebaybal!”

156 Ayaw pagpalimbong, “Miabot na siya, ug gibuhat nila kaniya kung unsa ang nahisulat na.” Kita n’yo? Apan nagadahum gyud sila nga aduna pa’y usa ka rebaybal. Mahitabo ba kana? Dili! Tapos na kana, ug wala na, tapos na kana. Uh-huh. Himatikdi, mao na kini ang panahon sa pagpanglimpyo og lamparahan, sa pagpanggawas ug pagsulod. “Sila nga nagahulat sa Ginoo magabag-o sa ilang kusog.”

157 Matikdi n’yo dinhi sa atong teksto, matikdi si David, nga hari sa Israel, siya man mao ang nakadawat sa kapadayagan bahin sa pagdala sa arka sa Dios balik ngadto sa iyang dapit; nga, sa mga adlaw ni Saul kaniadto wala na nila kini gikonsulta tungod kay nag-backslide na man si Saul. Busa wala na gayud sila nagkonsulta sa arka, ang pakigsaad, sa mga adlaw ni Saul, tungod nag-backslide na man siya ug mipahilayo na sa Dios. Busa si David, sa gilayon, nga dunay pagdihog . . . Karon matikdi n’yo kini, usa man gud kini ka malimbongon kaayo nga teksto kung dili n’yo kini masabtan sa insakto. Ug nabati ko nga nagaabot na ang panahon kon diin kinahanglan na nato nga mamahimong hamtong og dili ingon nga mga bata pa. Uh-huh. Kinahanglan na natong mokaon og gahi nga karne imbis nga gatas.

158 Matikdi si David, nga hari sa Israel, ang maong hari bag-o pa lang kaniadto nga gidihogan ingon nga hari; o gipili nga hari, si Saul kaniadto . . . gidihogan siya ni Samuel sumala sa kabubut-on sa Dios; ug siya sigurado ang gipili kaniadto nga hari sa Dios, walay pagduhaduha bahin niana. Ug ania si David, ug miabot kaniya ang pagdihog. Gipadayag kadto kang David. Nadawat niya ang kapadayagan, og walay gikasulti ang si kinsa pa man mahitungod niadto. “Moadto na kita ug kuhaon ang arka, tungod kay mao kana ang kabubut-on sa Dios nga maania dinhi

kanato ang arka, aron makonsulta nato ang Dios pinaagi niining arka.” Grabe, grabe ka maisogon nga buhat. Dili ba? Bueno.

¹⁵⁹ Hinumdumi, apan, siya ingon nga hari, ug adunay kapadayagan, milagpas siya sa iyang katungdanan. Ngani aduna ma’y usa ka propeta sa yuta kaniadto nga ginganlan og Nathan, siya mao ang gikatagana nga makadawat og kapadayagan. Kon adunay unsa mang butang nga igasulti, ang ingon Niya, “Ang Ginoo dili magbuhat og bisan unsa gawas ùna nga Iyang ipadayag kini ngadto sa Iyang mga alagad ang propeta.” Apan, nakita n’yo, si David ingon nga hari, nga ang pagdihog anaa kaniya. . . Bueno, Kasulatan ba kana? Anaa kaniya ang pagdihog, ug nagkaaduna sab og tinuod nga kapadayagan; apan sayup kadto: Tungod kay si Nathan man ang propeta niadto nga kapanahonan; pero wala miabot kang Nathan ang maong kapadayagan; ug sa dihang miabot kang David ang kapadayagan, wala gyud niya gikonsulta si Nathan mahitungod niadto. Basta na lang siyang nagpadayon ug gibuhath ang gusto niyang buhaton. Uh-huh.

¹⁶⁰ Apan matikdi n’yo kung kinsa hinoon ang gikonsulta ni David dinhi sa ika-13 nga kapitulo, “Ug si David nagpakitambag sa mga capitan sa mga linibo ug mga tinaggatus,” mikonsulta siya sa iyang katilingban kaniadto. Kita n’yo? “Karon, sa tan-aw n’yo kinahanglan ba natong. . . ?” Dili kini ingon niana. Bueno, misulay siya sa pagbuhat og buluhaton sa Dios, apan dili man siya ang gikatagana para buhaton kadto; kita n’yo, tungod aduna ma’y pamaagi ang Dios.

¹⁶¹ Sama ra usab kaniadto nga mahimo man unta sa Dios nga magpakigsulti diretso sa—sa hari mahitungod sa samad niini ug pagkaayo, apan wala Siya nagpakigsulti, tungod aduna man Siya’y gikatagana nga paagi sa pagbuhat niadto, kadto’y pinaagi sa Iyang propeta. Busa nagpakigsulti Siya sa propeta, nga si Isaias, gisultihan ang propeta nga moadto ug suginlan si Ezechias kung unsay mahitabo.

¹⁶² Bueno, nagapakig-istorya man si Ezechias sa nawong og nawong sa Dios, ug—ug mahimo pud nga magpakig-istorya ang Dios kang Ezechias, siyempre, apan naghimo man ang Dios og mga agianan! Nasabtan n’yo ba kini? Ang Dios adunay Kaugalingon Niyang gikatagana nang paagi sa pagbuhat og mga butang: sa pagpadala og mga rebaybal, pagpakig-istorya, pagpakigpulong, o unsa man. Aduna Siya og Iyang paagi sa pagbuhat niini, ug si kinsa ba kita para sultihan Siya kung unsaon pagbuhat niini. Ginabuhath Niya kini sa paagi nga gusto Niyang buhaton.

¹⁶³ Busa, nakita n’yo, si David, ingon nga dinihogan. . . Karon, nahinumduman n’yo ba nga misulti ko bahin sa, pagdihog, sa mini nga pagdihog? Timan-i n’yo nga mahimong mokunsad ang Balaang Espiritu ug dihogang ang usa ka tawo, ug sa gihapon

mamahimong wala sa kabubut-on sa Dios. Ania, ginapamatud-an Niini kini dinhi mismo. Kita n'yo? Kinahanglan gyud natong moagi sumala sa paagi sa Dios sa pagbuhat niini, dili nga sa atong mga paagi, kondili sa paagi sa Dios sa pagbuhat niini. Ngani, si David, ingon nga usa ka hari, nga dinihogan, dinihogan sa Espiritu sa Dios nga anaa kaniya (ingon nga tipo ni Jesus Cristo), apan dili man kadto ang paagi sa Dios.

¹⁶⁴ Apan ang tibuok katilingban, “gikahimut-an nila kadto,” ang ingon sa Biblia. Matikdi, ang mga kapitan sa mga linibo ug tinaggatus, ang mga sacerdote ug mga teologo usab nanagdahum gayud nga kadto’y “halangdon.” Mao man usab ang inyong mga eskwelahan pang-Biblia ug tanan nang uban pa, nanagdahum sila nga kadto’y “halangdon.” Gani miuyon man ang tibuok katawohan, ug ang mga sacerdote usab, ug—ug silang tanan miuyon gayud nga husto ang pagdihog sa hari. Matikdi! Apan wala man gikasaad sa Dios nga ipadayag ang Iyang Pulong sa panahon Niini ngadto *kanila*. Hinoon aduna ma’y paagi ang Dios sa pagpadayag Niya sa Iyang Pulong, apan dili ngadto *kanila*. Hinumdumi, nga sukwahi kadto sa Dios.

¹⁶⁵ Mora’g sama lang usab sa mga adlaw ni Micheas nga anak ni Imlah. Mahinumduman pa ba ninyo ang maong estorya? Nahimulag kaniadto ang Judaea ug ang Israel, ug aduna sila’y duha ka managlahi nga gingharian, ug si Ahab mao ang hari sa usa ka gingharian. Ug si Josaphat mao ang hari sa ging—gingharian sa Judaea, nagatoo ko nga mao kana; ug si Ahab mao’y hari sa Israel, sa Jerusalem.

¹⁶⁶ Matikdi, ug dayon ania nangabot ang usa ka pundok sa mga dumuloong ug giangkong ang bahin sa yuta nga hinatag-sa-Dios og gikahatag na sa Dios ngadto sa Israel, ug kining mga Filistihanon didto, o mga Sirianhon, ang nag-angkon niadto nga luna ug ginapakaon nila ang ila mismong mga anak gikan sa ani sa luna nga panag-iyas sa Israel. Ug mao nga gikinahanglan sa Israel kadto nga luna aron mapakaon ang ila mismong mga anak ug ang kaugalingon nilang mga pamilya. Gihatagan sila sa Dios . . . Hinatag-sa-Dios kadto nga mga katungod kanila.

¹⁶⁷ Ug busa gipatawag ni Ahab si Josaphat, ug miingon, “Umari ka.” Ingon niya, “Tan-awa gani kung unsay ginabuhat sa atong kaaway. Husto ba nga kita, nga mga katawohan sa Dios, nga dunay hinatag-sa-Dios nga katungod nga kinahanglan kita ang mag-angkon niining yutaa, panag-iyas nato kini, ang Dios pinaagi sa Iyang propeta, nga si Josue, ang nagbahin-bahin niining yutaa, mao nga sa atoa gayud kini, panag-iyas nato kini, sa atong mga anak, apan ania ang mga komunista nga giangkong na kini? Ug aduna man kita’y . . . Nangagutman na kaayo kita, ug giilog nila ang atong mga katungod nga hinatag-sa-Dios. Dili ba kinahanglan na natong moadto didto ug bawion ang atong yuta? Kung ipaapil mo ang imong mga kasundalohan: kung kamong mga Methodist, ug mga Presbyterian, ug tanan na,

ug ang mga Presbyterian, ug Lutheran, ug uban pa, kon bug-os n'yong dawaton ang ekuminikanhong konseho dinhi karon, nan magkauban na kitang tanan, ug bakwion nato ang maong butang.” (Nagasulti ako ug nagaistorya karon pinaagi sa usa ka samingay.) “Adtoan nato kini ug kuhaon.”

168 “Aba,” miingon siya, “mao gayud, usa ra man kitang tanan.” Uh-huh.

169 Bueno, ang ingon sa Biblia, “Unsaon man pagkakuyog sa duruha gawas kon sila magakauyon?” Kita n'yo?

170 Didto kon diin ang halangdon nga lalaki, ang halangdong Pentecostal nga lalaki, nga si Josaphat, nakig-uban-uban na sa dili mao nga grupo. Ug ingon niana sab ang nahitabo sa atong mga Pentecostal sa karong panahon. Aduna man unta og pipila ka tinuod nga mga kalalaken-an dinha, apan nakig-uban-uban na man sila diha nianang denominasyonhong grupo. Panggawas intawon mo gikan niana nga butang! Tinunglo na kana sa Ginoo!

171 Matikdi ha! Atua siya, ug ingon niya, “Oo, mora'g makatarunganon bitaw.” Miingon, “Mamaimo ang among mga carro; og among katawohan. Tatal, Judio man kitang tanan. Sigurado, mouban gyud kami kanimo.” Apan aduna pa ma'y igong pagka-relihiyoso nga nahibilin kang Josaphat sa pag-ingon, “Pero dili ba kinahanglan una natong—natong konsultahon ang Ginoo?” Kita n'yo? “Sa hunahuna ko maayo gyud kana nga ideya.”

172 Aba, si Ahab, “Siyempre.” Miingon, “Aba, oh, oo, naghunahuna pud unta ko niana.”

173 “Bueno, aduna ba og usa ka tawo sa Dios dinhi? Aduna ka ba og usa ka propeta?”

174 “Ah, aduna ko'y upat ka gatus kanila. Aduna ko og tibuok konseho dinhi, ang tibuok denominasyon. Sila'y Hebreohanong mga propeta.”

175 Karon timan-i n'yo, ang Biblia miingon nga sila'y “*mga propeta*, Hebreohanong mga propeta,” dili paganong mga propeta, kondili Hebreohanong mga propeta; usa ka eskwelahan kanila, gikan sa usa ka pang-teologong seminaryo.

176 “Bueno, paanhia sila!”

177 Ug gisul-ob sa mga hari ang ilang kupo ug milingkod sa iyang atubangan aron magpa-bilib sa propeta. Ug ania nagaabot, nagtoo ko nga si Zedechias kadtong miabot, ang bantugang pangulo sa pang-distrito nga konseho, o kung unsa man siya, nga miadto didto sa ilang taliwala. Naghimo siya mismo og duha ka dagkung mga sungay, ingon siya, “Nadungog ko ang Dios. MAO KINI ANG GINAINGON SA GINOO, ‘Pinaagi niining mga sungay papahawaon mo ang mga Sirianhon pahilayo sa maong yuta.’”

178 “Oh, himaya!” nagdahum gyud ang tanan nga maanindot kadto, og maayo.

179 Matikdi n’yo karon kung unsa na kana ka haduol sa sulab sa labaha, tali sa husto ug sayup. Ug timan-i nga mopaingon kini mismo hain man sa duha ka bahin niini, hangtud nga moabot ang punto nga mamahimo kining ingon na kanipis sama sa pinahait nga sulab ang kalahian tali sa husto ug sayup. Busa kinahanglan nga kini matag Pulong gyud sa Dios; dili lang ingon nga halos matag Pulong, kondili ang matag Pulong gayud! Ug midangat na kini sa karong panahon, dili ngadto sa mga Lutheran, dili sa mga Methodist, dili sa mga Pentecostal, kondili sa niining binaid na nga kapanahonan, sa niini nga kapanahonan kon diin bug-os gayud ang pagdihog sa anticristo, nga malimbongan niini ang mismong mga Pinili, og mangahulog sila sa sayup nga bahin kung dili sila magbantay niini, sama sa usa ka kalang. Magbantay gayud! Mag-amping kamo! Wala na kita karon nagapuyo sa Pentecostal nga kapanahonan. Milagpas na kita niana nga kapanahonan, sama ra usab nga milagpas na kita sa Lutheran, ug milagpas . . . Kita n’yo?

180 Himatikdi. Bueno nanagpropesiya kadtong tanang mga propeta, ang upat ka gatus kanila, nga pinakaon pag-ayo, ug maayo’g binistihan, Hebreohanong mga propeta nga nagpamatuod kanila, nga nagakahiusa, “MAO KINI ANG GINAINGON SA GINOO, ‘Tumungas kamo, ang Ginoo magauban kaninyo.’”

181 Miingon si Josaphat, “Bueno, kana—medyo maayo man kana. Apan,” miingon, “Aduna ka pa ba’y usa?”

182 “Usa pa? Ania na man kanamo ang tibuok denominasyon, gitigum na namo ang tibuok konseho dinhi. Nganong magkinahanglan pa man ‘ta og usa?”

183 Miingon siya, “Ah, apan nahunahuna ko man gud nga basin aduna pa’y usa.”

184 Miingon si Ahab, “Oh, oo, aduna bitaw og usa pa, apan dili man siya miyembro niini nga konseho.” Uh-huh. “Usa siya ka sinalikway. Kana mao si Micheas, nga anak ni Imlah, ug gikapungtan ko gayud siya.” Kita n’yo? Ingon pa, “Dili sab nila siya dawaton sa pagpakig-fellowship, ug usa lang man siya ka ordinaryo nga sinalikway sa sugod pa lang. Ug siya sa kanunay, ang tanan niyang ginapropesiya, wala gani niya ginadasig ang akong seminaryo bisan gamay.” Uh-huh. “Ug ginabuhat pud niya kining tanang mga butang nga dautan, pirmi ra siyang nagapropesiya og dautan batok kanako, aron lang nga mahimong lahi.”

185 “Oh,” ang ingon ni Josaphat, “dili unta magsulti ang hari og ingon nianang butang. Apan gusto kong madungog kung unsay igasulti niini nga lalaki.”

186 Miingon, “Sige, ipapangita namo siya.” Busa nagpasugo sila sa kon asa man didto sa kamingawan, ug nagsugo sila og usa ka tawo.

187 Miingon, gisultihan si Micheas, ang ingon, “Bueno, sa pag-adto nimo didto karon, aduna ko’y gustong isulti kanimo. Gusto ba nimo nga makabalik pag-usab sa denominasyon?” Kita n’yo? “Gusto ba nimo nga magpakig-fellowship pag-usab uban kanilang tanan? Kung gusto gyud nimo, nan isulti lang ang mao rang butang nga ginasulti sa pang-distrito nga presbiterio, isulti ang mao rang butang nga ginasulti sa obispo, ug pabalikong gyud ka nila. Karon na ang higayon para buhaton mo kana.”

188 Apan mahunahuna n’yo ba ang usa ka dinihogan, tinuod nga propeta sa Dios nga magapakigkompromiso og bisan usa ka Pulong sa Dios? Dili gayud!

189 Miingon siya, “Ingon nga ang Ginoo buhi, igasulti ko lang kung unsay ginasulti sa Dios!” Usa ka anak ni Imlah ang gikinahanglan nato. “Ingon nga ang Ginoo buhi, igasulti ko lang kung unsay Iyang isulti.” Husto kana, “Kung lang ang *Iyang* isulti.”

190 Busa sa dihang nangabot na sila didto sa atubangan sa katawohan, ang tanang mga propeta, miingon sila, “Karon, isulti mo kanila . . .”

191 Miingon si Micheas, “Kadali lang, hatagi ako karong gabhiona, tan-awon ko ùna kung unsay igasulti sa Ginoo.” Busa, niadtong gabhiona, nagpakita kaniya ang Ginoo diha sa usa ka panan-awon ug gisulti kaniya kung unsay isulti.

192 Pagkasunod buntag miingon ang maong tawo, “Unsa ma’y imong isulti, Imlah?” sa diha nga atua na silang tanan didto . . . ang buut kong ipasabot “si Micheas diay, nga anak ni Imlah,” miingon, “unsa ma’y imong igasulti karon? Nagkatigum na man kaming tanan dinhi, ang tanang mga sacerdote, ug ang tanang mga propeta, ug ang tanang mga hari, ug ania na ang tanan nga nagkatigum dinhi. Unsa ma’y imong igasulti dinhi niining dakung pakigpulong karon?”

193 Ang ingon, “Tumungas kamo,” ingon pa, “apan nakita ko ang Israel nga nagkatibulaag sama sa mga karnero nga walay magbalantay.”

194 Ug miingon si Ahab, “Gisulti ko na kanimo! Ang mahimo lamang nianang tampalasan mao ang magpropesiya og dautan batok kanako!”

195 Unsaon man niya pagsulti og unsa pa mang butang kon gisulti sa Dios ang mao ra nga butang mismo? Ang propeta mao baya ang baba sa Dios nga nagasulti, og dili ang kaugalingon niyang panghunahuna. Iyang . . . Nakita n’yo, siya’y bug- . . . bug-os gayud nga nagpasakop sa Dios, dili niya gusto nga makapasakit kang bisan kinsa, apan kinahanglan man niyang

isulti kung unsay ginasulti sa Dios, tungod kay siya mismo wala ma'y pagkontrolar Niini. Kita n'yo?

196 Ingon si Ahab, “Karon, dili ba gisulti ko na kanimo?”

197 Ug pagkahuman miduol ang—ang dakung tawo nga may dala nga sungay, ug gisagpa siya sa baba, ang ingon sa tawo, “Hain man mipaingon ang Espiritu sa Dios sa dihong migawas Kini kanako?” Sa laing pagkasulti, tugoti kong isaysay kana pag-ayo, “Tan-awa kini sa . . . Tan-awa kini, aduna ko'y gustong isulti kanimo, Micheas. Nahunahuna mo ba nga usa ako ka batid sa Kasulatan? Nahunahuna mo ba nga aduna ko'y pagdihog?” O, “kung sa Bautismo,” ingnon na natong ingon-ana sa karon. “Nahunahuna mo ba nga nakabaton na ko niana?”

198 Miingon si Imlah, “Wala ko nagaduhaduha niana.”

199 Miingon si Zedechias, “Apan paminaw! Nagsulti kanako ang Espiritu sa Dios, ug gipamatud-an mismo sa akong upat ka gatus nga ania dinhi, nga among ‘papahawaon ang mga Sirianhon pahilayo sa maong yuta.’ Ug si kinsa ka man para moanhi dinhi ug mosulti nga ang among bantugang hari pagapatyon?” Ingon pa siya, “Ang Espiritu sa Dios ang nagsulti kanako niana.”

200 Isaysay ko lang kini og ayo aron nga inyo gyud kining masabtan. Ug tingali'g masayran nato nga miingon si Micheas, “Kagabii diha sa panan-awon, sir, nakita ko ang Dios nga nagalingkod sa usa ka Trono. Ug nakita ko ang tibuok panon sa Langit nga nagkatigum palibot Kaniya, uh-huh, ug nagpahigayon sila og pakigpulong sa Langit. Sila miingon, ‘Kinsa ba ang paadtoon nato ug aron limbongan si Ahab? Tungod kay dinhi ilalum sa Trono ania ang propeta, usa ka tinuod nga propeta, ang iyang ngalan mao si Elias. Ug nagpropehiya siya pinaagi sa Akong Pulong ug miingon nga “Kanang dautan nga si Ahab, tungod kay gipatay niya si Naboth, ang mga iro magatilap sa dugo nianang dautan nga tawo,” ug kinahanglan natong himoon Kana nga mamahitabo tungod kay gikasulti na man Kini nga, Kini'y MAO KINI ANG GINAINGON SA GINOO! Kinahanglan nga mamahitabo Kini, og mapadangat didto. Ug unsaon man nato sa pagbuhat niini?”

201 “Dayon gikan sa makahahadlok nga dapit sa mga nangalaglag, gikan didto sa kinahiladman dunay usa ka espiritu nga misaka, ang ingon niya, ‘Usa ako ka manglilimbong. Kung makaalagad ako Kanimo, monaug ako ug mosulod diha sa iyang propeta.’” Tungod kay organizado man kaayo sila, usa lamang ka butang ang masabtan nila, ug mao kana ang diyutay'ng emosyon. “Ug papanagnaon ko sila og usa ka bakak. Ug aghaton ko si Ahab nga maminaw niadtong mga tawong hataas og katungdanan ug dili sa Imong tinuod nga propeta; tungod kay pagasusihon man sa tinuod nga propeta ang tanan niyang ginasulti diha sa Imong Pulong, pagasusihon niya ang *iyang* mga panan-awon pinaagi sa Pulong, pagasusihon

niya ang tanan niyang ginabuhat pinaagi sa Pulong, ug kung dili kini uyon sa Pulong nan dili niya kini paminawon. Apan kung kini. . . mahimo ko ra nga limbongan kining uban pa, ug akong. . . sila. . . daku man kaayo og pagsalig si Ahab diha nianang dakung panaghiusa para sa ilang kasiguradohan, busa magakatigum sila ug magakahiusa sila. Ug aghaton ko si Ahab nga maminaw kanila, aron moadto siya didto. Ug sa ingon-anang paagi nato buhaton kini.”

²⁰² “Miingon ang Dios, ‘Mahimo mo kana, usa man ikaw ka tinuod nga manglilimbong; lakaw og kanaug na.’”

²⁰³ Ug pagkahuman gisagpa siya ni Zedechias diha sa baba, miingon, “Hain ka man. . . ?”

²⁰⁴ Ingon siya, “Masayran ra nimo pag atua ka na sulod sa bartolina.” Uh-huh.

²⁰⁵ Ingon niya, “Tumungas ka!” ang ingon ni Zedechias ngadto sa hari. Miingon, “Tumungas ka ug magabalik nga may kalinaw!”

²⁰⁶ Miingon si Ahab, “Ipadakop kanang tawhana ug ibalhog siya sa bilanggoan. Ibilanggo siya nga naka-kadena, pakan-a siya og tinapay sa kagul-anan ug tubig sa kagul-anan. Ug sa akong pagbalik nga dala na ang akong kadaugan gikan didto, diin gikasulti kanako sa akong mga propeta nga ‘sigurado gayud nga mahitabo kini nga rebaybal,’” ingon pa, “ako na ang bahala nianang tawhana!”

²⁰⁷ Paminawa n’yo ang ulahing mga pulong ni Micheas para niadto nga tawo: “Kung makabalik ka pa, tungod ang Dios wala man magsulti kanako.” Amen.

²⁰⁸ Kita n’yo na, aduna ang Dios og Iya mismong pamaagi sa pagbuhat og mga butang. Pero nanagdahum kini nga mga tawo nga nagabuhat sila og buluhaton sa Dios. Mao nga magbantay gyud! Dili kini emosyon, dili kadasig, dili mga imahinasyon, kondili kinahanglan nga kini gayu’y “MAO KINI ANG GINAINGON SA GINOO,” og kinahanglan nga tinuod. Bueno, bisan pa. . . Hingsayran nato nga ingon niana kining mga butanga.

²⁰⁹ Matikdi karon sa dihang gihimo ni David kining dakung pahayag, ug daw sa maayo kini, usa ka maayong butang nga pagabuhaton. Dayon hingsayran nato nga (Ginapakapoy ko na ba kamo? Udto na ba kaayo para maghisgot ako og usa pa?) gihimo nila kining dakung pahayag kaniadto, pero wala niya gikonsulta ang propeta.

²¹⁰ Karon, nasayod man ang si bisan kinsa nga gikasulti sa Amos 3:7 nga nagsaad ang Dios nga dili Siya magbuhat og bisan unsa gawas una nga Iyang ipadayag kini ngadto sa Iyang propeta. Sa tanang mga kapanahonan sa iglesia nagkaaduna kita og mga repormador; apan gikasaad diha sa Malaquias 4

nga magkaaduna og usa ka propeta sa kayutaan sa kaulahiang mga adlaw (tungod kay kinahanglan man kining mosibo sa maong sumbanan, kita n'yo) sa dili pa moabot ang katapusang panahon.

²¹¹ Sa wala pa ang unang pag-anhi ni Jesus, miabot si Elias, si Elias sa Malaquias 3. Mao sab kana ang ginaingon sa Mateo 11, “Kung makasabot kamo niini, mao kini siya ang gihisgotan nga, ‘Ania, Akong gipadala ang Akong—Akong mensahero sa atubangan Ko.’” Bueno, Iya nang gipropesiya, ang tanang mga teologo nagatoo man niana: nga sa kaulahiang adlaw, ang Espiritu ni Elias motungha na, usab. Kinahanglan Niini nga motungha sa lima ka higayon, og ginagamit sa Dios kana nga Espiritu: diha kang Eliseo, Elias, Juan Bautista, ug para sa iglesiang Gentil, ug pagkahuman para na sa mga Judio diha sa Pinadayag sa ika-11 nga kapitulo. Kana mao, ang g-r-a-s-y-a sa Dios, p-a-g-t-o-o, J-e-s-u-s, Jesus, nga—nga lima ka letra. Dili man puede nga mohunong sa upat, kinahanglan nga modangat gyud sa lima. Kita n'yo? Himatikdi!

²¹² Karon, gisaad Niya kana, busa ginapatakdo niana ang Biblia sa ingon ka eksakto ngadto niini nga panahon, ug sa Sodoma ug Gomorra. Ug si Elias dili . . .dili Kadto si Elias mismo; Kadto mao ang Espiritu sa Dios nga anaa kang Elias; yanong tawo ra man si Elias. Bueno, nagkaaduna na kita og mga Elias kaniadto, ug mga kupo ni Elias, ug mga sinina ni Elias, ug tanang butang ni Elias. Apan ang Elias sa niini nga panahon mao si Ginoong Jesus Cristo. Moabot Siya sumala sa Mateo sa disiete- . . . sa Lucas 17:30, nga, igapadayag sa Anak sa tawo ang Iyang Kaugalingon diha sa Iyang katawohan. Dili ingon nga usa ka tawo, kondili Dios! Apan moabot kini pinaagi sa usa ka propeta. Bueno, wala man Siya sukad nagkaaduna og duha ka medyor nga mga propeta sa mao rang higayon, wala gayud, sa kalibutan. Kita n'yo? Bisan unsa pa ka daghang mga . . .dili gyud mahimo nga duha—duha ka ulo . . .Kinahanglan nga usa ra ka ulo. Kinahanglan sa Dios nga makakuha og usa ka tawo nga napailalum sa Iyang pagkontrolar. Kita n'yo? Adunay usa ra man ka Dios; adunay Amahan, Anak, ug Espiritu Santo, apan usa ra ka Dios sa ibabaw niining tanan, matikdi, ug gigamit lang kana nga mga opisina. Ingon niana usab Siya kang Elias, ang Espiritu ni Elias; gigamit ra Niya ang maong Espiritu, apan mao ra sa gihapon nga Dios ang nagakontrolar Niini sa tanang panahon aron tumanon ang Iyang Pulong.

²¹³ Karon, matikdi n'yo dinhi karon, nagdahum si David nga nahan-ay na niya ang tanan kaniadto. Ug tungod dinihogan man siya. Kita n'yo na kung unsa nga mahimong dihogan sa Balaang Espiritu ang usa ka tawo? Apan kinahanglan nga anaa kini sa kahan-ayan sa pagdihog. Mahimong madihogan usab sa Espiritu Santo ang pang-gawas nga espiritu, apan ang kalag maingon gihapon ka itum sama sa alkitran. Ngani

nagatubo man ang amorseko pinaagi sa mao rang tubig nga nagapatubo. . . ang nagahatag og kinabuhi sa trigo, mao usab ang nagahatag og kinabuhi sa amorseko; apan sa kinasuloran sa amorseko, kinabuhi ra gyud sa amorseko. Nagakalipay kini, ug nagalimbukad, ug dunay kinabuhi, ug ginabuhat ang tanang butang nga ginabuhat sab sa trigo, apan ang *kinasuloran* niini iya sa *amorseko*. Kita n'yo? Mahimong manungha ang mini nga mga magtutudlo, nga magatudlo og tanang matang sa trinitarianismo ug tanan nang uban pa, ug mahimong dihogan sa Espiritu Santo, ug makapamuhat og ingon ka daghan nga mga milagro nga sama sa mahimo sa tinuod nga Ebanghelyo. Apan pinaagi dinhi sa Pulong, mao kini mismo ang nagabuhat niana. Nasabtan n'yo ba ang buut kong ipasabot? Karon, okey ra man nga magtudlo ko niini, siguro, ako'y—ania bitaw ako karong buntaga sa usa ka tabernakulo nga puedeng manambong ang nagkadaiyang mga denominasyon, dinhi—dinhi niini nga hotel.

²¹⁴ Matikdi, tan-awa n'yo kung unsay ginasulti nato. Karon, bueno, paminaw mo. Nagkaaduna si David og tanan nang emosyon nga aduna usab sa tinuod nga rebaybal. Himatikdi! Nanagsinggit sila, nanagtiyabaw sila, nanagsayaw sila, aduna gayud sila'y naangkon gikan niadto nga pagdihog. Tinuod gyud! Ang tanan nga sama sa usa ka tinuod nga rebaybal, apan, matikdi ninyo, nga ang Dios wala didto. Wala didto ang Dios. Aduna man unta ang Dios og usa ka propeta nga atua mismo sa yuta kaniadto. Nasayod na man sila unta. Kita n'yo? Nasayod man unta si David niadto.

²¹⁵ Mora'g sama ra niining panahona, nagkaaduna kita og tanan nang mekanika, sama sa dagkung mga denominasyon, mga krusada sa atong panahon, apan ang nagakahitabo ang mga resulta sama ra gihapon sa kung unsa kaniadto; ang resulta sa atong dagkung mga krusada, ug sa atong dagkung maanindot nga pangatarungan, sa atong dagkung mga bilding, ug sa atong dagkung. . . nanagtukod og linibo, ug nanagdugang og mga miyembro ug tanan na, pero mao ra gihapon ang nagakahitabo, bug-os nga kapakyasan. Wala ko kini ginasulti aron nga mahimong lahi, ginasulti ko kini aron magmatinuuron sa atubangan sa Dios, nga sa Iyang Basahon ako nagabarug karong buntaga. Kita n'yo? Ang tanan nagakasangpot gayud sa kapakyasan, sa mao gihapon nga mga resulta.

²¹⁶ Karon atong tan-awon kung unsay nagakahitabo kon ang Dios (sa Iyang panahon ug kapanahonan) ug kon ang Iyang mga propeta wala ginakonsulta, nga basta na lang nagadepende sa teolohiya, mga sacerdote, og sa denominasyonalismo nga sama sa ginabuhat nato sa karong panahon. Karon, paminaw pag-ayo. Magkalamukat kining tanan. Pero kung anaa dinha ang tinuod nga Espiritu sa Dios, nan pagagiyahan Niini kini paingon sa Pulong; dili lamang sa usa ka bahin sa Pulong, kondili sa

tibuok Pulong gayud alang sa kinatibuk-an nga kapanahonan. Kita n'yo?

²¹⁷ Sa Adlaw sa Pentecostes, gigiyahan kadto sa Espiritu paingon mismo Dinha, sa Joel 2:38. Kita n'yo? Sa adlaw ni Luther, gigiyahan pud Niini kadto paingon mismo Dinha; si Wesley usab; niadtong kaulahiag Pentecostal nga kalihokan; apan laing kapanahonan na man kini, mao na kini ang pagtawag pagawas sa Pangasaw-onon. Dili sa milabay'ng duha ka libo ka tuig sa Pentecostes kaniado, o ang pagsubli, o ang pagbalik. Ang Pentecostes . . .

²¹⁸ Anaa kaniadto kang Luther ang Espiritu Santo, anaa sab kaniadto kang Wesley ang Espiritu Santo; kadto mao ang Pulong sa Dios nga dinihogan. Ug mibalik ang Espiritu Santo ngadto sa mga tawo sa kapanahonan ug hinay-hinay nilang naangkon ang pagbalik sa mga gasa. Hingsayran nila, nga pinaagi sa pagpasakop sa ilang mga kaugalingon ngadto sa Dios, nagsulti ang Espiritu Santo og laing mga pinulongan pinaagi kanila. Gipandongan nila sa ilang mga kamot ang mga masakiton, ug nangaayo ang mga niini. Nanagsayaw sila diha sa Espiritu. Kita n'yo? Mao kadto ang kapanahonan sa Repormasyon nga ginapahibalik ang iglesia ngadto sa kahan-ayan. Ug ang kaulahiag paghan-ay sa iglesia mao ang pagpahimutang sa mga gasa ngadto sa iglesia; sama ni Luther nga gipahimutang ang pagmatarung, gipahimutang ni Wesley ang pagpabalaan, gipahimutang sab sa Pentecostal ang mga gasa. Apan unsa ma'y ilang gibuhat? Ang mao gihapon nga sayup, sumala sa ginahulagway sa kinaiyahan diha sa lindog sa trigo, nanaghimo sila og denominasyon, nga batok sa Dios, og sukwahi sa Dios.

²¹⁹ Karon, hingsayran nato nga sa dihang . . . Dayon sa dihang nagkatipon-tipon na kining mga nagapangtapok og lindog, nanagbuhat sila og kaugalingon nilang ideya. Ug bisan pa . . . Sa dihang ang “bag-ong hilisgotanan,” sama sa tawag nila niini, mitungha gikan sa Assemblies of God, unsa ma'y ilang gibuhat? Dili nila Kini madawat. Bisin unsa pa nga Kamatuoran kini, ang bautismo sa Ngalan ni Jesus Cristo, sila na man gud ang Pangkinatibuk-ang Konseho. Gipangulohan na kini sa tawo, mao nga mibiya na kanila ang Espiritu. Oo! Ug dayon mitungha kini . . . Naistorya ko ang pipila sa inyong pinakamaayong mga lider; ingon sila, “Bueno, unsa na ma'y among buhaton karon?” Maulawan na man gud sila. Tungod, nasayod man sila nga mao kini ang Kamatuoran; kay kung dili pa, nan sila gayu'y mga buta sa espirituwal ug mga walay-hibangkaagan sa Biblia. Wala ko ginasulti kana para magsinalbahis, ha, kondili ginasulti ko kana nga may pagtahud. Tungod, wala ma'y ni usa ka bahin sa Biblia kon diin may si bisan kinsa nga gikabautismohan nga gamit ang mga titulong, “Amahan, Anak, ug Espiritu Santo.” Ug wala gayud kini gigamit hangtud pagkahuman na sa ekumenikanhong konseho, sa iglesiag Romano Katoliko. Ingon

niana mismo ang ginapahayag sa ilang katekismo. Usa kana ka Katoliko nga dogma! Dili nga doktrina sa Biblia, kondili usa ka Katoliko nga dogma. Ug kamong mga Methodist nagpagawas pud og inyong mga katekismo ug tanan na sama sa gibuhath nila, og hinay-hinay nga nagakapareho kanila. Apan pagkadangat ninyo sa Pentecostes, gipakaylap n'yo ang pipila nianang mga dogma, nga hangtud karon kamo nagapabilin gihapon niana.

²²⁰ Apan karon na ang pagtawag sa Pangasaw-onon, karon ang panahon sa dihang naablihan na ang Pito ka Selyo, karon ang panahon sa dihang bug-os nang pagaablihan ang mga butang nga nabiyaan sa mga repormador kaniadto; ug si Malaquias 4 lang ang makahimo niana, tungod kay nagkinahanglan man og direkta nga kapadayagan gikan sa Dios ngadto sa usa ka indibiduwal para buhaton kana. Husto kana! Dili kana mahimong moabot ngadto sa usa ka grupo, dili gayud. Kondili sa usa ra ka tawo! Mao kana ang gikasaad sa Dios diha sa mga landong mahitungod sa Iyang pag-abot alang sa Iyang Pangasaw-onon, ang usa ka Eliezer. Kita n'yo?

²²¹ Matikdi n'yo sa diha nga ang mga sacerdote, mga ministro, ug uban pa, makadawat og ilang pagdihog, ug tinuod mismo nga madihogan. Dinihogan kaniadto si David. Mao kana ang ginaingon sa Biblia. Apan, nakita n'yo, nahiadto siya sa sayup nga kapanguhaan, nahiadto siya sa sayup nga paagi. Gipaagi man niya ang iyang pagdihog sa dili mao nga pundok, ngadto sa mga tawo ug sa kung unsay ilang gihunahuna, ngadto sa mga kapitan, sa kung unsa usab ang ilang gihunahuna, imbis nga sa balaan nga paagi sa Dios aron mahibaloan kung unsa ang MAO KINI ANG GINAINGON SA GINOO, "Mao na ba kaha kini ang panahon para niini? Mao na ba kaha kini ang panahon para niini? Kabubut-on ba kaha kini sa Dios?"

²²² Dayon kung usa man siya ka tinuod nga propeta sa Dios, nan modangup gyud siya una sa atubangan sa Dios, og moingon, "Amahan, unsa man kini?" sama sa gibuhath ni Nathan kang David pagkahuman niadto.

Miingon si David, "Angay ba kanako nga mopuyo sa usa ka balay nga binuhath sa cedro, ug ang arka sa akong Dios anaa ra sa mga balong-balong dinhi?"

²²³ Ug tan-awa si Natanael, nga miingon, "David, buhata ang tanan nga anaa sa imong kasingkasing, kay ang Dios magauban kanimo. Usa ikaw ka dinihogan nga sudlanan sa Dios."

²²⁴ Apan ingon nga usa ka propeta, ug nasayup siya, ug obligado man ang Dios ngadto sa Iyang propeta. Niadtong gabhiona nagpakita Siya sa propeta, og miingon, "Lakaw suginli ang Akong alagad nga si David, ginadayeg Ko ang iyang kaisog, gihigugma Ko siya tungod niini, tungod siya'y usa ka tawong tukma sa kasingkasing Ko Mismo, ug nasayod Ko nga panahon na nga mamaingon niana ang Akong arka, nga mapahimutang

ilalum sa usa ka butang, apan dili Ko lamang . . . Dili pa kini ang maong panahon para mahitabo kana. Pagatugotan Ko ang iyang anak nga mao'y mobuhat niana, apan dili siya ang tugotan Ko nga mobuhat niana."

²²⁵ Dayon ania na si Nathan nga nagaabot dala-dala ang, "MAO KINI ANG GINAINGON SA GINOO, David, ang dakung kapadayagan nga naangkon mo ingon gyud ka sayup sama niadtong pagdala mo sa arka." (Uh-huh! Uh-huh! Kita n'yo?) "Ayaw kana buhata. Ayaw na pagpaninguha niana! Tungod ang sulti sa Dios nga Iyang 'ipabuhat kana sa imong anak.'" Mao kana! Kita n'yo? Ingon niana!

²²⁶ Dinihogan si David nga mosulti niadto tungod kay sa una pa lang nakita na man niya kadto, sama ra ni Abraham nga nangita og usa ka Siyudad dinhi ibabaw sa yuta. Kabalo mo, nagapangita siya niini tungod kay mopuyo man siya niini sa umaabot nga adlaw, si Abraham, diha sa maong Siyudad. Ug mipanaw siya sa pagpangita niini. Ug didto mismo sa mao rang yuta kon diin siya nangita, anaa lang kini mismo sa ibabaw niya kaniadto, ug magabalik sa Milenyum ug magapuyo siya diha niana nga Siyudad. Apan ingon nga usa ka propeta, siya'y gikatagana na ug dinihogan, nasayod siya nga aduna gyu'y usa ka Siyudad sa kon asa man, ug nagapangita siya niini. Apan, nakita n'yo, gililong pa kaniya ang kinatibuk-ang kapadayagan bahin niini. Tungod dili man kini para sa iyang kapanahonan. [Blangko nga bahin sa teyp—Ed.] . . . hangtud sa kang Juan, kon diin nakita niya kini nga nanaug sa Langit gikan sa Dios. Mao kadto ang Siyudad.

²²⁷ Kita n'yo na, ang tanang butang kinahanglan gyud nga anaa sa panahon niini. Ngani nagatanum man mo og trigo inig tingpamulak ug . . . o inig tinglagas ug anihon kini sa sunod nga ting-init. Kita n'yo? Kinahanglan motubo ùna kini gikan sa pagka-lindog, dayon motubo ngadto sa pagka-uhay, ug pagka-tipaka, ug padayon hangtud sa . . . Kinahanglan nga anaa kini sa panahon. Ang tibuok kinaiyahan anaa gayud sa kahan-ayan. Gihimo sa Espiritu sa Dios ang kinaiyahan, ug mao nga nagakatakdo pud ang Dios ug ang tibuok kinaiyahan. Ang tanang butang nga gipahimutang sulod sa templo usa kana ka paghulagway sa kung unsay iyang nakita sa Langit.

²²⁸ Pagmakita n'yo ang usa ka kahoy nga nagapanglimbasug nga mabuhi, nagapasabot kana nga adunay usa ka kahoy nga wala nagakamatay. Pagmakita pud ninyo ang usa ka tawo nga nagapanglimbasug nga mabuhi, nagapakita lang nga dunay usa ka lawas nga nagahulat sa kon asa man nga dili na nagakamatay. "Kung kining yutan-on nga tabernakulo matun-as man aduna na kita'y usa nga nagahulat." Gitugotan ako sa buutan nga Langitnong Amahan nga makaadto sa luyo nianang tabil ug makita kana usa niadto ka adlaw. Pila man ang nakadungog na sa . . . ? . . . Kita n'yo? Ang pagtan-aw sa luyo sa tabil sa panahon.

Didto sama ra nga nagawali ako kaninyong tanan, atua usab sila didto. Ang mga kalag nga anaa ilalum sa halaran, nga nanagtuaw, “Unsa pa ba ka dugay?” Dili nga tinumo-tumo lang, kondili usa mismo ka tawong may kahibalo: “Unsa pa ba ka dugay, Ginoo?” Kita n’yo? Ingon niana usab ang atong mabati karon, pag ang atong edad, sama na kang Igsoong Bill Dauch nga nubenta’y-tres anyos na nga ania nagalingkod dinhi. May sa kung unsang butang nga nagapangandoy alang nianang pagkabatan-on pag-usab. Adunay butang. . . Igahatag n’yo ang unsa mang butang. Gusto ko gayud. Si Igsoong Jack usab, ug ang tanang uban pa kanato. Magabalik sab, si Igsoong Hierholzer, nga ania dinhi, sa nianang pagkabatan-ong lalaki. Para sa unsa man nga ginatinguha natong mahitabo kana? Para ba mahimong batan-on pag-usab ug magbagdoy-bagdoy? Dili, sir! Kondili tungod nabati man nato nga magkaaduna gyud kita og daghang panahon para himayaon kining Dios nga atong ginahigugma.

²²⁹ Ug minahal kong mga kaissoonan, aduna ko’y Mensahe niining buntaga, adunay usa ka Dapit tabok sa suba nga ginatawag nilang mahimayaon nga hangtud sa kahangturan. Didto pagahimayaon nato Siya sa tanang kapanahonan, ug sa tanang panahon, ug sa Eternidad. Nganong ginabati man nato kana? Tungod kay ang kahiladman nagapanawag man ngadto sa Kahiladman. Ug sa diha nga nagapanawag ang kahiladman, siguradong aduna gyu’y Kahiladman nga motubag nianang pagtawag kay kung wala nan wala unta’y pagtawag. Sa dili pa magkaaduna og kabuhatan, kinahanglan aduna gyud una og usa ka Magbubuhat nga mao’y mobuhat sa kabuhatan, o wala unta’y. . . Nagapakita kana sa mismong kapanghimatuoran nga aduna gayu’y Magbubuhat.

²³⁰ Matikdi kining mga sacerdote, nga tanan sila wala sa kahan-ayan. Matikdi n’yo ang pagdihog, okey man, walay unsa mang sayup sa pagdihog. Mao ra usab kaninyo nga mga Pentecostal, apan tan-awa kung unsa na nga agianan ang ginasudlan ninyo karon. Nausab na ang panahon sukad niadtong sa Pentecostes, lahi na ang nagakahitabo. Kung wala siguro sa propeta sa kayutaan kaniadto, nan tingali’g husto ra unta si David. Tinuod kana. Apan atua man didto si Nathan, nga gipanghimatud-an, gikatagana, og gipamatud-an na sa Dios ingon nga usa ka propeta.

²³¹ Himatikdi! Ang arka diha sa Biblia sa kanunay usa kana ka tipo sa Pulong para kanato, tungod ang Pulong man sa Dios ang atua sa arka. Ug kana. . . Matikdi ang arka nga ilang gidala kaniadto, tan-awa kung giunsa nila kadto pagdala. Wala kadto gipahimutang diha sa orihinal nga puwesto niini nga gikatagana nang daan sa Dios. Bueno, miingon ang Dios dinhi sa Kasugoan nga kinahanglan kining. . . kung unsa ang angay’ng pagabuhaton niini, kung unsaon sa pagbalhin niining arka, ug

kung kinsa ang angay'ng magbalhin niini. Apan si David, ilalum sa iyang pagdihog...

²³² Igsoon ko, ayaw n'yo kini sipyata. Ug mga igsoon kong babaye, kamong nagatinguha nga mamahimong mga babayeng magwawali ug uban pa, ayaw n'yo kini sipyata. Bisan unsa pa ang pagdihog kaninyo, kinahanglan ninyong mapahimutang sa katungdanan nga gitagana sa Dios. Maayo man ang pagdihog ni David, apan sa diha nga gibuhat niya kadto nadasig siya ug milagpas siya sa utlanan. Unsa ma'y iyang gibuhat? Milagpas siya sa utlanan. Imbis nga ipahimutang ang arka diha sa orihinal nga pagkabutang niini, iya hinoon kining gitungtung sa usa ka bag-ong carro ug dili ibabaw sa mga kasingkasing sa mga Levihanon. Kinahanglan man unta kadto nga ipapas-an diha sa abaga sa mga Levihanon, nga anaa sa ibabaw sa kasingkasing. Ang Pulong wala man diha sa hunahuna, anaa Kini sa kasingkasing! "Dili sa usa ka bag-ong carro." Unsa man kadto? Usa ka... Nagrepresentar kadto sa usa ka bag-ong butang, ang gibuhat ni David kaniadto, nagapahinungod sa tanang denominasyon nga managpanungha. Ang Pulong sa Dios dili man pinaagi sa... angay'ng dalhon sa pang-estado nga mga presbiterio o mga obispo, ug uban pa, sa mga denominasyon. Kini mao ang Bautismo sa Espiritu Santo nga anaa sa kinasuloran sa kasingkasing sa tawo, ug dili diha sa usa ka pang-simbahan nga kalihokan. Ang Balaang Espiritu mao'y usa ka bahandi sa gugma sa Dios nga anaa sa kinasuloran sa kasingkasing sa mga kalalaken-an ug mga kababayen-an aron nga magmasinugtanon. Kita n'yo?

²³³ Diha unta sa mga abaga sa Iyang mga ministro, ang Iyang mga ministro mao man ang mga Levihanon. Ipapas-an unta kadto diha sa ilang wala nga abaga ug pas-anon kadtong arka nga nakaingon niana, tungod kay anaa man kadto ibabaw sa ilang kasingkasing. Aduna kanila ang palas-anon nga Pulong diha sa ilang kasingkasing. Amen! Pero karon aduna na kamo og palas-anon nga inyong denominasyon diha sa inyong kasingkasing, ang palas-anon nga inyong kongregasyon: kon pagatukoron ba ninyo *kini*, o buhaton *kana*, o kaha magbuhat og uban pang butang. Ang palas-anon sa kung unsa pa ka daghan ang maaghat ninyo ngadto sa inyong denominasyon; imbis unta ang palas-anon nga Pulong sa Ginoo, aron ang bugtong makita sa mga tawo mao lamang ang Pulong sa Dios ug wala na'y uban pa. Apan karon gidala na man ninyo Kini diha sa usa ka bag-ong carro. Kita n'yo? Ginadala na nila Kini dinha sa ekuminikanhong konseho, og ginapas-an pa gani. Dili ko gusto nga mahimong masinawayon, ug tabangan unta ako sa Dios. Ginasulti ko lang gyud kaninyo ang Kamatuoran.

²³⁴ Bueno, ingon nga naimpluwensiyahan na sa mga kredo ug sa mga ekuminikanhong konseho, nan ang Pulong, ang tinuod nga Pulong sa panahon alang niadto nga kapanahoan wala gyud

gitagad, tungod nadala na man sila sa dakung emosyon. Apan si David, ang dinihogan nga hari. . . Hari siya kaniadto, apan dinihogan siya nga *hari*. Moingon mo, “Usa ako ka ministro, nga dinihogan.” Kung mao man pagpabilin lang ingon nga usa ka ministro, ayaw na pagpaninguha nga mamahimong usa ka propeta. Kita n’yo? Kung ebanghelista ka man, nan pagpabilin lang ingon nga ebanghelista.

²³⁵ Hinumdumi n’yo si Uzzias, niadtong mga adlaw ni Isaias, ang batan-ong hari. . . ang batan-ong propeta. Si Uzzias usa siya ka halangdon nga tawo, og dinihogan nga tawo, gipanalanginan siya sa Dios; gipanalanginan siya mismo. Oo, nakawali na ko kaninyo mahitungod niana usa niadto ka higayon dinhi. Ug usa niadto ka adlaw nahimo siyang mapahitas-on kaayo hangtud nga nagdahum siya nga mahimo ra niyang buhaton ang katungdanan sa usa ka sacerdote, ug mao nga mikuha siya og kalayo ug miadto sa atubangan sa Ginoo. Ug ang. . . Gisultihan siya niadtong mga sacerdote, “Ayaw kana buhata, Uzzias!” Apan nagmapahitas-on gyud siya. Dili na siya masultihan sa propeta. Nasayod man ang mga sacerdote sa ilang katungdanan, ginatuman pud nila ang ilang katungdanan, ingon niya, “Dili kana imohang katungdanan, Uzzias. Mao nga ayaw kana buhata!”

²³⁶ Bueno, iya ra silang “Gipapahilum!” Ug misulod siya nga may dala—may dala nga kalayo, aron maghalad, og giangkong ang katungdanan sa usa ka sacerdote; dinihogan man siya nga hari, dili nga usa ka sacerdote. Ug gisultihan siya niadtong mga sacerdote, “Usa ikaw ka maayo kaayo nga hari, dinihogan ka, ngani gipanalanginan kami sa Dios tungod kanimo. Apan usa man ikaw ka hari, dili nga usa ka sacerdote.”

²³⁷ Ug kamong mga pastor dili n’yo ngay’ng sultihan ang usa ka propeta sa kung unsay pagabuhaton, o kamong mga ebanghelista usab nga sultihan ang usa ka pastor. Kita n’yo, ang matag usa aduna man og iya mismong katungdanan kung bug-os kini nga napaila.

²³⁸ Busa misulod siya nga may dala nga kalayo, ug gihampak siya og sanla ug namatay.

²³⁹ Bueno ania sab si David, nga hari. Gipaninguhaan ni David nga buhaton ang mao gihapong butang kaniadto. Giangkong niya mismo kadto nga katungdanan. “Bueno, maayo man kana, mangadto na ta.” Mitan-aw siya ngadto sa mga tawo, “Unsa ma’y imong masulti, kapitan? Aduna ka ma’y napulo ka libo.”

²⁴⁰ “Himaya sa Dios, David, nabati ko ang Espiritu.” Oh, nabati gyud niya! Nabati gyud niya Kini. “Unsa ma’y tan-aw mo, David? Nabati mo ba Kini?”

²⁴¹ “Himaya sa Dios, nabati ko Kini sa tibuok kong lawas! Ato kining susihon ug hibalong kung husto ba kini, atong tan-awon. Asa ba nahisakop ang arka?”

242 “Dinhi kanato! Nahisakop kini kanato.”

243 “Si kinsa ba ang angay natong konsultahon? Siyempre, ang arka.” Sama ra gayud niadtong yuta nga panag-iya sa—sa Israel og dili sa mga Filistihanon. Husto kana, panag-iya nila kadto. “Ug nabati ko ang pagdihog, usab.”

244 Ang mga kapitan sa mga tinaggatus, og ang tibuk katilingban, “Himaya sa Dios!” Nanagpalakpak sila, ug nanagsinggit sila, ug nanagsayaw sila, ug naglukso-lukso.

245 Anaa kanila ang Espiritu, apan unsa kaha’y gihunahuna sa Amahan? “Gipadala Ko mismo si Nathan, ang maong propeta didto! Nasayod na unta sila sa kung unsay buhaton, ug mao usab si David, apan karon siya’y bug-os gayud nga nadasig ug milagpas na mismo sa iyang utlanan ug miadto na aron buhaton *kini*.”

246 Bueno, matikdi n’yo, “ipapas-an Kini kinahanglan diha sa mga abaga” mao ang orihinal nga plano sa Dios. Ngani adunay lima ka mga *gikinahanglan*. Gusto kong isulat ninyo ang mga niini, kung kamo’y . . . nakita ko nga nagasulat kamo.

Ug baynte minutos na, mga baynte minutos na human nga milabay ang alas diyes, busa paningkamotan kong mahuman pagka-alas onse, kung mahimo. Mao nga magdali na ko sa ingon ka dali nga mahimo ko.

Bisan unsa pa ka mahimong sinsero ang usa ka tawo sa pagbuhat og usa ka buluhaton sa Dios, bisan unsa pa siya ka sinsero, unsa pa ka dinihogan, unsa pa ka dakung Presbyterian, Baptist, o Pentecostal; bisan pa kung ikaw usa ka obispo, diyakono, unsa ka man, pastor man, ebanghelista, propeta, o unsa man; aduna gayu’y lima ka mga *gikinahanglan* nga kinahanglan unang hunahunaon. Bisan unsa pa ang pagdihog, bisan unsa pa kana ka maayo, bisan unsa pa ang pagsinggit sa mga tawo, bisan ang tanan-tanan nga ang Espiritu ang nagabuhat, aduna gyud ùna og *gikinahanglan*.

247 Karon, mga igsoon ko, samtang ginaandam n’yo ang inyong mga papel, nasabtan ba ninyo karon kung ngano? Karon timani, gihunahuna ninyong tanan, ug gikatudlo na sa taliwala ninyo, dili ingon . . . (kita n’yo, nagapamulong baya ko sa tibuk nasud) . . . nga wala ako nagatoo sa pagsulti og laing mga pinulongan. Nagatoo ako sa pagsulti og laing mga pinulongan, apan makasulti ka man sa gihapon og laing mga pinulongan ug bisan wala kanimong Espiritu Santo. Ang Unang Mga Taga-Corinto, nagaingon, “Bisan kung ako magasulti og mga dila sa mga tawo ug sa mga manulonda, wala gihapon ako’y kapuslanan.” Kita n’yo? Pagdihog kana sa Espiritu Santo, nga walay unsa man nga kahilambigitan sa kalag nga anaa sa kinasuloran nimo. Makasulti ka man og laing mga pinulongan ug sa gihapon ginasalikway mo ang Pulong. Nasaksihan ko na kana nga nahitabo, ug nakasaksi na sab kamo niana. Kita

n'yo? Mahimo pud gani nga magwali ang usa ka babaye sa Maayong Balita ug... Kita n'yo? Mahimo nila ang tanan... Bisan ginapaputlan nila ang ilang buhok, ug makasinggit man gihapon ug makasulti og laing mga pinulongan ug tanan nang uban pa. Uh-huh, eksakto gayud. Kinahanglan gyud ninyo nga mosubay sa Kamatuoran sa Pulong.

²⁴⁸ Matikdi! Bisan unsa pa ka sinsero tingali ang usa ka tawo, bisan unsa pa ka daku ang paggamit kaniya sa Dios, bisan unsa pa siya, kinahanglan gyud nga ingon niini siya: kinahanglan nga... Ang butang nga iyang ginapamulong kinahanglan nga tukma gayud sa panahon nga sumala sa Biblia. Adunay moingon, “Bueno, si Moises kaniadto.” Nasayod ko kung unsa ang gibuhath ni Moises kaniadto, apan dili man kana ang ginabuhath sa Dios sa karong panahon. “Bueno, kaniadto man lagi, traynta ka tuig na ang milabay, ang ingon ni Luther...” Tingali'g maayo kana, apan dili na man ingon niana ang Iyang ginabuhath karong panahona. “Bueno, kuwarenta ka tuig na ang milabay, miabot ang Pentecostes.” Apan dili na man ingon niana ang Iyang ginabuhath karong panahona. Kita n'yo? Kinahanglan nga tukma gayud kini sa panahon.

²⁴⁹ Kinahanglan pud nga sumala kini sa Kasulatan. Kinahanglan nga tukma kini sa panahon, ang ikaduha. Ikatulo, ug kinahanglan nga sumala kini sa kung unsay gikaingon sa Pulong sa Dios nga mamahitabo.

²⁵⁰ Ug moingon mo, “Himaya sa Dios! Gikunsaran ako sa Espiritu Santo, alleluyah, sama sa pagkunsad Niini sa Adlaw sa Pentecostes kaniadto.” Apan mahimong lahi na man sa karong panahon. Gikunsaran Niini si David, usab, dili ba? Oo, mikunsad Kini. Gikunsaran man sab si Uzzias, apan sayup kadto! Kita n'yo, mao nga kinahanglan n'yo karon nga mas magpa-halawom pa kaysa niana. Kita n'yo? Kinahanglan n'yong mas magpa-halawom pa kaysa niana. Karon, ayaw baya mo og kahiubos, magma—magmatinahuron lamang.

²⁵¹ Ug himatikdi, ug kinahanglan usab nga moabot kini ngadto sa tawo nga gipili sa Dios. Dili nga pagpili sa denominasyon, dili nga pagpili sa mga tawo, kondili sumala gayud sa pagpili sa Dios. Ug kung usa man kini ka mensahe gikan sa Dios, mahitungod sa dakung kapadayagan gikan sa Dios, nan kinahanglan nga moabot kini ngadto sa Iyang propeta. Karon, kung kinahanglan ninyo ang Kasulatan bahin niana, kana'y sa Amos 3:7. Kita n'yo? Bueno, kinahanglan gyud nga ingon niana.

²⁵² Adunay lima ka butang nga gikinahanglan: Kinahanglan nga tukma kini sa panahon. Kinahanglan nga nahiuyon kini sa panahon nga gikasulti sa Dios nga mamahitabo. Kinahanglan nga nahisulat kini diha sa Pulong sa Dios. Kinahanglan nga nahiuyon kini sa panahon sa gikatakda nga oras sa Dios, kita n'yo. Ug kinahanglan sab nga sumala kini sa pagpili sa Dios.

²⁵³ Ug wala pud kinahanglana sa Dios ang si bisan kinsa kanato aron nga hubaron ang Iyang Pulong, tungod ang Dios man mao ang Kaugalingon Niyang Tighubad. Dili Niya kinahanglan ang atong mga seminaryo. Dili Niya kinahanglan ang atong kaalam, wala man kini'y kapuslanan. Kita n'yo? Ngani aduna ma'y kaalam si Eva, uh-uh, pero wala niya mahisabti kaniadto ang maong Interpretasyon tungod sa iyang kaalam.

²⁵⁴ Moingon mo, "Oh, grabe, kana nga lalaki usa gyud ka utokan nga tawo." Bueno, wala kana nangahulogan og unsa man. Tinuod. Utokan baya nga tawo si Ahab. Utokan sab nga tawo si Belsasar. Si Satanas pud ang pinaka-maalam ug maliputon, malinglahon, og wala ni usa kaninyo ang makasarang kaniya, wala gayud.

²⁵⁵ Mao nga wala ako nagadepende sa . . . wala . . . sa unsa man nga kaalam, kondili nagadepende lang ako sa Dios. Kita n'yo? Unsa ba ang Dios? Siya mao ang Pulong. Ug kung ingon-ana ginaunsa man paghubad sa Dios ang Kaugalingon Niyang Pulong? Paminaw mo og ayo, ayaw sipyata kini. Ginaunsa man paghubad sa Dios ang Kaugalingon Niyang Pulong? Pinaagi sa pagpahitabo Niini, dili nga *usa* lang dinhi, kondili ang *tanang* gyud niini alang sa maong panahon.

²⁵⁶ Dili ingon nga, "Noe umadto ka ug magwali, tungod dinihogan ka man," kondili, "Magbuhat ka og arka, butangi kini og mga pultahan, himoa kini nga *ingon-niini*, ug *ingon-niana*." Unsa kaha kung gibutang niya sa ibabaw ang pultahan imbis nga sa ubos? Unsa kaha kung gibutang niya sa ubos ang bintana, og sa ibabaw ang pultahan? Kita n'yo? Mao nga kinahanglan kining igatudlo sumala sa panahon, tungod kay eksaktong mao kana mismo ang pagagamitan sa Dios para niini. Kinahanglan sa ingon niana gyud nga paagi, ug kinahanglan nga moabot kini uyon sa pagdihog.

²⁵⁷ Nadungog ko ang usa ka lalaki nga miingon usa niadto ka higayon, miingon, "Nagatoo ko nga nagaampo kana nga tawo para sa mga may sakit, nagatoo pud ko nga maayo kana. Apan ingon nga usa ka propeta," miingon, "nagatoo ko nga siya'y propeta sa Dios; apan ingon nga usa ka magtutudlo, aba, usa man siya ka 'Jesus Only.'" Unsa kaha . . . Unsa kaha nga matang sa tawo ang tawag ninyo niana? Usa ka tawo nga wala nahibalo sa kung unsay iyang ginasulti.

²⁵⁸ Ang mismong pulong nga *propeta* nagakahulogan man nga "siya'y usa ka tigpadayag sa Pulong sa Dios," og ang interpretasyon nagaabot lamang kaniya. Ug mao kana'y hinungdan kon ngano nga karong panahona nagkinahanglan gayud kita niining halangdon nga tawo nga gikaingon nang igapadala para kanato diha sa porma sa propetang si Elias, tungod kay kini man ang kapadayagan sa Dios nga igapahayag nganhi kanato pinaagi sa pagpanghimatuod, sa pagpakita nga

mao na kini ang adlaw ug ang takna ug ang panahon nga gisaad sa Dios nga mamahitabo. Ug, timan-i n'yo, nga ang maong tawo pagasultihan siya og dili maayo; ingon na niana sa una pa, og kanunay na gyud nga mamaingon niana. Igalalikway, sama ra sa tipaka nga mohimulag. . . Sa sugod dawaton pa siya, tungod kay ginahawiran ra man sa tipaka ang trigo hangtud nga mahimo na niining motungha para mabulad sa adlaw. Pagasilongan lamang sa Pentecostal ang Mensahe, ablihan ang pultahan para Niini hangtud nga mokaylap Kini, ug pagkahuman mohimulag na ang tipaka, ug mabulad na ang trigo diha sa Presensiya sa Anak, kita n'yo, aron mahinog.

259 Wala na'y unsa man nga denominasyon, timan-i lang ninyo. Si Igsoong Jack nga ania dinhi usa man ka magsasaysay, daghan kaninyo dinhi ang mga magsasaysay usab. Wala pa sukad nagkaaduna og rebaybal nga mga tulo ka tuig pagkahuman sa maong rebaybal wala sila nagtukod og usa ka denominasyon gikan niini. Husto ba kana? Ug kining kaulahian nga dakung kalihokan sa milagro sa Dios sa niining katapusang mga adlaw, baynte ka tuig na kining nagapadayon; ug usa ka milyon ka milya ang kalay-on niini sa denominasyon, og nagakahalayo pa sa kanunay; nagahimulag na ang tipaka, wala na'y pagpakigtimbayayong, wala na kini og unsa man nga pagpakighilambigit Niini. Kita n'yo? Sa kanunay nagahimulag kini gikan Niini. Dili na mahimong magkaaduna pa, tungod anaa na kini sa pagka-trigo karon. Apan kita'y lunhaw pa kaayo. Uh-huh. Husto kana. Kinahanglan pa natong mabulad diha sa Presensiya sa Anak aron mahinog, mao lang kana. Lunhaw pa kaayo; wala pa kanato ang pagkasinsero, ang pagkasagrado, ang maong butang nga anaa unta sa atong taliwala, aron masayran nga ang Espiritu sa buhi nga Dios, nagapamuhat diha sa Iyang Pulong ug ginapakita kanato ang mga butang, sa umalabot.

260 Aduna pud kita og mini nga mga manunundog nga nanagpanungha. Unsa ma'y pagabuhaton niana? Aron manglimbong. Miingon ang Biblia nga manglimbong sila. "Maingon nga si Jannes ug si Jambres misupak kang Moises, mao man usab kini sila sa kaulahiang mga adlaw." Kita n'yo? Buhaton nila ang mao gihapong butang, manungha sila aron sundog-sundogon Kini, sa ingon gayud ka tukma. Kita n'yo? Mao nga magbantay gyud! Tan-awa n'yo ang Doktrina sa Biblia. Tan-awa n'yo ang mensahe nga naganunot nianang mga ilhanan! Ang karaang mensahe ba gihapon kana? Kalimti na kana!

261 Ngani nagpadala ang Dios og mga milagro ug mga ilhanan aron danihon ang pagtagad sa Iyang katawohan. Sa dihang miabot si Jesus nga nagpang-ayo sa mga may sakit ug uban pa, mao man usab ang mga propeta. Naghunahuna sila, "Oh, himaya, moabot na Siya, Siya'y mamahimong usa ka Fariseo. Siya'y mamahimong usa ka Saduceo."

²⁶² Apan miingon Siya, “Kamong mga kaliwat sa mga bitin.” Miingon, “Ang yawa mao ang inyong amahan, ang iyang mga binuhatan inyong pagabuhaton.” Ingon pa, “Gawas kon mokaon kamo sa unod sa Anak sa tawo, ug moinom sa Iyang Dugo, walay Kinabuhi diha kaninyo.” Wala Niya Kini gihatagan og katin-awan. Dili pud Niya Kini kinahanglan hatagan og katin-awan. Alleluyah. Para man kadto sa laing panahon. Uh-huh. Gisulti lang Niya kung unsa ang kinahanglan Niyang isulti, “Sa kanunay ginabuhat Ko ang makapahimuot sa Amahan, ug kana mao ang pagtuman sa Iyang Pulong. Kung dili Ko man ginabuhat, kon ang Akong kinabuhi ug ang Akong mga buhat wala nagatukma sa Iyang Pulong nga angay Kong pagabuhaton, kung ingon-ana ayaw ninyo Ako toohi, Ako dili mao Siya; apan kung mao man, nan toohi n’yo ang mga buhat kung dili kamo makatoo Kanako,” ang ingon Niya.

²⁶³ Matikdi n’yo karon kining mga *gikinahanglan* nga angay’ng mamatuman.

²⁶⁴ Karon, kita n’yo, wala gipadayag sa Dios ang maong butang ngadto kanila pinaagi sa Iyang gikatagana nga paagi, gipadayag Niya kadto pinaagi og pagdihog, apan anaa kadto sa sayup nga agianan. Kita n’yo, maayo man ang pagdihog, apan kung anaa kini sa sayup nga agianan, nan sayup sab ang mahimong pagpaagi niini. Sama ra pananglitan pagmokuha ka og usa ka bala ug ipabuto kini diretso sa usa ka target, og mopaingon kini mismo sa maong target, apan mahimo man kining mapasimang sa huyop sa hangin. Bueno, sa inyong sakyanan, pag magpadagan kamo diha sa dalan og saysenta, setenta ka milya kada oras ang kakusgon ug paliron kamo sa huyop sa hangin, mahimo ra man ninyong idiretso pabalik ang mga ligid, og ilinya kini pag-usab diha sa dalan. Apan sa usa ka bala dili n’yo mahimo ang ingon-ana; wala ma’y bisan unsa dinha para mapadiretso n’yo kini, mao nga dili gyud niini maigo ang maong target. Kita n’yo, kinahanglan kining modiretso ra sa orihinal niini nga agianan.

²⁶⁵ Mao usab ang Pulong sa Dios nga kinahanglan moagi sa orihinal Niini nga agianan. Walay diyutay’ng huyop sa hangin ang makapasimang Niini; walay gamay’ng denominasyon, o unsa man, ang makapasimang Niini; wala pu’y diyutay’ng pagpanglutos ang makapasimang Niini: nakatanos Kini ngadto mismo sa maong puntirya! Moigo Kini didto, usab. Ug dayon ang Dios, sa diha nga maigo Niini ang puntirya, panghimatud-an Kini sa Dios, “Puntingan!” Uh-huh, eksakto gayud sa kung unsay Iyang gisulti nga Iyang buhaton. Ania kini sa mga Kasulatan, kining, “MAO KINI ANG GINAINGON SA GINOO, ‘Mahitabo kini!’” Ania kini. Kita n’yo? Ingon niana.

²⁶⁶ Bueno, wala kadto gipadayag sa Dios nga sumala sa Iyang gikatagana nga paagi. Busa mipadayon sila sa pagbuhat niadto nga gawas sa Iyang Pulong, ug wala sa panahon, sama ra sa

ilang ginabuhay sa karon. Ang mga kalalaken-an, bisan unsa pa sila ka sinsero, pag mosulay gani sa pagbuhay alang Kaniya og usa ka buluhaton nga wala sa Iyang gikatagana nga paagi, sa kanunay magkaproblema gyud sila niini. Sama ni Balaam, nagdahum kaniadto si Balaam nga nagabuhay siya og buluhaton sa Dios.

267 Sa hunahuna n'yo ba nagapamakak ang Dios? Ginausab ba sa Dios ang Iyang hunahuna? Bueno, pero ang mga tawo karong panahona nanaggawi man nga mora ba og may giusab Siya. Sa dihang miingon Siya sa mga kababayan-an nga dili pagaputlan ang ilang buhok, nagaingon sila, "Puede ra namo kining putlan, si Dr. *Ingon-ani-ug-ingon-ana* miingon man nga puede ra kono namong putlan. Miingon pud si Igsoong *Ingon-ani-ug-ingon-ana* nga pagkamabaw ra gayud kono sa imong panghunahuna." Uh-huh, uh-huh. Kita n'yo?

268 "Bueno, mahimo ba *kining* mahitabo? Mahitabo ba *kini*?"

269 "Oo, uh-huh, mao kana ang giingon ni *Ingon-ani-ug-ingon-ana*."

270 Wala gayud ginausab sa Dios ang Iyang hunahuna.

271 Nagatoo ba mo nga usa ka propeta si Balaam? Miingon ang Biblia nga ingon niana siya. Nagatoo ba mo nga usa siya ka propeta? Karon, hinumdumi, nga miadto kaniya si Balak ug miingon, "Umadto ka ug tungloha kini nga mga katawohan, kay gilukop na nila ang tibuok nawong sa yuta. Gani dili sila usa ka denominasyon, dili usa ka nasud, sila'y usa lamang ka napatlaag nga pundok; ug kita man ang mga tawong dungganon sa yuta. Karon umadto ka didto ug tungloha kana nga katawohan, ug bayaran ko ikaw para niana."

272 Ug gibuhay mismo ni Balaam kung unsay angay'ng buhaton sa usa ka propeta, ingon siya, "Dili ako moadto. Paghulat lang mo dinhi, sa tibuok gabii, hibaloon ko ùna kung unsay igasulti sa Dios nga buhaton."

273 Busa misulod siya, ingon niya, "Ginoo, aniyay pipila ka mga tawo dinhi nga mianhi kanako, gusto nila nga moadto ako ug tunglohon ko kono ang usa pa ka katawohan didto." Ingon pa, "Unsa ba'y gusto Mo nga pagabuhaton ko mahitungod niini?"

274 Miingon ang Dios, "Ayaw pag-adto, tungod sila'y Akong mga katawohan!"

275 Migawas si Balaam, miingon, "Pamalik na mo sa inyong balay. Dili ko mahimo nga mouban kaninyo, nagsulti kanako ang Dios nga dili gayud." Karon, mao kana ang orihinal nga Pulong sa Dios: "Ayaw pag-adto!"

276 Bueno, dayon namalik sila, og miingon, "Kabalo ka, dili man maminaw ang imong obispo."

277 "Bueno," ang ingon sa hari, "sultihan ko kamo kung unsay atong buhaton. Nagkinahanglan man siya og diyutay'ng salapi,

nagatoo ko nga makapaaghat kana kaniya. O kaha tingali'g himoon ko na lang siyang pang-estado nga presbiterio, siguro hatagan ko siya og usa ka dakung butang nga pagabuhaton. Tingali'g himoon ko siya nga obispo, dili n'yo masulti kung unsay mahimo kong buhaton. Ania, sultihan ko kamo kung unsay akong buhaton. Kamo nga mga lalaki wala man gud kamo'y igong edukasyon para maaghat siya sa unsa mang paagi; ngani ang inyong *his* ug *hain'ts*, ug *tote* ug *fetch* ug *carry*, dili man husto. Dili gyud siya maminaw kaninyo, mao nga magpadala 'ta didto og usa ka grupo nga edukado gyud, nga mas dungganon."

278 Nangadto sila didto, miingon, "Doktor Balaam, *Doktor Balaam*, mga pagpangumosta diha kanimo. Ginapaabot ko kanimo ang mga pagpangumosta gikan sa hari."

279 "Maayong buntag, mga igsoon." Kita n'yo?

280 "Karon, Doktor Balaam . . ." Ug, oh, ang bokabularyo, giaplikar gayud nila kadto. Ug miingon, "Bueno, miingon ang hari nga ipataas kono ka niya, ug hatagan niya usab ikaw og dakung kadungganon. Ug, kabalo ka, naghanyag lang baya sila kanimo og *ingon-ini* ka dakung salapi aron dawaton kini nga sugo, apan miingon ang hari nga iya kono kining triplehon, o himoon kining upat-ka-pilo, kung moadto ka lang ug dawaton kini." Dayon, nangatol na ang mga kamot ni Balaam, bisan pa man. Nagkaaduna siya'y hinangal nga mga ideya ug nagpahunahuna gyud kadto kaniya.

281 Karon, hinumdumi, nga mitawag siya sa Dios tungod niini, ingon nga dinihogan, apan sa gilayon gipugos niya ang Dios nga mopahilayo gikan sa orihinal nga plano. Ug eksaktong ingon niana mismo ang gibuhay sa mga Pentecostal! Aron mamahimong inila, kamong mga Oneness, kamong mga Trinitarian, tungod lang sa popularidad nanaghimo kamo og denominasyon aron mamahimong lahi, nag-organisa kamo ug patay na kamo! Dili na kamo makabangon pag-usab. Apan, nakita n'yo, dapat nagpabilin unta kamo diha sa Dios sa orih- . . . gipagawas na Niya kamo gikan diha sa Assembly aron himoon kamong usa ka katawohan, apan nag-organisa hinoon kamo ug namalik mismo sa mao rang sinuka nga inyong (pasayloa ko) gigikanan, sa mao gihapong butang nga inyong gigawasan, "Sama sa usa ka iro nga nagabalik sa suka niini ug ang usa ka baboy ngadto sa lunangan niini." Pasayloa ko nga nasulti ko kana, pasayloa n'yo ako, dili gyud kana husto dinhi niini nga entablado. Kita n'yo? Nasulti ko lang kana tungod sa pagkatawhanon. Matikdi n'yo karon ang . . . mao kana'y buut kong ipasabot, ang makasuka. Ingon niana unta ang pagkasulti ko niini. Okey ra ang maong pulong, apan sayup lang ang paggamit. Kita n'yo? Okey ra diay ang paggamit niini, apan dili lang maayong paminawon, kabalo na mo. Suka, "Sama sa usa ka iro nga nagabalik sa suka niini."

²⁸² Kung ang Assemblies of God, ang Pangkinatibuk-ang Konseho, ang nag-organisa sa Pentecostal sa sugod pa lang ug nahilambigit sila dinha mao nga dili nila madawat ang mga kapadayagan, wala ba mo mahibalo, Oneness, nga gibuhat n'yo usab ang mao rang butang? Unsaon man ninyo sa pagpakadawat sa usa ka Mensahe mahitungod sa “binhi sa serpente, Eternal nga kasiguradohan,” ug niining uban pang mga butang nga miabot? Kamo'y bug-os man gud nga organisadon na kaayo hangtud nga dili na gani ninyo Kini pasudlon sa inyong pultahan, uh-huh, uh-huh, sama ra usab sa gibuhat ni Balaam. Apan wala gyud giusab sa Dios ang Iyang hunahuna.

²⁸³ Busa miadto si Balaam ug miingon, “Ginoo, karon ania, aduna na gyud ko'y kahigayonan karon nga mamahimong mahinungdanong tawo. Kabalo Ka nga usa baya ako ka dili-mahinungdanong tawo, apan aduna na ako'y kahigayonan nga mamahimong mahinungdanon. Unsa ma'y Imong ikasulti karon bahin niini, Ginoo?” Bueno, dili gyud niya angay'ng isulti kana! Tungod hingsayran na man niya unta ang eksaktong gisulti sa Dios nga pagabuhaton!

²⁸⁴ Mao man usab ang matag usa kaninyo nga nangabautismohan sa ngalan sa “Amahan, Anak, Espiritu Santo,” mahitungod sa niining uban pang mga hilisgotanan sa Biblia nga mamaania niining panahona, kabalo na mo kung unsay angay'ng buhaton bahin Niini, mao ang pagdawat Niini! Sa dihang makita n'yo nga klarong ginapanghimatud-an sa Dios nga “Kamatuoran Kini,” ang Dios kana mismo nga nagahubad sa Kaugalingon Niyang Pulong. Apan dawaton ba ninyo kana? Dili, dili man kamo tugotan sa inyong organisasyon nga dawaton kana!

²⁸⁵ Daghang mga ministro dinha sa Tucson ang nagapaminaw karong buntaga. Igsoong Gilmore, wala ko'y unsa man nga batok kanimo; Igsoong Brock, sa First Assembly, ug sa iglesiang Friendly. Kamo nga mga kalalaken-an, anaa ako dinha sa tanang higayon, pero dili gani ninyo ako pasudlon. Ako. . .Oo, dili man ninyo mahimo, dili n'yo mahimo ug magpabilin gihapon sa kung unsa kamo. Dili ninyo madawat ang kapadayagan, tungod kay gihimo na man kamong denominasyon. Ug paminaw, maingon nga gipatay si Uzza tungod kay anaa siya kaniadto sa mini nga pagdihog, mao ra usab ang kadaghanan sa tinuod nga mga Cristohanon nga ginawala na ang ilang kasinatian diha nianang dugay nang patay nga mga denominasyon, tungod kay giisa man nila ang ilang kamot diha sa Arka nga unta wala man sila giordenahan sa pagbuhat niana. Karon mahimo n'yo Kini nga toohan, o kaha dili Kini toohan, anaa ra kana kaninyo. Ang Dios man mao'y inyong Maghuhukom. Wala sukad ginabakwi sa Dios ang Iyang Pulong. Kung unsa ma'y Iyang gisulti sa unang higayon, ginasulti Niya gayud sa tanang higayon.

²⁸⁶ Ngani giingnan Niya si Balaam, “Ayaw pag-adto!”

287 Ug pagkahuman mibalik gihapon si Balaam, miingon, “Apan Ginoo, mahimo ba akong moadto?”

288 Karon ania! Miingon na lang ang Dios, “Sige umadto ka!” Bueno, gitugotan na Niya siya nga moadto. Aduna man ang Dios og pahanugot nga kabubut-on, ug dili gyud ang orihinal nga kabubut-on sa Dios. Mahulagway n’yo ba kung unsa ka dakung problema ang iyang gisudlan?

289 Ug ang si bisan kinsang tawo nga nagatukod og unsa mang butang, unsa man nga organisasyon, o unsa mang butang nga gawas sa Pulong sa Dios, balas kana nga nagakaunlod ug mahugno gayud! Mamatay kana sa ingon ka sigurado sama sa unsa mang butang, tungod kay ang Pulong sa Dios usa man ka nagatubo nga Lawas sa Pangasaw-onon. Dili Kini puedeng puro lang tiil, puro lang bukton, og puro lang paa. Nagaabot kini nga mga butang sumala sa ilang panahon.

290 Ug mga Pentecostal, gihimo n’yo kining tanan nga usa ra ka butang, mao nga dili ninyo madawat ang bag-ong kapadayagan. Mao kana’y hinungdan nga nagapabilin lang kamo sa inyong nahimutangan ug dinha nagakamatay. Nagapadayon Kini. (Daghan pa unta; pero dili ko gusto nga hagoon kamo.) Apan wala ginausab sa Dios ang Iyang hunahuna, eksakto na gayud ang Iyang unang desisyon. Busa dili gyud ginausab sa Dios ang Iyang hunahuna, ginatugotan na lang Niya kamo nga magpadayon sa inyong pahanugot nga kabubut-on. “Ang Dios usa ka maayo nga Dios,” sama sa ginaingon ni Oral Roberts. Pero siya’y usa usab ka makahahadlok nga Dios!

291 Ania, sama ra sa inyong ginaingon, “Himaya sa Dios, ginatinguha ko nga magsulti og laing mga dila!” Hinoon tugotan man Niya kamo nga mabuhar kana, apan dili kana ilhanan nga nadawat n’yo na ang Espiritu Santo.

292 Mahinumduman pa ba ninyo ang gisulti ni Tomas, nga maduhaduhaon kaniadto? “Gawas kon magkaaduna ako og pipila ka ebidensiya, kinahanglan ko ùnang isulod ang akong mga tudlo diha sa gilangsang Niyang, Niyang mga kamot, ug diha sa Iyang kilid, ako—ako—ako—dili gayud ako motoo Niini.” Karon, ingon niana kamo, mao gihapon.

293 Ang ingon ni Jesus, “Ania, Tomas, isulod ang imong mga kamot dinhi kung mao man kana ang buut mo nga masayran.” Kita n’yo? Kita n’yo? Karon, kung gusto ninyo ang dalanon ni Tomas, nan padayon ra mo. Apan unsa ma’y gisulti ni Jesus? “Daw sa unsa ka mas daku ang ganti kanila nga mga wala pa nakakita ug sa gihapon nagatoo.”

294 Matikdi, matikdi n’yo, sa pagbuhar ni David niini, napahinungdan niya ang kamatayon sa matinuuron nga tawo, tungod giisa man sa maong tawo ang iyang kamot ngadto sa arka kon diin dili niya unta kadto angay’ng gibuhar. Usa ka halangdon, sinsero nga tawo, ang nagdahum nga husto

gayud ang pagdihog ug tanan na, apan sayup diay ang paagi sa pagbalhin sa arka. “Ang mga baka,” ang ingon sa Biblia, “nanghidugmo,” dili ang mga Levihanon. Nanghidugmo ang mga baka ug natumba ang carro; ug ang usa ka sinsero nga tawo, nga puno og gugma ang iyang kasingkasing, giisa niya ang iyang kamot ngadto sa arka aron sa pagsagang niini, ug namatay hinoon tungod wala ma’y si bisan kinsa ang puedeng mohikap sa maong arka kondili ang usa ka Levihanon lamang. Kita n’yo na kung unsa nga ginatuman sa Dios ang Iyang Pulong, ginatipigan ang Iyang pamaagi, og ginatipigan ang Iyang sugo? Gihampak og sanla si Uzias kaniadto. Ania pud si David, nga bug-os nagpahinungdan sa kamatayon sa usa ka tawo, ug usa ka dakung hitabong-dautan; ingon nga mga dinihogan sa Espiritu, pareho silang dinihogan, apan nahigawas mismo sa pamaagi sa Dios. Husto ba kana? Namatay ang maong tawo. Oh, tungod niadto halos mamatay gud sa kahadlok si David, og iyang gihinganlan ang—ang maong dapit, sama sa gibasa ni Igsoong Jack. Kita n’yo? Iyang gimarkahan siya didto.

²⁹⁵ Pila na kaha ka mga higayon nga gibuhat sa mga denominasyon ang mao rang butang ngadto sa matinuuron nga mga magtotoo. Ang iglesiang Katoliko, ang Methodist, ang Baptist, ang church of Christ, gani ang mga Pentecostal usab, naghinungdan og daghang espirituhanon nga kamatayon tungod nianang mao gihapong butang. Sa dihang nagaabot Kini, uban niini nga mga butang, ilang hingkaplagan...ug dili na sila makapadayon pa, tungod kay mao na man kana ang ginatoohan sa ilang denominasyon.

²⁹⁶ Tan-awa n’yo karong panahona, ang dagkung mga krusada, mao gihapon. Wala kini’y unsa man nga nabuhat kondili ginahimo hinoon ang mga tawo nga labaw pa sa “duha-ka-pilo nga anak sa impiyerno, nga nagkasamot pa kaysa sa una nilang kahimtang.” Mas malisud na hinoon para nila, sa tinuod lang, nga makaduol sa Kamatuoran. Kon magpahigayon ka og usa sa niining dagkung mga rebaybal, ug manambong silang tanan, magpadayon sa hamubo nga panahon, ug mamalik ug mosugod na usab sa ilang mga pagpakasala. Pag makadungog na sab og usa pa ka rebaybal, moingon na, “Ah, nasinati ko na man ang ingon nianang mga butang, nasulayan ko na. Wala man kana’y pulos.” Kita n’yo? Wala man gud sila mahibalo sa agianan. Mao nga dili nila makita.

²⁹⁷ Ngani nadungog ko ang atong bantugang ebanghelistang si Billy Graham, nga atua usa niadto ka buntag sa pagpamahaw nga sama niini, ug miingon siya, “Ako...” Ania, gipataas niya ang Biblia, didto sa Louisville, Kentucky, miingon, “*Kini* mao ang ehemplo sa Dios.” Ug tinuod kana, kamatuoran ang gisulti sa maong tawo. Ingon siya, “Pag magsangyaw ka...nagsangyaw kaniadto si Pablo ngadto sa usa ka siyudad ug dunay usa ra nga nakabig, sa pagbalik niya usa ka tuig human niadto ug

aduna na'y traynta gikan niadtong usa nga nakabig." Ingon pa, "Apan sa nagsangyaw ako ngadto sa usa ka siyudad ug adunay traynta ka libo nga mga nakabig, ug sa pagbalik ko sulod sa unom ka bulan ug wala na gani ako'y hingkaplagan nga traynta." Ingon siya, "Kabalo ba mo kung unsa'y problema?" Miingon, "Tungod kamo'y mga tapolan nga mga magwawali," miingon, "nagalingkod lang mo nga nakapatong pa ang inyong tiil ibabaw sa lamesa ug—ug ginatawgan ra kining mga tawo diha sa telepono imbis unta nga duawon n'yo sila pagkahuman sa panihapon ug kumustahon sila."

²⁹⁸ Oh, nagadilaab niadto ang akong kasingkasing. Sa hunahuna ko, "Oh halangdon nga tawo sa Dios, dili ko unta gusto nga mosupak kanimo bahin niini, apan si kinsa ba ang mga tapolan nga magwawali niadtong usa nga nakabig ni Pablo? Ang iyang gibuhat kaniadto, gidala niya ang maong kinabig ngadto mismo sa Pulong, gidala niya siya ngadto sa Mensahe, gidala niya siya sa kon diin niya nakaplagan ang Dios; nagadilaab mismo ang iyang kasingkasing, gipadilaab niya usab ang maong nasud! Pero kamo ang bugtong butang nga ginahimo ninyo mao lamang ang pagpahimutang kanila diha sa usa ka iglesiang Baptist o Methodist, o unsa man, dili na ikatingala nga wala gayu'y magadilaab." Uh-huh. Oo, sir!

²⁹⁹ Dayon tan-awa n'yo kung unsa ang gikasaad sa Pulong alang niining panahona. Atong hibaloon kon kini ba'y Methodist, Baptist, mga Pentecostal, o unsa man, alang niining panahona. Karon mahimo ra ninyong basahon ang inyong mga Kasulatan. Subaya n'yo kining mga Kasulatan nga akong ginasulti kaninyo. Ang Pinadayag usab . . .

³⁰⁰ Kung aduna pa ko'y higayon, basahon ko pa unta kini, apan wala na man gud ko'y oras. Aduna na lang ko'y mga dose o katorse minutos. Kinahanglan ko nga matapos sa gikatakda nga oras, sa alas onse, kung mahimo ko.

³⁰¹ Matikdi n'yo ang Malaquias 4, ang Pinadayag 10, ang Pito ka mga Selyo. Dili ba ang Biblia miingon . . . Karon matikdi! Adunay usa ka Manulonda, usa ka Mensahero nga gikan sa Kahitas-an, ug usa ka yutan-ong mensahero. Ug ang matag mensahero alang kana sa kapanahonan sa iglesia. Miingon siya, "Sa mga adlaw . . ." nagasulti karon, "adunay miabot nga usa ka Manulonda, Mensahero" (ang pulong nga *manulonda*, ang Ingles nga pulong niini nagakahulogan og "mensahero"). ". . . mikanaug gikan sa Langit, ug gitunob Niya ang Iyang tiil sa yuta ug sa dagat, ug nanumpa Kaniya nga buhi hangtud sa kahangturan nga matapos na ang panahon." Husto ba kana? May balangaw sa palibot sa Iyang ulo, ug kining tanan nga mga butang nagakahitabo na. Kana nga Manulonda mao si Cristo! Sigurado gayud! Apan unsa ma'y iyang gisulti? "Apan sa mga adlaw sa ikapitong manulonda, sa ikapitong kapanahonan sa iglesia."

³⁰² Kanunay gayud nga sa katapusan sa kapanahonan sa iglesia kon diin nahimo nila nga ang butang ingon na ka . . . nga ang iglesia nagkagubot na og ayo hangtud nga magpadala ang Dios og usa ka mensahero, ug mao kana ang Mensahe alang sa maong kapanahonan sa iglesia. Dayon gidawat nila ang iyang mensahe, tungod kay nabuhi man siya sa hamubo lamang nga panahon, ug ang Dios . . . dayon sa pagdawat nila sa iyang mensahe imbis nga ipapadayon kini nga dala ang tanang uban pa Niini, nanaghimo hinoon sila og usa—usa ka denominasyon. Ug dayon miabot sila og naghimo na pud og lahi nga denominasyon; pag lahi na nga mensahero, nanagdawat na usab og lahi.

³⁰³ Nakita na ninyong tanan sa akong libro, igahulagway man kining tanan diha sa *Ang Pito Ka Kapanahonan Sa Iglesia*, diin gisulti Niya kanako; nga nagabarug ako karon ingon nga saksi sa Dios nga pagahukman didto sa adlaw sa Paghukom tungod Niini. Nagagikan Kini sa Dios, dili nga sa akong panghunahuna. Matikdi, ania. Sa hunahuna ko—lahi ang akong panghunahuna kay sa niana, kung sa kaugalingon ko lang nga panghunahuna. Sama sa gisulti kanako ni Igsoong Jack mahitungod niadtong Manulonda, sa kung unsa kono nga, “Si Cristo kadto diha sa gihimaya na nga lawas.” Apan dili gayud, ginapakita lang niadto nga husto ang Mensahe, ang Iyang Labing-hataas nga Pagka-Dios, nga Siya mao ang Dios. Kita n’yo? Ang mao mismong butang nga dugay ko nang ginawali gikan sa Pulong. Kanunay gayud ginapamatud-an sa Pulong ang Pulong.

³⁰⁴ Karon, sa gilayon ha, tungod hapit na kitang mahuman sa pipila ka gutlo.

³⁰⁵ Bueno, miingon Siya, “Sa mga adlaw sa Mensahe sa ikapitong manulonda, ang yutan-ong manulonda, sa ikapitong kapanahonan sa iglesia, ang tanan niingon mga tinago nga nawala sa niadtong nangaging unom ka kapanahonan sa iglesa kinahanglan gyud nga mahipadayag na nianang panahona.” Bueno, eksaktong ingon niana mismo ang gisulti niadtong mga Manulonda. Ania ang Pito ka Selyo, o ang pag-abli niini nga mga tinago. Ug kon sulayan mong dalhon Kini atubangan sa mga denominasyon. Kon sukwahi sa kung unsay ilang . . . Igsoon, mangtak-op lang sila nga sama sa usa ka kabibi, ug kanunay na nila kanang ginabuhat. Apan mao na man kini ang panahon!

³⁰⁶ Pila ba ang nasayod nga mao na kini ang ikapitong kapanahonan sa iglesia? Moingon og, “Amen.” [Nagaingon ang kongregasyon, “Amen.”—Ed.] Ang Kapanahonan sa Laodicea, usa ka dagaang nga ginasuka sa Dios gikan sa Iyang baba. Ug gisuka pud nila ang Dios gikan sa ilang baba; wala na’y uban pang kapanahonan sa Biblia kon diin nakaplagan si Jesus nga anaa sa gawas nga naningkamot sa pagpanuktok, aron makasulod og balik. Gipagawas nila Siya, wala na’y pagpakigtimbayayong. Si kinsa ba si Jesus? Ang Pulong! Gipagawas ang Pulong. Gipagawas sa mga tipaka ang trigo!

Miingon Siya, “Nagatindog Ako sa pultahan ug nagapanuktok, ug ang si kinsa man dinha nga anaa sa ilang pagkagapus magapatalinghug sa Akong Tingog.” Oh Dios, malooy Ka!

³⁰⁷ Niadtong tungora mismo, sa diha nga namatay kadtong maong tawo, si David nga dunay pagdihog iyang nakita kung unsa ang gibuhay niyang sayup. Oh David, kamo nga pastor, dili ba ninyo makita ang inyong patay na nga mga credo ug mga denominasyon nga inyong ginakuptan? Dili ba ninyo makita kung unsay ginabuhay niini? Ginapatay niini ang usa ka Uzza. Patay sa espirituwal, ug nangahibulong pa kamo kon nganong wala na’y rebaybal; ginatugotan ra ninyo ang inyong mga kababayan-an nga putlan ang ilang buhok, pintalan ang ilang nawong, magsul-ob og mga purol; ginapaeskwela n’yo ang inyong mga batang lalaki ngadto sa mga tulonghaang *ricky*, ug uban pa nga sama niana, ug pagpanguli nila mga bayot na, ug kung unsa na lang.

³⁰⁸ Matikdi ang tinguha ni David: dalhon niya unta kaniadto ang arka ngadto sa *kaugalingon* niyang balay. Pero dili man kadto mao ang kaulohan, dili kadto mao ang dapit, tungod sa Jerusalem man kini angay’ng mapahimutang. Apan gidala kini ni David ngadto sa *kaugalingon* niyang balay, gitinguha niya nga maatua ang rebaybal sa *kaugalingon* niyang denominasyon. “Oh, kung Assembly ka, okey lang. Kung Oneness ka, okey lang. Kung Pentecostal man ka, okey ra.”

³⁰⁹ Sama sa gisulti sa usa ka tawo, miingon, “Igsoong Branham, giunsa mo man pag-aghat ang si bisan kinsa aron maminaw kaniyo?” Miingon, “Masabtan ko si Billy Graham, nga maaghat man niya ang matag denominasyon sa nasud nga mouban kaniya. Masabtan ko si Oral Roberts, nga ang tanang Pentecostal nagasuporta gyud kaniya. Apan,” miingon, “ikaw batok man ka niining tibuk butang.” Uh-huh. Miingon, “Giunsa gyud kaha nimo pag-aghat ang si bisan kinsa?”

³¹⁰ Ingon ko, “Ang Dios kini!”

³¹¹ “Ako mao ang Ginoo nga nagtanum niini sa wala pa ang pagkatukod sa kalibutan. Ako kining pagabisbisan adlaw ug gabii kay tingali’g adunay pipila kanila nga moilog niini gikan sa Akong kamot,” Isaias. “Pagabisbisan Ko, kining Akong gitatum. Gisulat Ko na ang ilang mga ngalan diha sa Basahon sa wala pa ang pagkatukod sa kalibutan, pinaagi og predestinasyon. Ako kining pagabisbisan, padayon lang kini nga buhaton. Ako ang magahatag og tubig, iwisik-wisik n’yo lang Kini.” Husto. Kita n’yo? “Ako kining pagabisbisan adlaw ug gabii kay tingali’g may usa kanila nga mailog gikan sa Akong kamot.” Mao kana.

³¹² Gitinguhang dalhon kini ngadto sa siyudad ni David, imbis nga sa Jerusalem. Tungod wala ma’y dapit nga naandam para niini niadtong panahona, ug mao man usab karong panahona. Kining dagkung mga misteryo nga nahipadayag pinaagi sa

Pito ka Selyo, wala ma'y ni usa ka dapit sa bisan unsa nga denominasyon. . . kinahanglan man gud nga moundang usa sa pagka-denominasyon aron madawat Kini. Gikan pa sa kang Luther hangtud sa Pentecostal Oneness, wala gyu'y ni usa ka dapit nga makadawat Niini. Dili usab mahimo sa usa ka tawo nga dawaton Kini ug magpabilin ra gihapon sa iyang denominasyon. Kinahanglan niya nga mosunod sa trigo o kaha mouban sa tipaka, o kon asa man sa duha ang gusto niya.

³¹³ Si Cristo mao ang atong Arka, ang Pulong. Ang ilang denominasyon usab ang gusto nila. Dili man Siya mahimo, himatikdi, dili Siya mahimo nga dalhon sa bag-ong mga carro sa denominasyon, ang Iyang Mensahe dili mahimong dalhon sa carro sa usa ka bag-ong denominasyon tungod kinahanglan man Kining dalhon ug magaabot diha sa kasingkasing sa usa ka propeta. Mao nga dili gyud mahimo. Gisaad na Niya kini, mamahimong ingon niana Kini, ug kinahanglan nga ingon niana gyud Kini.

³¹⁴ Busa dili gayud Kini dawaton sa denominasyon, dili usab nila mahimo nga dawaton Kini. Ug sila gayu'y buta Niini sama ra sa mga Judio kaniadto sa diha nga gibitay nila si Jesus ngadto sa krus, sa dihang miingon si Jesus, "Amahan, pasayloa sila, wala lang sila mahibalo kung unsay ilang ginabuhat." Mao nga ayaw n'yo sila dumti, kondili hunahunaa lang: unsa kung kamo ang anaa sa ingon niana nga kahimtang nga ang inyong mga mata hilabihan gayud ang pagkabuta nga dili n'yo na mahimong ibuka ug makita kung unsay nagakahitabo?

³¹⁵ Dili usab nila makita nga mao diay Kadto ang ilaha mismong Dios. Sa dihang gibitay na Siya didto sa krus, ug samtang ilang ginaawit ang ika-22 nga Salmo sulod sa templo, duha ka gatus ka yarda ang gilay-on, "Dios Ko, Dios Ko, nganong gibiyaan Mo Ako? Gipalagbasan nila ang Akong mga tiil ug Akong mga kamot." Kita n'yo? "Ang tanan Kong mga bukog, nagatutok sila Kanako. Nganong gibiyaan Mo Ako?" Ug didto, ang mismong Dios nga ginapahinungdan sa ilang giawit, pero ingon niadto sila ka buta nga ilang gilansang Siya sa krus, ug wala mahibalo niadto.

³¹⁶ Karon, dili ba ginaingon sa Biblia nga ang iglesia sa Laodicea, nga nagadahum nga siya'y bantugan kaayo tungod sa iyang mga miyembro sa denominasyon, siya'y mamahimong "hubo, makaluluoy, kabus, buta, ug wala mahibalo niini"? Unsa ba'y buut ipasabot sa pagkahimong *buta*? Ang buut ipasabot sa pagkahimong *buta* niining iglesia sa Laodicea sama ra sa nahitabo niadtong pagtapos sa iglesiang Judio, nga buta sa mismong Cristo nga ilang gipagawas, og Siya nagapanuktok na lang, gapaninguha nga makasulod; "hubo sila, makaluluoy, kabus, alaut, buta, ug wala mahibalo niini." Oh Dios, kaluy-an Mo unta!

³¹⁷ Nganong dili man mahimong mabulad ang trigo diha sa Presensiya sa Anak, ug aron makita ang panahon nga atong gikinabuhian? Oo, si Cristo mao ang atong Arka, apan duna ma'y Iyang orihinal nga pamaagi sa pagbuhat niini. Dayon ania Siya... Anaa bitaw kanila ang Iyang Espiritu, nasayod kita niana. Nagahulat sila sa Ginoo, nga makita ang Iyang plano bahin sa Iyang orihinal nga Pulong nga pagapanghimatud-an sa panahon Niini, ingon niana unta ang angay natong ginabuhat karon mismo. Ug Iyang—ginapahayag Niya ang ilang pagtoo pinaagi sa Iyang Pulong, ingon nga makita nila Siya nga ginapanghimatud-an ang matag plano nga Iyang gisaad, dili nga mga laraw nga denominasyon nga iya sa tawo, dili nga pagpadaghan og mga miyembro para sa atong kaugalingong arka.

³¹⁸ Aduna na sila og ilang arkang Methodist, arkang Baptist, arkang Presbyterian, ang tanan nanagsulod na ngadto niini nga arka alang sa dakung kasakitan nga moabot; “Himaya sa Dios! Nabautismohan ako diha sa arkang Methodist, sa Presbyterian, sa arkang Pentecostal.” Aduna lamang og usa ka Arka, kana mao si Jesus Cristo, ug Siya mao ang Pulong!

³¹⁹ Himatikdi, gisultihan sa Dios ang propeta, miingon, “Kaona ang basahong-linukot,” diha sa Daang Tugon. Ang propeta sab sa Bag-ong Tugon, Iyang giingnan, “Kaona ang gamay'ng basahon.” Ngano man? Aron ang propeta ug ang Pulong mamahimo nang usa! Kita n'yo? Mao kana ang Arka, ang Pulong sa Dios.

³²⁰ Gisaad sa Dios, ang Iyang Pulong, kung sa unsang paagi Kini mamatuman ug kung sa unsang paagi Kini mahitabo sa dihang gipili Niya ang Iyang Pangasaw-onon, og kung sa unsang paagi kini mamahitabo. Nagakahitabo na gani kini diha mismo sa inyong atubangan, sa Ngalan sa Ginoo, ug pinaagi kini sa orihinal nga Pulong! Ania na ang Mensahe sa panggabii nga panahon.

³²¹ Pila man ang nakahinumdom kang Haywood kaniadtong gisulat niya:

Sa panahon sa kagabhion motungha ang
Kahayag,
Ang dalan ngadto sa Himaya imo gayud
mahikaplagan.

³²² Oo, ang panggabii nga saad mahitungod sa Pito ka Selyo, sa Pinadayag 10, Malaquias 4, Lucas 30 ug 10. Basaha n'yo ang Deuteronomio 4, 4:1 ug 4, dayon ang ika-25 ug ika-26 nga bersekulo, ug tan-awa kung unsay Iyang gisulti mahitungod niining kaulahiing adlaw. Si Moises kini nga nagaingon sa Israel nga “tumana n'yo ang matag Pulong, ayaw kamo pagdugang ni usa ka butang!” Si Moises, ang maong propeta nga nakaadto na didto ug nakita ang Pulong sa Dios. Ug gisulat Kini para kaniya

ug gipanghimatud-an pinaagi sa Kaugalingong kamot sa Dios nga mao'y nagsulat mismo Niini. Ingon siya, "Tumana ninyo ang matag Pulong, ayaw kamo pagdugang og usa ka butang Niini o kaha magtaktak og usa ka butang gikan Niini." Mabasa ninyo kana sa ika-25 ug ika-26 nga bersekulo sa Deuteronomio 4.

³²³ Matikdi! Ayaw gyud kamo pagdugang Niini, ayaw gyud kamo pagtaktak gikan Niini; kay kung buhaton man ninyo, nan pagataktakon sa Dios ang inyong bahin gikan sa Basahon sa Kinabuhi. Ug nagapakita kana nga dili diay Niya kamo binhi.

³²⁴ Timan-i n'yo! Ang tanang butang nga gisaad kanato sa Dios, ang tanang butang nga gisulti kanato sa Dios, ang tanang butang nga gikasulti kaninyo diha sa Ngalan sa Ginoo, nangahitabo gyud! Ang Dios wala gayud sukad-sukad naghimo og usa ka saad nga walay-pulos, kondili gituman gyud Niya ang matag saad nga Iyang gisulti, nga gisulti kanato, ingon nga mao ang Kamatuoran. Sulod sa baynte ka tuig, Shreveport, nagwali ako kaninyo pinaagi sa gahum sa Dios, ug tungod sa pagkabuutan sa inyong pastor, ug ginapamatud-an ko kaninyo karon. Bisan sa mga kababayan-an nga milagpas na sa edad sa pagpanganak; mga kalalaken-an, mga kabataan, mga balatian, pagpang-ayo man, propesiya, og mga butang nga mamahitabo, wala gyud sukad ni usa niini ang napakyas! Karon, pahilayo na kamo gikan nianang mga denominasyon, ginaagak lang nila kamo paingon sa kamatayon.

³²⁵ Mibarug si Samuel usa niadto ka adlaw, ug miingon sila, "Gusto namo og usa ka hari, gusto namo nga mamahimong sama sa tanang uban pa sa kalibutan."

³²⁶ Sila . . . miingon si Samuel, "Ayaw kamo pagpili og hari. Kuhaon ra niya ang inyong mga anak nga lalaki, ug mga anak nga babaye, ug buhaton niya ang *ingon-ini* ug buhaton ang *ingon-ana*."

³²⁷ Miingon ang tawo, "Oo, kahibalo ko nga husto ka."

³²⁸ Apan miingon si Samuel, "Paminaw mo kanako. Nagkuha ba ako sukad sa inyong salapi? Nanglimos ba ako kaninyo para mabuhi? Nagsulti ba ako kaninyo nga kinahanglan n'yong mohatag kanako og daku kaayo nga suweldo aron magpahigayon og panagtigum para kaninyo?" Karon hukmi n'yo ang inyong mga kaugalingon, karon mismo! Kita n'yo? Ingon pa siya, "Aduna ba ko'y gisulti kaninyo sukad og bisan unsang butang diha sa Ngalan sa Ginoo nga wala mahitabo?" Wala ni usa man ka butang.

³²⁹ "Oh, bitaw, Samuel, wala man ka sukad nanglimos kanamo og salapi, wala pud ka sukad nagtinguha og dagkung mga butang. Samuel, tinuod kana, ug ang tanan nga gisulti mo diha sa Ngalan sa Ginoo nahitabo man gyud. Apan, Samuel, gusto gyud namo ang among denominasyon bisan pa man!"

³³⁰ “Kung ingon niana sige pilia n’yo kana. Anaa ra kana kaninyo.” Husto kana.

³³¹ Mahimo n’yong hunahunaon nga nagabuhat kamo og buluhaton sa Dios, ug pagmotipas kamo sa pamaagi sa Dios sa pagbuhat niini, nan magsige-sige na lang kamong magkalamukat niini, sa walay paghunong. Oh Iglesia sa buhi nga Dios! Pasayloa n’yo ang akong pang-Irish nga pamaagi ug ang akong pagpakatawa, apan sa pagkamatinuuron ug pagkasagrado sa akong kasingkasing, kamong mga Assemblies of God, kamong mga Oneness, Presbyterian, Methodist, o unsa man kamo, pangalagiw na kamo alang sa inyong kinabuhi. Hinumdumi, panggawas na kamo gikan dinha.

Mga nasud nanagkabulag, nagakahigmata na ang Israel, (Nagaandam na alang nianang mga nahibilin.)

Mga ilhanan nga gipanagna na sa mga propeta; Inihap na lang ang mga adlaw sa denominasyon, inubanan sa mabug-at nga kasakit,

“Pangbalik kamo, O mga nangatibulaag, sa inyong kaugalingong yuta.”

Ang adlaw sa katubsanan haduol na,
Nangaluya na sa kalisang ang mga kasingkasing sa tawo;
Magpapuno sa Iyang Espiritu, hikaya ug limpyohi ang inyong mga lamparahan,
Paghangad! Tungod haduol na ang inyong katubsanan.

³³² Nagatoo ba kamo niana? Ania na kita sa katapusang panahon, ania na kita. Ang sinulat-sa-kamot anaa na diha sa bungbong, haduol na ang Ikaduhang Pag-abot, ang Pangasaw-onon gipili na, nabisbisan na, og nahipagawas na.

³³³ Bueno, wala kana nagapasabot nga napahigawas gikan sa iglesia, kondili ang buut ipasabot nga napahigawas na gikan sa denominasyonismo. Kinahanglan n’yong mosimba, apan ayaw mo pagpamiyembro sa unsa man nga organisasyon. Nakig-uban man kaniadto si Jesus sa tanang mga organisasyon, apan wala gayud Siya sukad-sukad nagpasakop ni usa man kanila. Wala usab Siya midapig sa bisan unsa man kanila, wala gayud, kondili nagpataliwala hinoon Siya kanila. Dinha kon diin kinahanglan mapakaylap ang Kahayag. Ug pagpabilin lang mo sa kon asa kamo, nga ginapakaylap ang Kahayag. Kita n’yo? Ginagamit kamo sa Dios para niana. Sa mga tawo nga gutom ang mga kasingkasing, ipahibalo n’yo kanila nga si Jesus Cristo tinuod, maingon sa kung unsa Siya kagahapon, mao gihapon sa karon; ug hangtud sa kahangturan.

³³⁴ Posible kini, nga ang usa ka lalaki o babaye nga bug-os gayud nga sinsero, maningkamot kutob sa ilang mahimo nga magbuhat og buluhaton sa Dios, ug buhaton kana sa sayup nga paagi. Bisan pa nga dunay tinuod nga pagdihog sa Espiritu Santo diha kanila, apan kon gibuhat kana nga sukwahi sa plano sa Dios alang niini nga kapanahonan, ug mao nga magkalamukat ang tibuok butang. Karon, kung nagatoo kamo nga Kamatuoran kana, moingon og, “Amen.” [Nagaingon ang kongregasyon, “Amen.”—Ed.] Bag-ohay lang natong gibasa Kini. Magkalamukat gyud ang tibuok butang tungod sa dili pagsunod sa gitagana nga paagi sa Dios sa pagbuhat niini.

Mag-ampo kita.

³³⁵ Oh iglesia, dinhi ug sa tibuok nasud, patalinghugi n’yo ang inyong ubos nga alagad niining buntaga. Mahimo ba? Tan-awa kon asa kamo kaniadto pipila na ka tuig ang milabay niadtong unang pagsugod niini; karon tan-awa kung unsa na nga mga pagsundog-sundog ang nagpahimulos niini, ug dagkung minilyon ug binilyon ka dolyar ang napaingon sa mga organisasyon. Kita n’yo? Pero halayo gihapon sa Pulong sa Dios. Ang mga bilding ug mga organisasyon dili man mao’y pamaagi sa Dios sa pagpalihok sa Iyang Espiritu. Kondili ginapalihok Niya Kini diha mismo sa Iyang Pulong, aron himoon Kining buhi. Ug kung gitagana ka nang daan ngadto sa Pulong sukad pa sa sinugdan sa kalibutan, nan motakdo mismo ang matag Pulong sa ibabaw sa Pulong. Sama sa selula sa tawo nga dili puedeng magkaaduna og usa ka selula sa tawo, ug ang sunod selula na nga iya sa iro, ug ang sunod na pud selula nga iya sa iring; kini’y selula tanan sa tawo. Apan kinahanglan una nga aduna kini og usa ka selula sa sugod pa lang. Husto ba kana? Moingon og, “Amen.” [Nagaingon ang kongregasyon, “Amen.”—Ed.] Bueno, kung kini selula nga Pulong sa sugod pa lang, nan ang uban pang mga selula nga Pulong gikatagana na aron mamahimo kining tibuok nga lawas.

³³⁶ Dili kamo magpakabata, diha sa gugma lamang, kondili magpakahamtong na kamo diha sa Espiritu ug sa paghukom. Hukmi ninyo kon gisulti ko ba kaninyo ang Kamatuoran o wala. Hukmi ninyo kon Kini ba’y Pulong sa Dios o dili. Hukmi ninyo kon mao na ba gyud kini ang panahon nga atong ginahisgotan o dili. Hukmi ninyo kon gikasaad ba kining mga butanga. Karon, napanghimatud-an ba ang mga niini? Pinaagi sa mga butang nga wala ni usa ka tawo sa kalibutan ang makahimo. Apan nahimo na man Kining ordinaryo na kaayo para kanato hangtud nga ginapasagdan na lang natong molabay Kini mismo kanato. Paghulat, iglesia, paghulat.

³³⁷ Kung aduna ma’y usa dinhi karong buntaga nga wala pa makaila kang Jesus Cristo, nga wala pa napamatarung karong buntaga, ingon nga giwagtang na ang tanan n’yong mga sala nga daw sa wala gayud kamo nakasala, ug gusto n’yo nga

mamaingon niana . . . kay hinumdumi, usa ka adlaw, tingali'g karon na, tingali'g sulod sa sunod nga singko minutos, apan usa niana ka adlaw mohunong gyud kana nga kasingkasing. Ug ang pinaka-kinasuloran niana mokayab na aron mobarug sa Presensiya sa Dios aron pagahukman sumala sa kung unsay gibuhat n'yo niining Mensahe karong buntaga, sumala *niining* Mensahe nga inyong nakita. Dili . . . dili Kini ako, usa lamang ako ka tigpamaba. Sama niining mikropono, dili kini makasulti ni usa ka butang gawas kon magasulti na ako niini. Ug dili usab ako makasulti og unsa mang butang gawas lang kon ang Dios na ang magasulti pinaagi nako, apan nakita man ninyo nga gipanghimatud-an kini sa Dios ingon nga mao ang Kamatuoran. Mao nga ginatinguha n'yo nga mamahimong tinuod nga Cristohanon.

³³⁸ Karon, wala man kita'y igong lugar para sa usa ka pagtawag sa altar, kondili diha na lang mismo sa lamesa kon asa kamo napahimutang. Napuno ug nagkapunsisok na man gud ang lugar, nagkadasok na. Mao nga dili ko na mahimo nga magtawag kaninyo sa altar, hinoon wala ma'y altar dinhi para tawgon pa kamo. Apan ang altar anaa man mismo sa inyong kasingkasing. Dili n'yo ba tugotan kanang gamay'ng kombiksyon nga "si Jesus Cristo tinuod" nga manglihok mismo karon ug tawgon ang uban pa nga bahin sa Iyang lawas diha kaninyo, og ipahimutang Siya sa pasungan sa inyong kasingkasing? Kung wala pa Siya dinha, mahimo n'yo bang ipataas ang inyong kamot, ingon nga ilhanan para Kaniya, nga nagaingon, "Ginoo, pun-a ako, pun-a ako sa Imong Pulong ug sa imong Presensiya, aron nga magkinabuhi ako pinaagi Nimo"?

³³⁹ Samtang nakaduko ang matag ulo, nakapiyong ang matag mata, ang tanan sa tibuok nasud, ipataas n'yo ang inyong mga kamot mga tigpaminaw nga ania dinhi ug sa mga anaa dinha usab; ug maghalad ako og pag-ampo para kaninyo. Mao lang kana ang mahimo ko, dili ko man mahimo nga pun-on kana. Panalanginan ka sa Dios. Dili ko mahimo nga pun-on kana. Panalanginan ka sa Dios; ug ikaw usab. Mahimo sa Dios nga pun-on kana. Panalanginan ka sa Dios. Ginapataas na ang mga kamot sa mga tigpaminaw nga ania dinhi, sa tibuok bilding. "Pun-a kini. Pun-a ako, Oh Ginoo. Pun-a ako." Ug karon, human nga akong . . . Salamat, igsoong babaye. Salamat, igsoong lalaki. analanginan kamo sa Dios. Human nga akong . . . Panalanginan ka sa Dios, minahal nga igsoong babaye. Ikaw. Pagkahuman . . . sa tan-aw ko karon mora'g naaghat ko na ang kadaghanan sa mga matinuuron, nga nagatinguha nga mamaingon niana, gusto kong ipataas usab ang akong mga kamot uban kaninyo.

³⁴⁰ Oh Ginoo, ayaw itugot nga modangat ako sa paghunong. Sa kanunay, Ginoo, ayaw itugot nga mohunong ako sa usa ka butang, papadayona gayud ako, Ginoo, hangtud nga mahuman ko na ang tanang butang nga Imong gisugo nga akong

pagabuhaton. Bisan unsa pa ang bili, bisan unsa pa ang bayad, bisan unsa pa ang kritisismo, bisan unsa man ka bug-at ang krus, hinumduman ko lang ang krus nga gipas-an Mo kaniadto.

Busa kining balaang krus akong pagapas-anon
 Hangtud nga ipalingkawas ako sa kamatayon,
 Dayon Mopauli na nga sul-obon ang
 purongpurong,
 Aduna ma'y usa ka purongpurong para
 kanako.

Kinahanglan ba nga inusarang pas-anon ni
 Jesus ang krus,
 Ug ang tibuok kalibutan dili na magpas-an?
 Dili, adunay krus para sa matag usa sa Iyang
 mga anak,
 Adunay usa ka krus para kanako.

³⁴¹ Minahal nga Dios, naipahayag na ang Pulong. Dili Kini mahimong mobalik nga walay-kapuslanan, makakaplag gyud Kini og dapit Niini sa kon asa man. Kung naitanum na ang binhi, nan pagabisbisan Niini kini hangtud nga motubo kini. Ug walay si kinsa man ang makailog niini gikan sa Imong kamot, “Ang tanan nga gikahatag Kanako sa Amahan magaari Kanako, walay tawo nga makailog kanila gikan sa Akong kamot. Gihatag na sila Kanako sa Akong Amahan sa wala pa ang pagkatukod sa kalibutan”; sa diha nga nahan-ay na ang tanang mga plano, mao man usab, nga gihatag kang Jesus ang Iyang Iglesia, ang Iyang Pangasaw-onon.

³⁴² Ang mini nga kaminyoon sa kalibutan usab, ang para sa niining mga denominasyon. Mianhi Ka ug namatay sa kalibutan, gitubos Mo Siya, gimatarung Mo Siya, ingon nga wala gyud Niya gibuhat kini sa sugod pa lang. Nalit-ag ra Siya ngadto niini, ingon nga buta. Ug sama sa ginaingon sa awit:

Ako kaniadto nahisalaag ug karon ako
 hingkaplagan,
 Ako kaniadto anaa sa Laodicea, buta, apan
 karon makakita na ako.

Ug grasya ang nagtudlo sa akong kasingkasing
 nga mahadlok,
 Sa grasya usab nga nahupay ang akong mga
 kahadlok;
 Pagkabilihon nga nagpakita ang grasya
 Niadtong takna nga una akong mitoo!

Ug ang tubig sa Dios gibisbis sa akong kalag. Nagakauga na ako kaniadto.

³⁴³ Dios, sa niining gamay'ng altar sa matag kasingkasing nga ania dinhi ug sa tibuok nasud, hinaut nga mobugwak ang mga tubig nga gikan sa ilalum sa halaran sa Dios karong

buntaga nganhi sa Imong Iglesia; ug bisbisi Kini, Ginoo, kay ang panahon hapit na gayud nga matapos. Hatagi Kini og Kinabuhi, mga Tubig sa Kinabuhi, aron mahimo Niini nga magpabulad sa Presensiya sa Anak aron nga mahinog para sa Imong dakung dapa.

³⁴⁴ Amahan, nagaampo ako alang Kanila. Apan ang lindog kinahanglan man nga mauga, busa dili ko kini mahimong iampo; kinahanglan kini nga mamatay, busa patay na kini. Apan nagaampo ako alang sa maong Trigo, Ginoo, nga nagakaporma na ingon nga Lawas ni Cristo. Itugot, Ginoo, nga ang presko nga mga tubig sa Dios ang magpapadayon sa mga aping Niini nga mahumod pinaagi sa mga luha sa kalipay ug pagsabot hangtud nga moabot na ang makina nga ig-aani aron anihon na Kini pauli. Sa Ngalan ni Jesus, ginatugyan ko kining tanan nganha Kanimo, Ginoo; ang mga bunga Imoha gayud. Amen.

[Usa ka igsoong babaye sa kongregasyon ang nagahatag og mensahe. Blangko nga bahin sa teyp—Ed.] Amen.

³⁴⁵ Busa Amahang Dios, nagapasalamat kami Kanimo. Ug, Amahan, nagaampo pud kami para sa among ubos nga igsoong babaye, nga babayeng-alagad dinhi, alang sa iyang kusog. Mahinumduman ko pa ang higayon kaniadtong miduol ako—ako sa iyang atubangan, daw sa unsa nga gikunsaran siya sa Espiritu ug gihatag ang mao gihapong mensahe nga gihatag sa Manulonda sa Ginoo didto sa Suba niadtong adlaw: “Maingon nga si Juan Bautista gipadala aron sa pag-andam sa unang pag-abot ni Ginoong Jesus, gipadala usab ikaw aron sa pag-andam sa ikaduha.”

³⁴⁶ Ingon nga makita kining nagakaporma na karon paingon sa pagka-trigo, Dios, nagapasalamat kami Kanimo tungod sa tanang butang nga Imong gibuhat. Ang among mga kasingkasing napuno gayud nga labaw pa sa among masaysay. Gibati ko ang pagkapuno, Ginoo, wala na ako mahibalo kung unsa pa’y laing ikasulti. Apan salamat Kanimo Amahan, usab, tungod sa tanan-tanan nga Imong gibuhat para kanamo. Sa Ngalan ni Jesus Cristo.

I love Him, . . .

Moawit gayud kita para Kaniya, karon. Hinumdumi, ania Siya karon.

Because He first loved me
And purchased my salvation
On Calvary’s tree.

³⁴⁷ Nagapabati ba kana kaninyo og pagkagamay, ingon gayud ka gamay? Bug-os gayud nga nanghabwa, nga andam na mismo alang sa Espiritu, kita n’yo.

Hold to God's unchanging hand!
 Hold to God's unchanging hand!
 Build your hopes on things Eternal,
 Hold to God's unchanging hand!

Covet not this world's vain riches,
 That so rapidly decay,
 Build your hopes on things Eternal, (Wala na'y
 denominasyon, ha.)
 Hold to God's unchanging hand!

Hold to God's unchanging hand!
 Hold to God's unchanging hand!
 Build your hopes on things Eternal,
 Hold to God's unchanging hand!

³⁴⁸ Pila man ang nagatinguha nga buhaton kana? Ipataas ang inyong kamot. Karon abota n'yo ang pikas lamesa, ipandong n'yo ang inyong mga kamot diha sa kamot sa usa'g usa, nga nagakaingon *niini*, ang tanan. Mahimo ra kamong manglingkod, okey lang, o unsa man ang gusto n'yong buhaton. Paminaw og ayo. Awiton nato kini nga magkadungan karon. Nagarepresentar kini sa atong dili mabugto nga kadena sa gugma sa Dios. Ginahawiran nato ang mga kamot sa usa'g usa tungod kay nagatoo kita sa Dios. Ginahawiran nato ang usa'g usa tungod kay managsoong mga lalaki ug managsoong mga babaye man kita, tungod sa mao gihapong nagalihok nga Espiritu, ang Eternal nga Pulong sa Dios nga nagapuyo sa atong mga kasingkasing ingon nga nahipadayag.

When our journey is completed,
 If to God we have been true,
 Fair and bright our home in Glory,
 Our enraptured soul shall view!

Hold to God's unchanging hand!
 Hold to God's unchanging hand!
 Build your hopes on things Eternal,
 Hold to God's unchanging hand! (Espiritu sa
 Ginoo!)

Hold to God's . . .

Ientro lang Kaniya ang inyong hunahuna, kita n'yo. Ingon niini nga matang sa mga panagtigum ang kinahanglan natong ipahigayon sa umalabot.

. . . unchanging hand!
 Build your hopes on things Eternal,

Ang Pulong lamang ang bugtong butang nga Eternal.

Hold to God's unchanging hand!

Covet not this world's vain . . . (Popularidad,
edukasyon.)

That so rapidly decay, (Tan-awa n'yo karong
panahona, kung unsay gibuhad niini.)

Seek to gain the Heavenly treasures,
They will never pass away!

Hold to God's unchanging hand!
Hold to God's unchanging hand!
Build your hopes on things Eternal,
Hold to God's unchanging hand!

³⁴⁹ [Usa ka igsoong babaye ang nagasulti sa laing mga dila, Usa pa ka igsoong babaye ang nagahatag og paghubad—Ed.] Ginapasalamatang Ka gayud namo, Gino. Samtang ania kami niining maalampoong higayon, nga halos sama ra sa usa ka paglubong, tungod kay ginaatubang man namo ang paglubong sa himalasyon, patay na nga kalibutan; sa himalasyon, patay na nga iglesia.

Oh Dios, tiguma na ang Imong trigo sa gilayon, Amahan. Umari Ka na sa gilayon, Ginoong Jesus.

³⁵⁰ Panalangini ang Imong mga katawohan, Amahan, ihatud ang pagkamatinuuron ug pagkahalawum sa mga kasingkasing sa mga tawo. Hinaut nga mangbiya na kami gikan nianang mga pagsayaw-sayaw, og magpabilin na gayud diha sa kinahiladman sa madagayaon nga dugos sa Dios. Itugot kini, Gino. Ipapabilin nga malig-on ang among mga kasingkasing nga may gugma ug pagkamatinuuron.

³⁵¹ Panalangini ang Imong mga katawohan sa kon asa man, Amahan. Sa pagbiya namo dinhi niini nga lugar hinaut nga managpanguli kami diha sa Ngalan ni Ginoong Jesus aron masulti lang namo kung unsa ang tinuod, kung unsa ang Kamatuoran, kung unsa ang husto, hinaut nga likayan namo ang sayup, Gino. Sa diha nga may usa ka tawo nga mosugod na sa pagpamakak kanamo, hinaut nga talikdan dayon namo siya, talikdan ang tanang mahugaw, malaw-ay nga mga pagpakatawa ug mga butang nga iya sa kalibutan, ug nga motalikod gayud ug mopahilayo na. abangi kami, minahal nga Dios. Umula kami, andama kami, dugmoka kami, ug himoa kami nga sumala sa dagway sa mga anak nga lalaki ug mga anak nga babaye sa Dios aron nga manglihok kami nga may kaligdong sa Balaang Espiritu. Ginatugyan namo ang among kaugalingon nganha Kanimo, samtang naghinawiray kami og mga kamot, sa Ngalan ni Jesus Cristo. Amen.

Manindog kita. Igsoong Nolan.



*NAGASULAY SA PAGBUHAT OG BULUHATON SA
DIOS NGA WALA SA KABUBUT-ON SA DIOS CEB65-1127B*
(Trying To Do God A Service Without It Being God's Will)

Kining Mensahe ni Igsoong William Marrion Branham, una giwala sa Ingles niadtong Sabado sa buntag, Nobyembre 27, 1965, para sa pang-pamahaw nga tigum sa Full Gospel Business Men's Fellowship International sa Washington Youree Hotel sa Shreveport, Louisiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org